

Jesúsne afasundeccu

Tson'fa'cho

Los Hechos

Chiga Qquendya'pa jiya'cho

1 ¹Ña Lucas gi tayo tevaen pa'cco Jesús tsomba atesian'choma. ²Nane tseyi ashaemba Jesús sefacconi jaya'ngae gi tevaen. Toya sefacconi jambite Chiga Qquendya'pa tisema in'jaensi Jesúsja tisene afasundeccuma ttu'sepa condasepa manda. ³Nane Jesúsja papa ccase qquendyapa tsendeccunga attiamba cuarenta a'ta can'jen. Tsa'caen can'jemba tsuma canjae'ñaccapa a'tatsse canjaen tisu ñoa'me canse'choma. Toya'caen Chigambe a'ive da'faya'chone condase.

⁴Jesúsja tsendeccui'ccu bopa tise'panga candusian cuintsu Jerusalén canqqueni sombombe can'faye. Qquen tsu su:

—Ronda!je'faja, ña Yaya ñoa'me su'cho napiya'ngae. Nane ña tayo que'inga condaquia'caen: ⁵Ñoa'me tsu Juanjan tsa'ccui'ccu a'ima feti. Tsa'ma que'ija junde Chiga Qquendya'pai'ccu fetiye'faya'cho.

Jesús sefacconi ja'cho

⁶Tsonsi poiya'cco a'i Jesúsnga bopa ñajampaña'fa:

—Na'su, ¿ja'ñonda ti qui ccase afeya israendeccunga na'su quini'ccopa'ma?

⁷Tsonsi Jesúsja su:

—Chigaja anttembi que'i atesuye maqui a'ta ni minga'ni tsu tsa'caen napiya'chove. Nane Chiga Qquendya'pa que'ima in'jaen'nijan que'i'qqe qui osha'choma osha'faya. Tsa'caen oshapa qui ñane Jerusalén canqqueni condase'faya. Toya'caen qui Judea andeni, Samaria andeni, ñoa'me poi biani'su andenga'qqe ñane condase'faya.

⁹Jesús qquen afa nanisi Chigaja tisema sefacconi ansundian toya tisema shondosundeccu caña'jen'ni. Tsa'caen ansundiansi unjimba'cco

piccossi ccatsse tise ma atte'fambi. ¹⁰Jesús ja'choma toya camboen'jen'fa'ni dos a'i tototssia ondiccu'jema ondiccucho'chondeccu attiamba ¹¹su'fa:

—Galilea'su aindeccu, ¿jongoesie qui sefacconima can'boen ccutsu'fa? Que'i caña'jeni ja'cho Jesúsyi tsu ccase jiya. Nane tise sefacconi jaquua'caen tsu toequi vani jiya.

Matíasma ca'nian Jesúsne afa'suve

¹²Tsonsi Olivo ccotta'ccone andepa Jerusaléni ja'fa. Nane Olivo ccotta'ccoja Jerusalén pporotssi, israendeccu sema'ma'qquia a'ta jacañe in'janquia'caen biambi'cco. ¹³Jerusaléni ca'nimba tise'pa can'jen'cho tsaoni japa sefani'su cuartonga ca'ni'fa. Tse'ttini tsu can'jen'fa: Pedro, Juan, Santiago, Andrés, Felipe, Tomás, Bartolomé, Mateo, Santiago (tsaja Alfeo dutssi'ye), Simón Zelotes, toya'caen Judas (tsaja Santiago quinsin). ¹⁴Poiyi'cco fae'be injama'choa'caeni in'jamba bo'je'fa Chigama ñajañe. Toya'caen Jesús chan María, Jesús quinsingendeccu, faesu pushesundeccu'qqe tise'pai'ccu fae'ngae bo'je'fa.

¹⁵Tsa'caen boyaqui a'ta ciento veintequia'ca'on a'i bo'fasi Pedroja faengasundeccu enttingenga ccutsu'pa su:

¹⁶—Faengasundeccu, Chiga Tevaen'jen suquia'caen tsu tsoña'cho. Nane Chiga Qquendya'pa tayopi'su Davidma afaensi tsu Judasne afa. Nane Judas'ye tsu Jesúsma indipa afe'su. ¹⁷Tsa'ma Jesús tise ma ttu'sesi ingi'ccu fae'ngae jancan'su tsu. Ingia'caeni Jesúsne afa'su tsu. ¹⁸Tsa'ma Judasja nasipama chava tise egae tsomba gana'cho corifin'di'ccu. Tsomba omboe tsoveningae andenga amppisi tise ttopaja chittain ja. ¹⁹Tsonsi poi Jerusalensundeccu pañamba tsa nasipama inisian'fa Acéldama. Tise'pa aya'fangae “Anjampa Nasipa” qqen tsu inisian'fa. ²⁰Tsa'cansi Davidja tayopi settapoen'cho tevaen'jenga qqen tevaen:

Tise can'jen'choja otta catiyeya'cho.

Majañi'qqe tsani can'jen'faya'bi tsu.

Toya'caen tsu tevaen:

Faesu tsu tise sema'banga ca'niña'cho.

²¹Tsa'cansi majan ingi'ccu fae'ngae toya Na'su Jesús can'jeinte jacan'sundeccu tsu fae'cco inginga ca'niña'cho. ²²Nane Jesús Juanga fetiyene tise sefacconi jaya'ngae jacansundeccu'su tsu inginga ca'niña'cho. Tsa'caen ca'nimba tsu Jesús papa qquendya'chone cambia afa'suve daya'cho.

²³Tsomba dos a'ive ccutsian'fa. José Justo, tsa Barsabás qqen inisian'choma, toya'caen Matíasma'qqe ccutsian'fa. ²⁴Ccutsiamba Chigama ñajamba sul'fa:

—Na'su Chiga Quitsa, que qui atesu poi a'i injama'choma. Inginga canjaenjan majan va dos tsandie tsu que in'jan'cho. ²⁵Tsa tsu ca'niña Jesúsne afa'suve. Judas'ye tsu tsa afa'je'cho sema'bama cati tisu tsangae papa catiyeya'chonga jaye.

²⁶Tsomba patuma ttova'fa atesuye majan tsanga ca'niña'chove. Ttovasi tsu Matíasnga canjaen. Tsonsi tiseja faesu once Jesúsne afasundeccui'ccu ca'ni.

Chiga Qquendya'pa in'jaen'cho

2 ¹Pentecostés fiesta a'ta tayo napisi poiyyi'cco Cristove in'jan'chondeccuja fae'ngae bo'fa. ²Tse'faei'ccuyi sefaccone jen'choma paña'fa fingian quia'me fingianquia'caen. Tsa'caen jemba pa'cco tise'pa bo'fa'cho tsa'onga ca'ni. ³Tsonsi atte'fa si'ngia'ca'en anchandapa menzanza'je'an. A'i atte'fasi tsa si'ngeja poiyyi'ccongga attufacco. ⁴Tsa'caen Chiga Qquendya'pa poiyyi'ccongga ca'nimba in'jaensi osha'cho ccaninga aya'fangae afaye ashaen'fa. Ma'caen Chiga Qquendya'pa afae'nijan tsa'caen afa'fa.

⁵Tsequi a'ta Jerusaléni poi ande'su israendeccu can'jen'fa. Nane Chigave in'jamba tsa'caen jipa can'jen'fa. ⁶Sefaccone fingian jen'choma pañamba poiyyi'cco a'i tseni bo'fa. Bopa ma'caen in'jañe atesu'fambi. Jesúsne afasundeccu afa'fasi poiyyi'cco tsu tisupa aya'fama paña'fa.

⁷Pañamba can'boen ccutsu'fa. Can'boen ccutsupa tisupapora afacco'fa:

—¿Que canjan! ¿Poiyyi'cco afasundeccuja Galileasundeccumbi ti?

⁸¿Ma'camba gi poiyyi'cco ingija paña'fa tisupa aya'fangae, tisupa chuite'su aya'fangae? ⁹Majan ingi'ccu pañasundeccuta gi Partia andesundeccu, majanda Media ande'su, Elam ande'su, Mesopotamia, Judea, Capadocia, Ponto, Asia, ¹⁰Frigia, Panfilia, majanda Egipto andesundeccu. Toya'caen faesundeccu Libia ande'su Cirene joccane jipa can'jen'fa. Can'jen'fa Romanondeccu'qqe, majanda ñoa'me israendeccu, majanda tsa'su israendequia'caeni Chigave in'jan'chondeccu. ¹¹Cretasundeccu, Arabiasundeccu'qqe can'jen'fa. Tsa'ma ingija poiyyi'cco gi Chiga ñotsse tson'choma paña'fa tisupa aya'fangae.

¹²Tsendeccuja poiyyi'cco can'boen ccutsupa ma'caen in'jañe atesumbipa tisupapora in'ajampañacco'fa:

—¿Ma'camba tsu qquen?

¹³Tsa'ma cca'indeccuja feñamba su'fa:

—Tsendeccuja ccusipa ya'caen afa'fa.

Pedro a'inga condase'cho

¹⁴Tsonsi Pedro faesu oncei'ccu ccutsupa poiyyi'cco a'inga quia'me afapa su:

—Israendeccu, poiyyi'cco Jerusaléni can'jensundeccu, vama atesu'faja.

Ñotsse paña'faja ña su'choma. ¹⁵Vandeccuja ccusi'je'fambi tsu, que'i in'janquia'caenjan. Ja'ñojan toya tsu sinte'yi. Chiga enttingeve toya tansimbite a'ija ccusiye atesu'fambi. ¹⁶Tsa'ma tayopi Chiga Aya'fama afa'su Joel afaquia'caen tsu vandeccuja tson'fa. Qquen tsu tiseja tayopi su:

¹⁷Chigaja su: —Osefaña'cho a'ta napi'nijan

poi aindeccunga gi

Ña Qquendya'pama moeña.

Que'i dutssiyendeccu,

que'i onquengendeccu tsu Ñane afa'faya.

Que'li chu'a tsandiendecuja
sefani'su attian'choma tsu atte'faya.

Que'li coenzandecuja
ayó'pae tsu ayo'o'faya.

18 Moeña gi Ña Qquendya'pama Ñama shondosundecunga
-tsandienga, pushesunga.

Tsonsi tsu tsendecuja Ñane afa'faya.

19 Tsonsi gi sefacconima canjaeña osha'cho camboenitssia'ma.
Andenga'qqe osha'choma gi canjaeña:
Anjampa, si'nge, onfen'bama.

20 Toya'caen Na'su jiya'cho a'ta ca'tsa napijji'nijan
cojechiga tsu sinttie daya.

Cose'suchiga'qqe tsu anjampaveyi daya.

Tsequi a'ta Na'su osha'choma canjan'jensi tsu
a'ija can'boen'faya.

21 Tsonsi tsu majan Na'suma iñajan'chota ccusha'faya.

22 ¡Israendeccu, paña'faja! Chiga Quitsaja a'tatsse que'inga Jesús Nasareno'suma canjaen. Tisema in'jaensi Jesúsja osha'cho sefani'su agattoen'choma canjaen. Sefani'su canjaen'choma'qqe canjaen. Attiaña'choma'qqe attian. Tsa'caeni tsu Chigaja tisema'qqe a'tatsse que'inga canjaen. Que'ija tsama atepa qui injan'jen'fa. 23 Chigaja tayoe pa'tssima atesupa ñotsse in'jan'ma Jesúsma que'inga moen cuintsu que'li ma'caen tsoñe in'jan'da tsa'caen tisema tson'faye. Tsa'caen moensi que'ija tisema fi'tti'fa. Nane indipa egandequianganga afesi avuja'cconga otipa fi'tti'fa. 24 Tsa'ma tsa'caen fi'tti'fasi Chigaja tisema ccase qquendyaen tsangae paya'cho'ye joqqitssiamba. Nane tiseja tsangae paye oshambi. 25 Tayopi'su na'su David'yeja tisene afapa qqen tsu su:

Na'su Chiga poi a'ta ñai'ccu can'jensi gi Tisema atte'je.

Tiseja ña tansinfani can'jen ña dyopa ttun'dundu'jesa'ne.

26 Tsa'cansi gi ña injama'cho avujatssipa ña aya'fai'ccu avujatssse afa.

Tsa'cansi tsu ña ai'vo'qqe dyombi'tsse ronda'je.

27 Nane Queja, Chiga Quitsa, ña qquendya'pama catiya'bi qui
pa'chondeccu can'jeni.

Ni antteya'bi qui que in'jan'cho a'imbe ai'vo papa congoñe.

28 Que qui ñama atesian ma'caen can'jemba tsangae canseye.

Nane que ñai'ccu can'jensi gi atepa avujatssi.

Qquen tsu Davidja su.

29 Faengasundeccu, poiyl'cco gi atesu'fa ingi tayopi'su ccashe'ye David'yeja pa. Pasi tsu tisema a'tu'fa. Nane tise'ye atu'ttima ingija toya atteye osha'fa. 30 Tsa'ma David'ye tsu Chiga Aya'fama afa'su. Tsa'camba tsu atesucho. Chiga Quitsa ñoa'metsse su'choi'ccu susi David'yeja pañamba in'jan fae'cco tise omba'su dutssi'ye Chiga in'jan'cho Cristoya tsu. Tsaja tisia'caen na'suve daya. 31 Tsane tsu David'yeja qqen su: "Tise qquendya'pama catiya'bi pa'chondeccu can'jeni."

Toya'caen tsu su: “Ni antteya'bi tise ai'vo papa congoñe.” Qquen supa David'yeja tayo atesuqquia'caen Cristo papa ccase qquendyaya'chone tsu afa. ³²Nane Chiga Quitsaja toe Jesúsveyi qquendyaemba pa'cho'ye jangian. Ingija poi'yi'cco tsama attepa condasundeccu gi. ³³Chiga Quitsaja Jesúsma osha'chone ti'tsse'tssia've tson. Tsa'caen tsonsi Jesúsja Chiga tansinfani can'jen. Chiga tayoe tise Qquendya'pama afeye susi Jesúsja tsama isupa a'inga afepa in'jaen. Tsa Chiga Qquendya'pa in'jaen'choma qui ja'ño attepa paña'fa. ³⁴Nane tayopi'su David'yeja tise ai'voi'ccu sefacconi ansundembi. Tsa'ma qquen tsu tiseja tayoe su:

Na'su Chigaja ña na'sunga su:

“Ñai'ccu fae'ngae na'suve dapa

va'ttinga dyaija ña tansinfanga

³⁵Ña quema iyiccayesundeccuma patsuya'ngae.”

³⁶Tsa'cansi tsu poi'yi'cco israendeccu vama pañamba ñotsse in'jan'faya'cho: Va Jesús que'i avuja'conga fi'tti'choma Chiga Quitsaja Na'su Cristove tson.

³⁷Qquen susi pañamba poi'yi'cco pañasundeccu tisupa injama'choni asi'ttaemba ñombi'ye'fa. Ñombi'yepa Pedroma, faesu Jesúsne afasundeccuma'qqe in'jamapaña'fa:

—Faengasundeccu, ¿ma'caen gi tson'faya?

³⁸Tsonsi Pedroja su:

—Poi'yi'cco Chigave in'jamba que'i egae tsincon'choma antte'faja.

Jesús a'ive daye in'jamba fetiye'faja. Tsonsi Chiga tsu que'i egae tsincon'choma joqqitssiaña. Tsa'caen joqqitssiamba tsu que'inga afeya Tise Qquendya'pama. ³⁹Nane Chigaja tayoe que'inga Tise Qquendya'pama afeye tansintsse su. Que'i dushundeccunga'qqe afeye su. Ñoa'me poi'yi'cco biani can'jensundeccunga'qqe afeye tsu su. Nane poi'yi'cco majama ingi na'su Chiga in'jamba tsanga tsu Tise qquendya'pama afeye su.

⁴⁰Tsa'caen condasepa Pedro ti'tsse'tsse afapa qquen candusiamba su:

—¡Cusha'faja va ja'ño'su egae aindeccu'ye sombopa!

⁴¹Tsa'caen susi majan pañamba in'jan'chondeccuja fetiye'fa. Nane tsequi a'ta tsu tres milquica'ca'on a'i Jesúsve in'jan'chondeccuve da'fa.

⁴²Tsendeccuja poi a'ta bopa Jesúsne afasundeccu atesian'jen'choma paña'jen'fa. Toya'caen fae'ngae can'jemba Jesúsve in'jan'jeña'cho panma doñamba fae'ngae an'fa. Toya'caen fae'ngae Chigama in'jamboen'fa.

Jesúsve in'jamba ma'caen canse'cho

⁴³Chiga fuitesi Jesúsne afasundeccuja sefani'su canjaen'choma attian'fa. Osha'cho agattoen'choma canjan'jen'fa. Tsa'caen canjaen'fasi cca'indeccuja dyopa can'boen'fa. ⁴⁴Poi pañañe in'jan'chondeccuja fae'ngae can'jemba osha'choma fa'engayi an'bian'fa. ⁴⁵Tise'pa andema, tise'pa an'bian'choma'qqe chavaemba corifin'dima isupa mendequianganga attufaen'fa, majan ti'tsse shaca'chonga. ⁴⁶Poi a'ta fae injama'choa'caen in'jamba Chiga ettinga fae'ngae bo'fa. Toya'caen tise'pa

tsaoni fae'ngae bopa Jesúsve injan'jeña'cho panma doñamba an'fa. Injama'choni avujatsse se'pimbe'yi fae'ngae tise'pa cui'ccuma cu'l'fa. ⁴⁷Chigama inñajamba avujatsse afa'fa. Tsa'caen canse'fasi cca'indeccuja cambia tsendeccuma ñotsse in'jan'fa. Toya'caen poi a'ta na'su Chigaja a'ima in'jaensi ti'tsse'tssi a'i Jesúsve in'jan'fa. Tsa'caen in'jamba faenga'su Jesúsve in'jan'chondeccui'ccu bo'fa.

Tsu'tte dañonge'choma ccushaen'cho

3 ¹Fae a'ta, tayo ondusesi, Chigama inñajaña'cho hora napisi, Pedro, Juani'ccu Chiga ettini ja'fa. ²Fae Chiga etti'su sombo'tti tsu Ñoncca'a Sombo'tti qqen inisecho'cho. Tse'ttinga tsu poi a'ta fae tsandie chuitepie tsu'tte dañonge'choma faesundeccuja anga ccuiña'jen'fa. Tsa'caen ccuiña'fasi tsu corifin'dive inñajan'jen Chiga ettinga cani'jen'fa'choma. ³Tsa'camba Pedro, Juan Chiga ettinga ca'niñe jiña'fasi atepa corifin'dive inñajan. ⁴Tsonsi Pedro, Juan'qqe tise ma can'boemba Pedroja su:

—Ingima canjan.

⁵Tsonsi tsandieja tsendeccuma cambia in'jan jongoesuma tisenga afe'fa've'se. ⁶Tsa'ma Pedroja su:

—Mecho gi cori ni corifin'dive'qqe. Tsa'ma jongoesuma ña oshachota gi tsama afeqqia'caen quenga tsoña: Jesucristo Nasareno tsu quema ccushaen. Jangipa tsui jaja.

⁷Tsa'caen supa Pedroja tsandie tansinfa'su tive'ye indipa qquitsa jangian. Tse'faei'ccuyi tise tsu'tte, tsu'tte nemba'cho'qqe ta'etsse da. ⁸Tsonsi quia'me butto jangipa tsui ja'je. Tsa'caen ccushapa Pedro Juani'ccu fae'ngae Chiga ettinga ca'ni. Nane tsa'caen ca'nimba butto'tto ccutsupa tsui ja'je. Tsomba Chigama inñajamba avujatsse afa. ⁹Tsa'caen tsui ja'jepa Chigama inñajamba avujatsse afasi poi'cco a'i tise ma can'boen'fa. ¹⁰Can'boemba in'jan'fa: “Chiga etti'su Ñoncca'a Sombo'ttinga dyaipa corifin'dive inñajan'su tsu.” Tsa'caen in'jamba dyopa can'boen ccutsu'fa tise tsa'caen da'choma atepa.

Pedroja Chiga ettini candusian

¹¹Cusha'choja Pedro Juan'ñe catiyembi. Tsonsi poi'cco a'i tise'panga bo'fa Chiga etti'su Salomón etticcu'cho qqen inisecho'chonga. Tsa'caen bopa tise'pama can'boen'fa. ¹²Tsonsi Pedro tsendeccuma atepa su:

—Israendeccu ¿jongoesu qqen in'jamba qui ingima can'boen'fa?

¿Jongoesu qqen qui asi'ttaen'fa? ¿Ingija tisupayi oshapa ccushaen'fa qqen ti qui in'jan'fa? Me'i. ¿Ingija Chigave ñotsse in'jamba ccushaen'fa osha'fa qqen ti qui in'jan'fa? Me'i. ¹³Nane Abraham Chiga –tsa Isaac, Jacobmbe Chiga– ingi coenzandecumbe Chiga –tsayi tsu Tise Dutssi'ye Jesúsma ñoa'me'qqe ti'tsse'tssi've tson. Tsa'ma que'i tsa Jesúsma indipa Pilatonga afe'fa. Pilato Jesúsma ccupaye in'jansi que'ija Jesúsma chi'gapa se'pi'fa. ¹⁴Nane tsa Chigambe Ño'ama qui chi'gapa a'ima fi'tti'suma in'jamba tsama ccupaye inñajan'fa. ¹⁵Tsomba qui Cansian'su Na'suma fi'tti'fa. Tsa'ma Chiga Quitsaja

pa'cho'ye tise ma ccase qquendyaen. Tsama attepa condasundeccu gi. ¹⁶Tsa Jesús tsu va a'ima ccushaen. Tise iniseve ingi in'jansi tsu va tsandieja quinssetsse ccusha. Va tsandie tsu que'li atte'cho, toya'caen que'li atesu'fa'cho. Jesúsve in'jansi tsu tiseja tsangae ccusha que'li poiyyi'cco camboen'jen'ni.

¹⁷Antiandeccu, atesu'fa gi que'li nasundeccu'qqe tisupa ma'caen tson'chove atesumbe Jesúsma fi'tti'fa. ¹⁸Tsa'ma Chiga tsu tsa'caen antte cuintsu Tise tayopi suqquia'caen tsa'caen tson'faye. Nane tayopi Tise Aya'fama afasundeccuja qquen su'fa: “Chiga in'jan'cho Cristota tsu vanaña'cho.”

¹⁹Tsa'cansi que'li egae tsincon'choma anttepa Chiga Quitsanga ji'faja cuintsu Tise que'li egae tsincon'choma ccuchaye. Tsa'caen ccuchapa Na'su Chiga tsu que'li injama'choma ño'faeña. ²⁰Nane Tise tayopi conda'suve que'inga moen'cho Cristoveyi tsu que'inga moeña, tsa Jesúsma. ²¹Tsa'ma ja'ñonda tsu Jesúsja sefaconi ro'ndá can'jeña'cho, osha'choma Chiga ccase ñotsse ñoñaña'gae. Nane tayopi Chigaja Tise Aya'fama ñotsse afasundeccuma afaensi tsu tsane ya'caen condase'fa. ²²Tsa'camba tsu Moisésja tayopi qquen su: “Na'su Chiga Quitsaja ñama'caeni faesu Chiga Aya'fa afa'suma que'inga moeña tson'jen que'li antian'suveyi. Tsama paña'faja pa'cco ma'caen su'choma. ²³Nane poiyyi'cco majan tsa Chiga Aya'fa afa'su ma'caen su'choma paña'fambian'da ñoa'me tsu tsendeccuma israendeccu'ye joqqitssian catiya'cho.”

²⁴Tsa'cansi tayopi'su Chiga Aya'fa afa'su Samuel, poiyyi'cco omboe afasundeccu'qqe ja'ño a'ta tsoña'choma conda'fa'qqe'a. ²⁵Que'ija tsendeccumbe dushundeccusi tsu que'ine'qqe tsa'caen afa'fa. Toya'caen que'ine'qqe tsu Chigaja ingi tayopi'su coenzandeccui'ccu fae'ngae injancco'fa'choma afa. Nane Chigaja qquen tsu Abrahamnga su: “Que dutssi'ye tsu poiyyi'cco a'ima, pa'cco ande'suma ñotssiave tsoña cuintsu avujatsse canse'faye.” ²⁶Tsa'cansi Chigaja Tise Dutssi'yema ccase qquendyaemba que'inga o'tie moen. Tsa'caen tsu que'ima ñotssiave tson cuintsu que'li egae tsincon'choma anttepa avujatsse canse'faye.

Pedro, Juanma ñajampaña'fa'cho

4 ¹Toya Pedro, Juan, aindeccunga condase'je'fa'ni Chigama afa'su nasundeccu, Chiga etti'su sundaro capitáin'ccu napi'fa. Saduseondeccu'qqe tsendeccui'ccu ji'fa. ²Pedro, Juan'qqe Jesús tayo qquendyasi poiyyi'cco a'li tsa'caen ccase qquendya'faya'cho qquen condase'je'fasi nasundeccuja iyicca'yepa ³tsendecuma indiye manda'fa. Tsonsi indipa tayo sime dajisi piccol'je'cho ettinga piccopa a'ta'fa ccaqui a'ta somboemba iyu'uye. ⁴Tsa'ma tsain'bitssi a'li, Chiga Aya'fama pañasundeccu, ñotsse pañamba in'jan'fa. Pañamba in'jan'chondeccuja jo'su tsandienaccuveyi agatto'ma cinco milquiqua'ca'ontssi.

⁵Ccaqui a'ta israe'su nasundeccu, toya'caen coenzandeccu, Chiga manda'choma atesu'chondeccu'qqe, Jerusaléni bo'fa. ⁶Anás –tsa Chigama afa'su na'su– toya'caen Caifás, Juan, Alejandro, nane poiyyi'cco

majan Chigama afa'su na'su antianaccu tsu bo'fa. ⁷Tsa'caen bopa Pedro Juanma i'faye manda. Ipa enttingenga ccutsiamba qquen iñajampaña'fa:

—¿Majan tsu que'ima manda? ¿Majambe inisema qui iñajamba tsa'caen tsincon'fa?

⁸Tsonsi Pedroja Chiga Qquendya'pa tiseama in'jaensi qquen su:

—Israe'su nasundeccu, toya'caen israe'su coenzandeccu, ⁹¿Jongoesune qui ingima iñajampaña'fa? Va paji'choma ñotsse tsomba ma'caen ccushaen'chone iñajampaña'da ¹⁰ñotsse paña'faja cuintsu poiyl'cco israendeccu'qqe paña'faye. Jesucristo Nasareno va a'ima ccushaensi tsu tiseja que'i enttingeni ccutsu. Tsa Jesús tsu que'i avuja'ccongá otipa fi'tti'cho. Tsa'caen fi'ttisi Chiga Quitsaja tiseama pa'cho'ye ccase qquendyaen. ¹¹Que'ija Jesúsma fi'ttipa qui tsaonásundeccu patuma joqqitssian catiikka'caen tson'fa. Nane tsa'caen joqqitssian'fa'cho patu tsu ja'ñojan chan'ljime ccutsiaña'chove da. ¹²Majan faesu ccushaen'suve me'l'on tsu. Ni Chiga Quitsa'qqe faesu ccushaen'suve condambi va ande'su aindeccunga majan ingima ccushaen' oshaya'chove.

¹³Pedro, Juan, tsa'caen dyombi'tsse afa'fasi nasundeccuja asi'ttaen'fa: “Vandeccuja aquia a'i, escoeranga bo'tsse ca'nimbindequua'ta ¿ma'caen tsu ya'cantsse afa'fa?” Qquen asi'ttaemba in'jan'fa tsendeccuja fae'ngae Jesús'ccu jacansundeccu. ¹⁴Toya'caen a'i ccusha'cho'qqe tsendeccu'ccu fae'ngae ccutsusi atepa jongoesu qquen afaye osha'fambi. ¹⁵Tsa'camba tsendeccumá joqqitssiañe manda'fa bo'je'cho cuarto'ye. Tsa'caen joqqitssiamba nasundeccuja tisupayi qquen condasecco'fa:

¹⁶—¿Ma'caen gi tson'faya va aindeccuma? Poiyl'cco Jerusaléni can'jendeccu pañamba atesucho'fa va sefane canjaen'cho ccushaen'choma. ¿Ma'caen gi ccaningaeja afa'faya? ¹⁷Tsa'ma jinge se'pi'faye cuintsu poiyl'cco a'i vandeccu condase'choma pañambe can'faye. Jinge iyu'u'faye cuintsu majangayi'qqe Jesúsma ccase afambe can'faye.

¹⁸Tsa'caen afaccopa tsendeccumá ttu'sepa iyu'upa se'pi'fa cuintsu Jesúsne majangayi'qqe condasepa atesiambeyi can'faye.

¹⁹Tsa'ma Pedro, Juan'qqe pañamba su'fa:

—¿Jongoesu tsu Chigane ti'tsse ñotssi, qquen qui in'jan'fa? ¿Que'ima ti pañañe o Chigama ti pañaña'cho? ²⁰Nane ingi pañamba atte'chone afa'je'chomanda gi antteye osha'fambi.

²¹Tsa'caen su'fasi ti'tsse iyu'upa fettamoen'fa. Nane poiyl'cco a'i tsa a'i ccusha'chone in'jamba Chigama avujatsse afa'je'fasi ma'caen Pedro, Juanma ma'ppiya'chove jinchombisi tsa'caen moen'fa. ²²Tsa tsandie, Chiga sefane canjaensi ccusha'choja, coenza –cuarenta canquue'fama ti'tsse tsu an'bian.

In'jan'chondeccu Chigama iñajan'fa

²³Pedro, Juan'qqe fettayepa tisupanaccunga ja'fa. Japa pa'tssima conda'fa ma'caen Chigama afa'su nasundeccu, toya'caen coenzandeccu su'fa'choma.

²⁴Tsonsi poiyl'cco pañamba fae'be aya'fa'caeni Chiga Quitsama fae'ngae iñajan'fa:

—Joccapitssia Na'su, que qui sefacco, ande, mar, osha'cho tsani jinque'suve'qqe agattoen'su. ²⁵Que qui que Qquendya'pai'ccu tayopi quema shondo'su Davidma in'jaensi qqen tsu su:

¿Jongoesie tsu israembindeqquiaja qqejian'fa?

¿Jongoesie tsu aindeccuja iyiccoye in'jan'fa?

²⁶Poi ande'su nasundeccu tsu ñña'fa gerañe.

Canqqe nasundeccu'qqe tsu tayo bo'fa

Sefaconi'su na'sui'ccu iyiccoye.

Tise in'jan'cho Cristoma'qqe tsu iyicca'ye'fa.

²⁷Ñoa'me tsu va canqqeni Na'su Herodes, Governaror Poncio Pilato'qqe, israembindeqquia, israendecu'qqe bopa quembe ñ'a Dutssi'ye Jesúsma iyicca'ye'fa. ²⁸Tise'paja tsa'caen tsomba tsu que tayo in'jamba anttequua'caen tson'fa. ²⁹Ja'ñojan, Na'su, tise'pa iyu'u'choma pañamba que shondosundeccuma fuiteja ingija dyombi'tsse que Aya'fama afa'faye. ³⁰Queja osha'choma oshachopa pajisundeccuma ccushaemba sefani'su canjaen'cho, sefani'su agattoen'choma'qqe canjaenjan cuintsu poi'ccu a'i atepa que Ño'a Dutssi'ye Jesúsve in'jamba tise inisingae tsa'caen tson qqen in'jan'faye.

³¹Chigama inajan nanisi tise'pa bo'je'ttija oya. Tsa'caen oyasi poi'ccu ccongga Chiga Qquendya'pa ca'ni. Ca'nisi dyombi'tsse Chiga Aya'fama afa'je'fa.

Poi'ccu fa'enga an'bian'fa

³²Poi'ccu Jesúsve in'jan'chondeccu fae'be injama'choa'caen fae in'jan'choveyi in'jamba canse'fa. Nane tise'pa an'bian'choma'qqe fa'engayi an'bian'ma ni majañi'qqe “Vaja ñambeyi” qqen su'fambi. ³³Chiga tsa'caen tise'pama in'jaensi Jesúsne afasundeccuja Na'su Jesús papa ccase qquendya'chone condasesi tsain'bio a'i pañamba in'jan'fa. Toya'caen Chiga poi'ccu fuitepa ñotsse tsonsi ³⁴majañi'qqe tise'pa'suja mecho'fambi. Nane poi'ccu majan tsa'o, andema an'bian'chondeccuja chavaemba corifin'dima isupa ipa ³⁵afe'fa Jesúsne afasundeccunga. Tsa'caen afe'fasi tsendeccuja isupa mendeqquianga attu'faen'fa majan ti'tsse shaca'chonga.

³⁶Nane tse'tti can'jen Levita a'i, José qqen inisecho'cho. Tisema isu'cho andeja Chipre anttepo'cho. Jesúsne afasundeccuja tsama inisian'fa Bernabé, “Fuite'su A'i” qqen su'chove. ³⁷Tsa Bernabé'qqe nasipama an'biamba chavaen. Chavaemba corifin'dima isupa Jesúsne afasundeccunga afe.

Ananías Safira'qqe egae tson'fa'cho

5 ¹Tsa'ma faesu a'i, Ananías qqen inisecho'cho, tise pushe Safirai'ccu tise'pa andema chavaen'fa. ²Chavaemba Ananíasja corifin'dima isupa enttingeve a'tu. Tise pusheja tsama pa'tssima atesucho. Tsa'caen a'tupa enttinge'ccoyi ipa afe Jesúsne afasundeccunga. Ñoa'me pa'ccoma afeqqia'cantsse afe. ³Tsa'ma Pedroja tisema su:

—Ananías, ¿jongoesie tsu cocoya na'su Satanajan que injama'choma in'jaen tsa'caen Chiga Qquendya'panga afopoëne andema chavaemba isu'cho corifin'dima enttingeve a'tupa? ⁴Toya chavaembi'teja quembe tsu andeja. Toya'caen chavaen'nijan quembe tsu corifin'di. ¿Jongoesu qquen in'jamba qui qquenjan tson? Pa'ccoma afeqquia'cantsse qui enttingeccoeyi afe. A'ingaja afopoembipa qui ñoa'me Chiganga afopoen.

⁵Tsama pañamba Ananíasja papa amppi. Tsama pañamba poiya'cco paña'chondeccuja dyo'fa. ⁶Tsonsi chu'a tsandideccu jipa tise ai'voma ugapa anga'fa a'tuye.

⁷Tres hora pasasi pa'chombe pushe'qqe ji tise tsa'ndu ma'caen da'chove atesumbe. ⁸Tsonsi Pedroja inajampaña:

—Condaja ñanga. ¿Ñoa'me ti qui que'i suqquia'caen qquen'ccoeyi andema chavaen'fa?

Pushesuja su:

—Ju, tsa'cancceoyi.

⁹Tsonsi Pedroja su:

—¿Jongoesie qui que'ija fae'ngae Na'su Chiga Qquendya'panga ya'caen afopoen qquen tson'jen'fa? Que canjan. Tsotefae tsu jiña'fa que tsa'nduma atusundeccu. Quema'qqe tsu anga'faya.

¹⁰Tse'faei'ccuyi tise'qqe papa amppi Pedro tsutteccofanga. Tsa'caen pasi chu'a tsandideccuja ca'nimba pajin ccui'choma atte'fa. Attepa ugapa angapa a'tu'fa tsa'ndui'ccu pporotsse. ¹¹Tsa'caen tsonsi poiya'cco Jesúsve in'jan'chondeccuja dyo'fa. Toya'caen poiya'cco majan pañasundeccu'qqe dyopa can'boen'fa.

Sefani'su canjaen'choma canjaen'fa

¹²Jesúsne afasundeccui'ccu Chiga Quitsaja tsain'bio sefani'su agattoen'choma, sefani'su canjaen'choma'qqe a'inga canjaen. Nane poiya'cco Jesúsve in'jan'chondeccu fae injama'choa'caeni in'jamba bo'fa Chiga etti'su Salomón etticcu'chonga. ¹³Cca'indeccuja dyopa tise'pai'ccu fae'ngae bo'fambi. Tsa'ma bombi'a'qqe toya tsu tise'pama ñotsse injan'jen'fa. ¹⁴Tsa'camba tsain'bio a'i toya paña'jemba Cristove in'jan'fa, majan tsandideccu, majan pushesundeccu'qqe. ¹⁵Tsa'caen in'jamba pajisundeccuma i'fa. Nane tise'pa anal'jen'cho, tise'pa covijai'ccu ipa tsaiquina ccuiña'fa cuintu Pedro tsui pansha'nijan coe'je desi tise ayaja pajisundeccunga deye. ¹⁶Tsa'caen in'jamba faesu pporotssia canquesundeccu'qqe Jerusaléni i'fa tise'pani'su pajisundeccuma. Toya'caen cocoya ca'ni'chondeccuma'qqe tsu i'fa. Tsa'caen i'fasi poiya'cco tsu ccusha'fa.

Jesúsne afasundeccu vana'fa'cho

¹⁷Tsa'caen tson'fasi Chigama afa'su na'su, tisia'caen in'jan'cho saduseondeccu'qqe tisupa injama'choi'ccu se'pipa iyicca'ye'fa.

¹⁸Iyicca'yepa sundaroma manda'fa cuintu Jesúsne afasundeccuma indi'faye. Tsa'caen manda'fasi japa indipa picco'je'cho ettinga picco'fa.

¹⁹Tsa'ma cosesi Chigama sefani'su shondo'su jipa picco'je'cho etti'su sombo'ttima fettapa tsendeccuma somboemaña qquen supa:

²⁰—Que'ija japa Chiga ettinga ccutsupa pa'tssi va ñotsse canseya'chove atesian'jen'choma aindecungua condase'faja.

²¹Tsa'caen susi pañamba ccaqui a'ta sinte'yi Chiga ettinga ca'nimba ti'tsse atesiañe ashaen'fa.

Tsa'ma atesumbe Chigama afa'su na'su, tisupanaccui'ccu poi nasundeccuma ttu'se boña'fa, nane poi israe'su coenzandeccuma. Tsa'caen bo'fasi na'suja manda picco'je'cho etti'ye Jesúsne afasundeccuma somboe'nga'faye. ²²Tsa'ma sundarondeccu picco'je'cho ettinga japa indiye'chondeccuma atte'fambi. Attembipa toequi jipa ²³su'fa:

—Japa gi atte'fa picco'je'cho ettima toenga yavepa ta'tesse picco'cho. Coira'su sundarondeccu'qqe tsu sombo'ttini ccutsu'fa. Tsa'ma fettapa cansi indiye'chondeccuve me'i'on.

²⁴Tsama pañamba Chiga etti'su sundaro capitán, Chigama afa'su nasundeccu'qqe atesumbipa injanga asi'ttaen'fa, “¿Mingae tsu da'fa?” qquen in'jamba. ²⁵Tsa'caen asi'ttaen'jen'fa'ni faesuja jipa conda:

—Tsendeccu, que'i picco'je'cho ettinga picco'chondeccu tsu ja'ño Chiga ettini a'ima atesian'jen'fa.

²⁶Qquen condasi sundaro capitán, tise sundarondeccui'ccu japa i'nga'fa. Tsa'ma mingae'qqe tsonbe'yi tsendeccuma ñotsse vasuitsse i'fa. Nane cca'i iyicca'yepa tise'pama patui'ccu ttovaccoensa'ne tsa'caen vasuitsse i'fa. ²⁷Ipa nasundeccu bo'fa'chonga ccutsiansi Chigama afa'su na'su tsendeccuma iñajampaña:

²⁸—Tayo gi que'ima quia'me manda Jesúsne atesiambe can'faye. Tsa'ma tsa'caen se'pi'fa'ni'qqe ¿toya ti qui tsa'caen atesian'jen'fa? Nane ja'ñojan poi'yi'cco Jerusalensundeccu tsu que'i atesian'jen'choma paña'fa. ¿Ñoa'me inginga ti qui Jesúsma fi'tti'fa'cho shacama antteye in'jan'fa?

²⁹Qquen susi Pedro, faesu Jesúsne afasundeccu'qqe qquen conda'fa: —Ingija Chiga Quitsama pañaña'cho. A'i ccaningae manda'ninda pañañe osha'fambi gi. ³⁰Que'i Jesúsma avuja'ccongá otipa fi'ttisi Chiga Quitsa –ingi tayopi'su a'i in'jan'cho Chiga– tsayi tsu Jesúsma qquendyaen. ³¹Chiga Quitsaja Jesúsma ti'tsse joccapitssia've tsomba Tisu tansinfanga ccutsian cuintsu na'suve daye. Toya'caen tsu Chigaja Jesúsveyi ccushaen'suve'qqe tson cuintsu israendeccu'qqe in'jan'da ccusha'faye. Nane tise'pa egae tsincon'choma antteye in'jamba Jesúsve in'jan'ninda tsu Chigaja tise'pa egae tsincon'choma joqquitssiaña. ³²Ingija pa'tssi vama atesupa condasesundeccu gi. Toya'caen Chigaja Tisu Qquendya'pama poi'yi'cco Tisema pañasundecungua afesi tsa Qquendya'pa'qqe pa'tssi vama atesupa condase'su tsu.

³³Qquen susi nasundeccuja ñoa'me iyicca'yepa tise'pama fi'ttiye in'jan'fa.

³⁴Tsonsi fa'e na'suyi, Gamaliel, qquen inisecho'cho, bo'fa'chonga jangi ccutsu.

Nane tsaja fariseondeccu in'jan'cho a'i tsu, Moisés manda'choma atesian'su. Poiyi'cco a'i tsu tise ma ñotsse in'jamba paña'fa. Tsa tsu ccutsupa manda cuintu Jesúsne afasundeccuma cuarto'ye re'riccone joqqitssiansi tisupayi condaseccoye. ³⁵Joqqitssian'fasi Gamalielja nasundeccu bo'fa'chonga su:

—Israendeccu, injama'tse ma'caen qui tson'faya va aindeccuma.

³⁶Nane in'jan'fambi ti qui voeyiyitsse fa'e, Teudas qquen inisecho'cho, jangi ccutsupa su: “Ña gi ti'tsse'tssia na'suve daya.” Qquen susi cuatro cientoqqiaca'on a'i tisenga ja'fa. Tsa'ma faesuja Teudasma fi'ttisi poiyi'cco tisei'ccu jacansundeccu ccuyayin ja'fa, me'tsse. Tsangae tsu pasa tise na'suve da'cho. ³⁷Omboc aindeccuma agattointe, Judas, Galilea'su a'i tsu na'suve daye ji. Jisi majan tise ma paña'chondeccuja tisenga bo'fa. Tsa'ma faesuja Judasma'qqe fi'ttisi tise ma pañasundeccuja ccuyayin ja'fa. ³⁸Tsa'cansi gi ja'ño conda: Antte'faja va aindeccuma. Tise'pama ccatsse noñangian'fajama. Nane tise'pa in'jan'cho, tise'pa tson'jen'cho aquia a'i in'jamba tson'jen'chota tsu pasaya'cho. ³⁹Tsa'ma Chiga in'jaensi tson'jen'chomajan pasaeñe qui osha'fambi. Nane injama'tse Chigai'ccu iyiccosa'ne.

⁴⁰Gamaliel qquen susi poiyi'cco pañamba in'jan'fa tise su'choma. Tsomba Jesúsne afasundeccuma ttu'sepa ma'ppi'fa. Tsa'caen ma'ppipa iyu'u'fa cuintu Jesúsne afambeyi can'faye. Iyu'upa somboemoen'fa. ⁴¹Tsonsi nasundeccu bo'fa'cho'ye sombopa avujatsse jaja'fa. Qquen in'jamba tsu avujatssi'fa:

—Chiga Quitsaja ingima ñotsse in'jamba tsu antte cuintu Jesúsne vana'faye. Nane cca'indeccu ingima afasepa ma'ppi'fa'ni'qqe ingija dyombi'tsse Jesúsne afaye osha'fa.

⁴²Tsomba Jesúsne afasundeccuja antte'fambi Jesúsne atesiamba candusiañe. Nane poi a'ta Chiga ettini, tise'pa tsaoni'qqe “Jesúsja Cristo” qquen tsu condase'fa.

Siete fuitesundeccuma avuse'fa

6 ¹Tsonsi tse'li ti'tsse'o a'i Jesúsve in'jan'chondeccuve dapa bo'fasi griego aindeccu tsu iyicca'ye'fa israendeccuma. Nane poi a'ta osha'choma attufaen'fasi tise'pani'su tsandupajen'chondeccu ñotsse isu'fambi. ²Tsonsi tsa doce Jesúsne afasundeccu poiyi'cco Jesúsve in'jan'chondeccuma boñamba su'fa:

—Ingija Chiga Aya'fama candusian'jen'choma antteye osha'fambi o'fiañe mandasundeccuve daye. ³Tsa'cansi, faengasundeccu, que'i'suma tta'tta'faja siete tsandie cuintu attufaensundeccuve da'faye. Nane tta'tta'faja majan ñotssia a'i qquen su'fa'chondeccuma, majan atesu'chondeccuma, toya'caen majan Chiga Qquendya'pa in'jaen'chondeccuma. Tsomba tsendeccuma manda'faja cuintu attufaensundeccuve da'faye. ⁴Ingija toya Chigama iñajan'jen'faya. Toya'caen Chiga Aya'fama atesian'jen'faya.

⁵Tsonsi poiyi'cco fae'ngae ñotsse in'jamba Estebama avuse'fa. Nane Chiga Qquendya'pa Estebama ñotsse in'jaen. Tsa'cansi Estebanjan pa'tssi

injama'choi'ccu Jesúsve in'jamba paña. Toya'caen tsu avuse'fa Felipe, Prócoro, Nicanor, Timón, Parmenas, Nicolásma'qqe. Tsa Nicolás tsu Antioquía canqqe'su a'i, toya Jesúsve pañambi'te israendeqquia'caen Chigave in'jan'cho. ⁶Tsendeccuma avusepa Jesúsne afasundeccunga ipa ccutsian'fa. Tsonsi Jesúsne afasundeccu Chigama inajamba tise'pa tivei'ccu tsendeccuma pporaen'fa tsesu sema'banga ca'ni'fa qqen canjaeñe.

⁷Tsonsi tse'i ti'tsse'tssi a'i tsu Chiga Aya'fama paña'fa. Nane tsain'bio Jerusaléni'su aindeccu pañamba Jesús a'ive da'fa. Toya'caen tsain'bio Chigama afasundeccu'qqe Jesúsve in'jan'fa.

Estebanma indi'fa'cho

⁸Estebanjan Chiga quin'sui'ccu in'jamba osha'choma oshacho. Tsa'camba osha'cho sefani'su agattoen'choma, sefani'su canjaen'choma'qqe aindeccunga canjaen. ⁹Tsa'caen canjaensi majan israe'su Chigane atesian'jen'ttisundeccu Estebain'ccu afacco'fa. Tsa atesian'jen'tti tsu Ccupa'chondeccu Atesian'jen'tti qqen inisecho'cho. Toya'caen majan Cirene'su, Alejandría canqqesundeccu, Cilicia'su, Asia andesundeccu'qqe tisei'ccu afacco'fa. ¹⁰Tsa'ma Chiga Qquendya'pa Estebanma in'jaensi ñotsse atesupa afasi tisei'ccu afaccosundeccuja tisema ti'tsse patsuye osha'fambi. ¹¹Tsa'caen oshambipa cca'indeccunga afepoen'fa cuiintsu Estebane afopoen'faye. Tsonsi tsu qqen afopoen'fa:

—Ingi paña'jen'ni tsu Estebanjan Moisés su'chone egae afa.
Chigane'qqe tsu egae afa.

¹²Tsa'caen afopoen'fasi afepoensundeccuja poiyyi'cco aindeccuma qqejeccoen'fa. Nane coenzandeccuma, Chiga tevaen'jema atesu'chondeccuma'qqe qqejeccoen'fa. Tsa'caen qqejeccopa Estebanga catsepa qquitssa indi'fa. Indipa nasundeccu bo'fa'chonga anga'fa.

¹³Toya'caen tsu afopa'cho cambia afasundeccuma ipa ccutsian'fa. Tsonsi tsendeccuja afopoemba qqen su'fa:

—Anttembeyi tsu va Estebanjan va Chiga etti'ye egae afa'je, toya'caen Moisés manda'chone. ¹⁴Ingija paña'fa tise su'choma tsa Jesús Nasareno'su tsu va Chiga ettima osaeñe tson'jen. Toya'caen Moisés ma'caen tsoñe atesian'choma'qqe catipa tsu faesu atesian'choma atesiaña.

¹⁵Qquen su'fasi nasundeccuja poiyyi'cco tse'tti dyaisundeccu'qqe Esteban cambajuma cambia Chigama sefacconi'su shondo'su cambajia'caen atte'fa.

Esteban candusian'cho

7 ¹Tsomba tse'i Chigama afa'su na'suja Estebama inajampaña:
—¿Ñoe'metsse ti tise'pa su'choja?

²Estebanjan su:

—Ña antiandeccu, ña coenzandeccu, ñama paña'faja: Ingi tayopi'su ccashe'ye Abrahamnga toya Mesopotamia andeni can'jeinte toya Harán andeni jambite ingi ñonccatssia Chiga tsu Tisuma Abrahamnga

attian. ³Tsa'caen attiamba tsu qqen su: “Que andema catipa que antiandeccuma'qqe catipa ña quenga canjaeña'cho andenga jaja.”

⁴Qquen susi Abrahamjan Mesopotamia –tsa Caldea aindeccu andema–catipa Harán andeni ja. Tseni japa can'jensi tise yayaja pa. Tsa'caen pasi Chigaja Abrahamma i va andeni –ingi ja'ño can'jen'cho andeni. ⁵Tsa'ma Chiga Quitsaja ni minga'vieyi'qqe Abrahamnga andema afembi. Tsa'cansi Abraham: “Va andeja ñambe” qqen suye oshambi. Tsa'ma tsa'caen Abrahamnga afembipa Chiga Quitsaja jai'ngae afeya'chone conda. Nane Abraham toya du'shu mechoite Chigaja tsa andema tisenga, tise dutssiyendecunga'qqe afeye su. ⁶Toya'caen tsu Chiga Quitsaja qqen afa: “Que dutssiyendeccu tsu can'jen'faya faesumbe andeni. Tseni can'jen'fasi tsu tseni'su aindeccuja quia'me tsendeccuma semoen'faya. Nane ma'ppipa tsu semoen'faya cuatrociento canqqe'fave.” ⁷Toya'caen tsu su: “Ñajan ccane'qqe tsa semoensundecumbe injama'choma somboeña. Tsomba tse'i gi que dutssiyendecuma somboemba ccase vani iya. Isi tsu tsendeccuja Ñame in'jamba ñajan'faya.” ⁸Qquen supa Chigaja fae'ngae injancco'faya'chone Abrahamnga afa. Qquen afapa ttonoma chhiyitevaemba canjaeña'chove conda. Tsa'caen paña'chopa Abrahamjan tise dutssi'ye Isaacma isusi ocho a'tangae ttonoma chhiyitevaen. Toya'caen Isaac'qqe coemba tise dutssi'ye Jacobma isusi tsa'caeñi tson. Jacob'qqe coemba tsa'caeñi tson tise doce dutssiyendecuma. Tsa doce tsu ingi tayopi'su israe'su ccasheyendeccu.

⁹Tsendeccu tsu tisupa injama'choi'ccu se'pipa tise'pa quinshin Joséma iyicca'ye'fa. Iyicca'yepa Joséma indipa chavaen'fa faesunga cuintsu Egipto andeni angapa semoeñe. Tsa'ma Chiga Quitsa Joséma fuitepa ¹⁰tise vana'jen'choma pasaen. Tsa'caen fuitepa Chiga in'jaensi José osha'choma atesuchosi Egipto'su na'su, Faraónjan tisema in'jan. Nane Faraónjan Joséma in'jamba na'su quini'cco'pave tson. Nane Egipto ande'su governororve, Faraón tsa'o na'suve'qqe tson.

¹¹Tsa'caen dasi qquipoesuiteve da. Pa'cco Egipto andeni vani Canaán andeni'qqe vui'o a'imbipa vana'jen'fa. Nane ingi tayopi'su ccasheyendeccu'qqe tsa'caen me'l'anda jongoesuma tsu an'faya. ¹²Tsa'ma Jacobja “Egipto andeni trigo jin” qqen pañamba me'ttia'ye aisheve Egiptoni ingi tayopi'su coenzandecuma mandamoen. ¹³O'tie chavanga'choma sefaemba ccase ja'fasi tsu Joséja tise'panga tisuma conda. Tsomba Faraón'qqe condasesi tise'qqe atesu José antiandecuma. ¹⁴Tsa'caen condasepa Joséja manda tise quindyandecuma cuintsu tise yaya Jacobma poiyl'cco tise antiandecuma'qqe i'faye. Nane tsendeccuja pa'cco tsu setenta y cinco a'i. ¹⁵Tsa'caen ttu'sesi Jacobja Egipto andeni can'jemba pa. Ingi tayopi'su coenzandeccu'qqe tseni pa'fa. ¹⁶Tsa'caen pa'fasi Siquem canqqueni tise'pa tsu'ttama angapa a'tu'fa. Nane tayopi tsu Abraham tsa fattocco chango atu'ttima chava. Tise corifin'dima Siquemni'su Hamor dutssiyendecunga afepoemba tsa atu'tti changoma chava.

¹⁷Tse'li Chiga Quitsa tayoyi Abrahamnga andema afeye su'cho a'ta tsu tsé napiji. Tsa'caen napiji'ni israendeccuja Egipto andeni can'jemba tsain'bitssi a'live atapa'fa. ¹⁸Tsa'caen atapasi faesu a'li Egipto ande'su na'su Faraónme da. Tsaja Joséma atesumbi'choa. ¹⁹Tsa'camba ingi tayopi'su coenzandeccum'a'qqe chi'gapa patsuye in'jamba tise'pama afopoemba vanae. Nane tsa'caen vanaemba manda tsandie du'shuve isu'ta cuintsu cati'faye a'li panshaen atapasa'ne.

²⁰Tsa'caen manda'je'ni Moisésma isu. Tsave tsu Chiga in'jan'cho. Tsa'cansi tise yaya tsaoni a'tutsse coirapa an'bian'fa tres ccovuve. ²¹Tsa'ma tisema ti'tsse a'tuye oshambipa catisi Faraón onque'nge tisema atepa mende'yepa isupa coeña. Nane tisu du'shuma'caen tsu in'jamba coeña. ²²Tsa'caen coeñansi tsu Moisés pa'cco Egiptosundeccu atesuque'suma atesucho. Nane tsa'caen atesuchopa pa'ccoma afapa tson.

²³Tsomba can'jemba cuarenta canqqe'fave an'biamba Moisésja israe'supa tisu israe aindecuma can'su jaye in'jan. ²⁴Tseni japa israe'suma egipto'su egae tson'jen'choma atte. Attepa israe'suma ccushaemba egipto'suma ccane'qqe egae tsoñe in'jamba tisema fi'tti. ²⁵Nane Moisésja qqen in'jamba tsa'caen tson: “Ñai'ccu tsu Chigaja israendecuma ccushaena. Ña ccushaensi tsu ñajan ccushaen'su qqen in'jan'faya.” Tsa'ma israendeccuja tsa'caen in'jan'fambi. ²⁶Tsomba ccaqui a'ta Moisés atte dos israendeccu iyicco'je'fa'choma. Attepa ñoquiañe in'jamba su: “Que'ija antianaccu'fa qui. ¿Jongoese qui tisupaporaja egae tson'jen'fa?” ²⁷Tsonsi faenga'suma iyiccaye'je'cho Moisésma ccofettamoemba su: “¿Majan tsu quemajan ingi injama'choma somboen'su na'suve tson? ²⁸¿Ñama'qqe ti qui fi'ttiye in'jan cani Egipto'suma fi'ttiqqia'caen?” ²⁹Qquen susi pañamba Moisésja dyopa ccuyapa ja Madián andeni. Tseni japa tseni'su a'ia'caen can'jen. Can'jemba pushepa dos tsandie du'shuve an'bian.

³⁰Tseni'qqe cuarenta canqqe'fave Sinaí cotta'cco pporotsse a'li menia can'jensi Chigama sefacconi'su shondo'suja tisenga attian. Nane si'ngeveyi quini'si anchandasi attian. ³¹Tsa'caen attiansi Moisésja tsama atepa dyopa can'boen. Ti'tsse ñotsse atteye in'jamba catsepa paña Na'su Chiga ³²qqen su'choma: “Ña gi que coenzandeccu'yembe Chiga. Nane Abraham, Isaac, Jacobmbe Chiga gi.” Qquen susi Moisésja ttun'dundu'je'le dyopa cañe oshambi. ³³Toya'caen tsu Na'su Chigaja su: “Shichhaja que sapatoma. Va'tti que ccutsu'ttija Chiga ande tsu. ³⁴Atte gi ña a'li Egiptoni vana'jen'choma. Paña gi tise'pa attuse'je'fa'choma. Tsa'camba gi ji tsendecuma tise'pa vana'jen'cho'ye somboemba ño'faeñe. Ja'ñojan que jija, ña quema mandamoene Egiptoni.”

³⁵Qquen tsu Chigaja Moisésma manda Tisema sefacconi'su shondo'suma afaemba. Nane quini'sie anchanda'choye attiamba ya'caen tsu manda. Israendeccu tayoe Moisésma chi'gapa “¿Majan tsu quemajan ingi injama'choma somboen'su na'suve tson?” qqen su'fasi tsu Chigaja tsaveyi na'su ccushaen'suve tsomba moen. ³⁶Moisésja Egipto andeni

sefani'su agattoen'choma, sefani'su canjaen'choma'qqe canjan'jen. Cu'a Marni'qqe tsa'caen tsomba ingi tayopi'su coenzandecuma Egipto'ye somboemba ccushaen. Toya'caen tsendeccu cuarenta canqque'fave a'i menia can'ljensi Moisésja tsa'caen sefani'su canjaen'choma canjaen.

³⁷Tsa Moisésyi tsu israendecunga su: “Chiga Quitsaja ñama'caeni faesu Chiga Aya'fa afa'suma que'inga moeñe tson'jen que'i antian'suveyi. Tsama paña'faja.” ³⁸Toya'caen ingi tayopi'su coenzandeccu a'i menia can'ljensi tsa Moisés tsu Sinaí ccotta'cconga ansundepa Chigama sefacconi'su shondo'sui'ccu condase. Tsa'caen condasepa tise paña'choma ingi tayopi'su coenzandecunga condase.

³⁹Toya'caen tsu Chiga Aya'fama paña'ma ingi tayopi'su coenzandeccuja Moisésma chi'gapa toe Egiptoni jaye in'jan'fa. ⁴⁰Moisés toya Sinaí ccotta'cconi can'jen'ni tise'paja Moisés quindyá Aarónma su'fa: “Ingimbe ñoñajan chigave cuintsu ingima o'tie angacañe. Nane atesu'fambi gi mingae dapa tsu uta jimbi Moisés, ingima Egipto'ye somboen'suja.” ⁴¹Qquen manda'fasi vaura du'shua'ca'me ñoñamba ccutsian tise'pa chigave. Tsa'caen ccutsiansi ovejama fi'ttipa oque oraen'fa tise'pa in'jansi ñoña'cho chiganga. Nane avuja'fa tise'pa tive'ccu ñoña'cho chigama. ⁴²Tsonsi Chiga Quitsaja tsendecuma catiquia'caen tson cuintsu osha'cho sefacconi'su jincho'choma chigama'caen iñajan'faye. Tsa'cansi tsu tayopi'su Chiga Aya'fama afasundeccuja qqen tevaen'fa:

Israendeccu, que'ija cuarenta canqque'fave a'i menia can'ljemba
¿ñoa'me ñanga ti qui afe'fa que'i osha'choma fi'ttipa afe'choma?

⁴³Me'i, ñanga afe'fambi qui. Tsa'ma tisupa qui chiga'ca'me ñoña'fa
tsanga iñajañe.

Fa'e Moloc qqen inisecho'cho. Tsambe chipiri tsa'oaca'ma qui opipa
angapa iñajan'fa.

Faesuja o'fea'ca'on, Renfán qqen inisecho'cho.

Tsa'caen que'i tisu ñoña'choma iñajan'ninda gi que'ima somboeña
que'i ande'ye.

Nane somboemba gi Babilonia ande joccani que'ima moeña.

⁴⁴Ingi tayopi'su coenzandeccuja a'i menia can'ljemba Chiga a'ima cachuicco'je'cho carpa tsa'ove an'bian'fa. Tsamajan Chiga Moisésma manda cuintsu tise canjaenquia'caen ñoñañe. Tsa'caen mandasi tsu Moisés tsa'caen ñoña. ⁴⁵Tayopi'su coenzandeccu pa'fasi tise'pa dushundeccu Josuéi'ccu va andeni jiji'fa. Tsa'caen ji'fasi Chiga Quitsaja va andeni can'ljensundecuma joquitssian cuintsu ingi coenzandeccu tise'pa andema itsapa can'jen'faye. Toya'caen tsa'caen jipa Chiga a'ima cachuicco'je'cho carpa tsa'oma'qqe i'fa. Tsa'caen ipa tsu toya David can'jeinte an'bian'fa. ⁴⁶Chiga Quitsa Davidma in'jansi Davidja ccane'qqe tise Chiga, tayopi'su coenza Jacobmbe Chigave in'jamba jo'su tsayi can'jeña'cho tsa'ove tsao'ñañe in'jan. Tsa'caen in'jamba Chigama iñajan cuintsu tise ñoñañe antteye. ⁴⁷Tsa'caen iñajansi Chiga se'pisi David dutssi'ye Salomónjan omboe Chiga tsa'ove tsao'ña.

48 Tsa'ma sefani'su Chigaja a'i tsa'o'ña'cho tsaoni can'jembi. Nane Chiga Aya'fama afa'suja qquen tsu su:

49 Sefacconi tsu ña dyaipa'cho. Andeta tsu ña tsuicho'cho.

¿Mingatssia tsa'ove qui ñambeja tsa'o'ña'faya? qquen tsu Na'suja su.

Toya'caen tsu su: In'jambi gi mani ño'faye.

50 ¿Ña tivei'ccu pa'cco osha'choma agattoembi'a ti gi?

51 Tsa'ma que'ija toyayi qui injama'choi'ccu in'jan'fambi.

Tsonsinai'ccu'qqe pañambipa qui injama'cho'qqe atesumbindeqquia injama'choa'cañi'fa. Toyayi qui Chiga Qquendya'pama pañambiqquia'caen in'jan'fambi. Ñoa'me qui tayopi'su a'ia'cañi'fa. 52 Chiga Aya'fama afa'sumajan ¿majameñi'qqe tsu tayopi'su coenzandeccuja egae tsonbe can'fambi? Tayoe Chigambe Ño'a jiy'a'chone condasesi coenzandeccuja tsa condasesundecuma fi'tti'fa. Ja'ño tsa Ño'a jisi que'i'qqe tisema chi'gapa nasundecunga afepa fi'tti'fa. 53 Que'ija Chigama sefacconi'su shondosundeccu afasi Chiga manda'choma isu'a'qqe toya qui paña'fambi.

Estebanma fi'tti'fa'cho

54 Esteban tsa'caen susi pañamba ti'tsse ttun'dundu'jeve iyicca'ye ccutsu'fa. 55 Tsa'ma Estebanjan Chiga Qquendya'pa tisema ñotsse in'jaensi sefacconima cambia ñoa'me Chiga osha'cho ñotssiama atte. Jesúsma'qqe atte Chiga tansinfani ccutsu'choma. 56 Tsa'caen atepa su:

—¡Can'faja! Atte gi sefacco fettaye'choma. Sefaccone Ji'cho A'i'qqe Chiga tansinfani ccutsu'choma gi atte.

57 Tsa'ma Esteban qquen susi aindecuaja pañañe in'jambipa tsonsinama piccopa quia'me fundopa butto catse'fa Estevanga. 58 Tsa'caen catsepa qquitssa panshan anga'fa canque jocani. Tseni angapa patui'ccu tisema ttovaccoen'fa. Tsa'caen ttovaccoen'jemba afopa'cho cambia afasundeccuja tise'pa omba'su ondiccu'jema oshichha afe'fa fae tsandie chu'anga cuintu coira'jeye. Tsa tsandie iniseja Saulo. 59 Toya patui'ccu tsa'caen ttovaccoen'jen'fani Estebanjan Chigama inajamba su:

—Na'su, Jesús, isuja ña qquendya'pama.

60 Qquen supa ccaru dyaipa quia'me fundopa afa:

—¡Na'su va fi'ttisundecunga shacama anttejama!

Qquen supa tsu pa.

Saulo Jesúsve in'jan'chondecuma noñangiañe ashaen

8 1 Tsa'caen fi'tti'fasi tsa Saulo'qqe fae'ngae tsendeqquia'caen in'jan. Tsequi a'ta tsa'caen tsomba ñoa'me iyicca'yepa mandiañe ashaen'fa Jerusaléni'su Jesúsve in'jan'chondecuma'qqe. Tsa'cansi poi'yi'cco dyopa ccuyapa jaja'fa. Majanjan Judea andeni, majanjan Samaria andeni'qqe jaja'fa. Nane tsa doce Jesúsne afasundeccuji tsu toya Jerusaléni can'jen'fa. 2 Tsa'ma tsa'caen ccuya'fasi majan Chigave in'jan'chondecuaja Estebanma mende'yepa a'tu'fa. Tsa'caen a'tupa tsain'bitsse i'na'fa Estebane.

³Toya'caen Jesúsve in'jan'chondeccuma iyicca'yepa mandian'jen'fasi Saulo'qqe fae'ngae mandian'jen. Faesu tsa'o, faesu tsa'onga ca'nimba tsandie pushesuma'qqe indipa angapa piccoje'cho ettinga picco.

Samariani ñotsse condase'cho

⁴Tsa'ma majan Jerusaléne ccuyapa mani ja'a'qqe toyayi Chiga Aya'fa ñotsse condase'choma condase'fa. ⁵Tsa'camba Felipeja Samaria ande'su canqueni japa Cristone condaseye ashaen. ⁶Tsonsi aindeccuja bopa Felipe afa'je'choma paña'jen'fa. Sefacconi'su canjaen'choma'qqe canjaensi tsama atepa fae injama'choa'caeni in'jamba paña'fa tise su'choma. ⁷Nane majan cocoya ca'ni'chondeccuma ccushaensi tsendeccu'ye cocoya'qqe fundopa somboin ja. Toya'caen tsain'bio ccutsumbindeccu, ccareshendeccuma'qqe Felipeja ccushashaen'jen. ⁸Tsa'caen tsonsi tsa canque'su aindeccuja avujatssi'fa.

⁹Tseni tsu can'jen fae tsandie tise inise Simón. Tsaja tayopi coragave dapa poiyl'cco samariasundeccunga mágicoa'caen canjan'jen. Tsa'caen canjan'jemba tisuja joccapitssia a'i qqen tsu aindeccuma in'jaen. ¹⁰Nane toya Felipe jimbi'te poiyl'cco a'i majan ti'tsse'tssia, majan utu'cco Simón su'choma ñotsse paña'fa. Pañamba tisema qqen su'fa:

—Va tsandieja Chiga'caeni tsu osha'choma oshacho.

¹¹Tsa'caen in'jamba tsain'bitssi canque'fave tise su'choma paña'fa. Nane Simónjan mágicopa tsa'caen canjaensi Samariasundeccuja tsama can'boemba tisema ñotsse paña'fa. ¹²Tsa'ma Felipe jipa Chiga aindeccuve daya'chone toya'caen Jesucristove in'jaña'chone'qqe condasesi tsendeccuja pañamba in'jan'fa. Tsa'caen Jesucristove in'jamba tsandiendeccu, pushesundeccu'qqe fetiye'fa. ¹³Toya'caen Simón'qqe Cristove in'jamba fetiye. Fetiyeja Felipe'ccu fae'ngae jacañe ashaen. Sefani'su canjaen'cho, sefani'su agattoen'choma'qqe atepa can'boemba asi'ttaen.

¹⁴Tsa'caen da'fasi Jerusaléni can'jen'cho Jesúsne afasundeccu paña'fa Samariasundeccu Chiga Aya'fama paña'jen'fa'choma. Tsa'caen pañamba Pedro, Juanma'qqe tseni mandamoen'fa. ¹⁵Tsonsi japa Samariani napipa Chigama iñajan'fa Samaria'su Jesúsve in'jan'chondeccune cuintsu Chiga Qquendya'pa tsendeccunga ca'niñe. ¹⁶Nane Chiga Qquendya'paja toya majangayi'qqe tseni'su a'inga ca'nimbisi aqqiayi Na'su Jesús a'ive dapa fetiye'fa'cho. ¹⁷Tsa'cansi Pedro, Juan'qqe Chigama iñajamba tivei'ccu tsendeccuma pporaensi tse'faei'ccuyi Chiga Qquendya'paja tsendeccunga ca'ni.

¹⁸Tsa'caen Jesúsne afasundeccu tise'pa tivei'ccu a'ima pporaensi Chiga Qquendya'pa ca'nisi atepa Simónjan corifin'dima afepoeñe in'jamba ¹⁹su:

—Ñanga'qqe atesian'faja ma'caen qui osha'choma oshacho. Ña'qqe quia'caeni tsoñe gi in'jan majanga ña tivei'ccu pporae'ninda cuintsu Chiga Qquendya'pa tsanga ca'niñe.

²⁰Tsonsi Pedroja su:

—¡Cuintu catiyeja que corifin'di'qqe quei'ccu fae'ngae! ¿Jongoesie qui in'jan Chiga afe'choma corifin'di'ccu chavaye? ²¹Que injama'chota qui shacapa Chigane. Tsa'camba qui queja vama isuye oshambi. ²²Que egae tsincon'choma antteja. Na'su Chigama ñajanjan atesuye que injama'cho egae in'jan'choma tsu joqqittsian'me'se. ²³Nane atte gi queja injama'cho mechoa qui egae tsincon'cho quema patsupa indichosi.

²⁴Qquen susi Simónjan su:

—Na'su Chigama ñajanjan'faja ñane que suquua'caen ña dasa'ne.

²⁵Tsonsi Pedro, Juan'qqe Chiga tson'jen'chone condapa Chiga Aya'fama tansintsse condasepa Samaria'su faesu canquenga'qqe japa Jesúsne ñotsse condase'choma condase'fa. Tsa'caen cca'tti cca'tti condasepa toequi Jerusaléni ja'fa.

Felipe Etiopía'su a'inga condase

²⁶Tsonsi omboe Chigama sefacconi'su shondo'su Felipenga jipa su:

—Jangipa ccani jaja Gaza canqueni ja'je'cho tsaiquingae –tsa Jerusaléne ande'jeni.

Tsa tsaiqui tsu a'i menianga'e ja'cho. ²⁷Felipe pañamba jangipa tsaiqui'ye jayipa Etiopía ande'su a'ima cachui. Tsa tsu onoco, joccapittsia a'i. Tise na'suja Etiopía ande na'su pushesu, Candase, qqen inisecho'cho. Onocoja na'sumbe corifin'dima coira'su. Tsa tsu Jerusaléni Chigama ñajañe ja'ngapa ji'je. ²⁸Cavayo carongae toequi dyai jiñamba tayopi'su Chiga Aya'fama afa'su Isaías tevaen'jema cambia afá jiña. ²⁹Tsonsi Chiga Qquendya'pa Felipenga su:

—Tsa caronga catsepa pporotsse jacanjan.

³⁰Tsonsi Felipeja butto catsepa tise Isaías tevaen'jema cambia afa'je'choma paña. Tsa'caen pañamba ñajampaña:

—¿Paña ti qui que cambia afa'je'choma?

³¹Tsonsi tsa tsandieja su:

—¿Ma'caen gi pañaña majan ñanga condambian'jan?

Qquen supa Felipema ttu'se caronga ansundepa tisei'ccu dyaiye.

³²Tise Chiga Tevaen'jema cambia afa'je'choja qqen:

Ovejama'caen fi'ttiye anga'fa.

Oveja tise tosema chattu'je'fasi ayafambie daquua'caeni tise'qqe afambi.

³³Cca'indeccuja tisema patsupa ñoa'me su'choma tta'tta'fambi.

¿Majan tsu tise a'ine condaseya?

Nane tisema fi'ttisi tsu tsangae va ande'ye ja.

³⁴Qquen cambia afapa onocoja Felipema ñajampaña:

—Chigáne ñanga condaja. ¿Majane tsu qqenjan conda? ¿Toe Chiga Aya'fama afa'sune ti? ¿Tsambi'ta ti faesune?

³⁵Tsonsi Felipeja tise Chiga Tevaen'jema canjan'jen'ttie ashaemba Jesúsne ma'caen jincho'choma conda. ³⁶Tsa'caen condasepa tsaiquingae jayipa singu'ccuma atte'fa. Attepa onocoja su:

—Va'tti tsu singu'ccuja jin. ¿Ñama fetiye'ta ti ñotssi?

³⁷Tsonsi Felipeja su:

—Pa'cco injama'choi'ccu Jesúsve in'jan'da fetiye'ye tsu ñotssi.

Tsonsi tsandieja su:

—In'jan gi Jesucristoja Chiga Dutssi'ye.

³⁸Qquen supa caroma zuña ccuiñañe manda. Tsomba Felipe, onoco'qqe sombopa singu'ccuni andin japa cca'ya ccutsu'fa. Tsomba Felipeja onocoma feti. ³⁹Fetipa singu'ccuye sombo'fasi Chiga Qquendya'pa Felipema ccani anga. Tsa'caen angasi onocoja Felipema ccatsse attembi'ma avujatsse tsaiqui'ye ja. ⁴⁰Toya'caen Felipeja Chiga Qquendya'pa tisema angasi Azotoni attian. Tse'ttinga attiamba faesu canqqe faesu canquenga Jesúsne ñotsse condase'choma condasé jacan Cesarea canquenga napiya'ngae.

Jesús Saulonga attian'cho

(Tson 22.6-16; 26.12-18)

9 ¹Felipe tsa'caen tson'jen'ni Sauloja toya iyiccaye'jepa Na'su Jesúsve in'jan'chondecuma fi'ttiye in'jamba Chigama afa'su na'suni ja. ²Japa a'ima indiya'cho tevaen'jeme iñajan Damasco canqqe'su israe Chigane atesian'jen'ttinga angapa canjaeñe. Tsa tevaen'jen tsu manda cuintsu Sauloma antte'faye Jesúsve in'jan'chondecuma indiye. Nane tsa'caen in'jan'chondecuve'yi tta'ttapa indipa, majan tsandie, majan pushesuma'qqe Jerusaléni candenai'ccu tandamba iye antte'faye tsu manda. ³Tsa'ma Saulo toya tsaiqui'ye jayi'ni Damasonga ca'tsa napiji'ni sefaccone pa'cconga chanjunquia'caen tsu tisenga attian. ⁴Tsa'caen attiansi Sauloja andenga amppipa qqen su'choma paña:

—Saulo, Saulo, ¿jongoesie qui ñama noñangiamba mandiancan?

⁵Qquen susi Sauloja iñajampaña:

—Na'su, ¿majan qui queja?

Tsonsi sefane afa'je'choja su:

—Ñanda gi Jesús, que noñangiamba mandiancan'cho. Queja ñama in'jangae tsincomba qui tsuma bove iñaccaen. Nane na'su quiccu'je'chonga vaura tsuipa tsuma ti'tsse iñaccaenquia'caen qui tsuma bove iñaccaen.

⁶Tsa'caen pañamba Sauloja ttun'dundu'jeve dyopa su:

—Na'su, ¿ma'caen ña tsoñe qui in'jan?

Tsonsi na'suja su:

—Jangipa jaja canqueni. Tseni que jasi tsu quenga condaseya ma'caen tsoña'chove.

⁷Tsa'caen tson'jen'ni'qqe Sauloi'ccu fae'ngae jacansundecuja dyopa afambe'yi ccutsu'fa. Afa'choma paña'ma a'live atte'fambi. ⁸Tsonsi Saulo jangi ccutsupa bitta cambia atteye oshambi. Tsa'caen dasi tisei'ccu jacansundeccu tive'ye fendepa anga'fa Damasco canqueni. ⁹Tseni angasi biniñi tres a'tave can'jen. Ambe'yi ni cu'imbitsseyi can'jen.

¹⁰Tse'tti Damasconi tsu can'jen fa'e Jesúsve in'jan'cho, tise inise Ananías. Tsanga attiamba Na'su Jesúsja su:

—¡Ananías!

—Ju, Na'su.

Qquen pañamba susi ¹¹Na'suja su:

—Junde jaja “Tansintssia Tsaiqui” qquen inisian'cho tsaiqui'ye. Judas tsaoni japa inajampañajan Tarso canqqe'su Saulove. Tiseja ja'ño Chigama inñajan'jen. ¹²Tayo tsu atte attian'choma. Quema tsu atte, Ananías, cuartonga ca'nimba tivei'ccu tisema ppöraensi ccase tso'feja bitta.

¹³Tsama pañamba Ananíasja su:

—Na'su, tsa a'inenda tsu ñanga condase'fa. Tiseja osha'cho egae tsincon Jerusaléni'su queve in'jan'chondeccuma. ¹⁴Va'ttiqqe Chigama afa'su nasundeccu indiye manda'cho tevaen'jema tsu an'bian poiya'cco queve in'jan'chondeccuma indipa candenai'ccu tandamba angaye.

¹⁵Tsa'ma na'suja Ananíasnga su:

—Dyombe jaja. Tsa Saulo tsu ña in'jan'cho, cca'indeccunga ñane condase'su. Tise'pa nasundeccunga'qqe, toya'caen israendeccunga'qqe tsu ñane condaseya. ¹⁶Ña gi Saulonga canjaeñe cuintsu tise'qqe me'detsse vanañe ñane afa'je'ta.

¹⁷Qquen susi Ananíasja japa Judasmbe tsa'onga ca'nimba tisu tivei'ccu Sauloma ppöraemba su:

—Antian Saulo, que tsaiqingae ji'je'ni attian'cho, Na'su Jesús, tsu ñama'qqe manda queni jiye. Mandasi gi ji cuintsu que tso'fe bittasi Chiga Qquendya'pa quenga ca'niñe.

¹⁸Tse'faei'ccuyi tso'fe'ye tsupiriaca'en batti shequesi Sauloja ccase atteye osha. Tsomba jangipa japa fetiye. ¹⁹Toya'caen tse'i añachoma amba ccase quinsetssia've da. Tsomba Damasconi'su Jesúsve in'jan'chondeccui'ccu re'riccoe can'jen.

Saulo Damasconi candusian'cho

²⁰Can'jemba junde Sauloja Jesúsne candusiañe ashaen Damasconi'su Chigane atesian'jen'ttinga. Candusiamba “Jesúsja Chiga Dutssi'ye” qquen tsu condase. ²¹Qquen condase'jesi poiya'cco pañasundeccu asit'aemba su'fa:

—¿Va tsandie'ta ti Jerusaléni'su Jesúsve in'jan'chondeccuma fi'ttiye mandian'can'sumbi'a? ¿Toeyita ti vanisundeccuma'qqe indipa Chigama afasundeccunga angapa afeye jimbi?

²²Tsa'ma Sauloja ñoa'metsse candusiamba “Jesúsja Cristo, Chiga In'jan'cho” qquen tansintsse canjaemba Damasco'su israendeccuma patsupa ziyaen.

Sauloma fi'ttiye in'jansi ccusha'cho

²³Bo'tsse candusian can'jensi poiya'cco israendeccu fae'be injama'choa'caeni in'jamba Sauloma fi'ttiye in'jan'fa. ²⁴Tsa'caen

in'jan'fa'choma Sauloja tayo atesu. Nane pa'cco cose pa'cco a'ta israendeccuja canqqe sombo'ttinga Saulove ronda'je'fa tisema fi'ttiye. ²⁵Tsa'ma cose Cristove in'jan'chondeccu Sauloma rande saporonga dyañamba a'tutsseyi canqqema patui'ccu ttu'cho joccafanga andian'fa cuintsu ccani jaye.

Saulo Jerusaléni can'jen'cho

²⁶Sauloja Jerusaléni japa faenga'su Jesúsve in'jan'chondeccunga piye in'jansi tsendeccuja dyojopa in'jan'fambi. Nane Sauloja aquia Jesúsve in'jan'quua'caen afopoen qquen in'jamba tsu tisema dyojo'fa. ²⁷Tsa'ma Bernabé Sauloma anga Jesúsne afasundeccuja cuintsu cachuiccoye. Tsa'caen angapa Bernabéja pa'tssima conda ma'caen tsaiqui'ye jayisi Na'su Jesús Saulonga attiamba conda'choma, ma'caen Saulo'qqe dyombi'tsse Damasconi Jesúsne condase'choma. ²⁸Tsa'caen condasesi Sauloja Jerusaléni can'jemba fae'ngae jacan Jesúsne afasundecui'ccu. ²⁹Tsa'caen jacamba dyombi'tsse Saulo'qqe condase Na'su Jesúsne. Tiseja griegongae afa'je'cho israendecui'ccu afaccopa condase. Tsa'caen tise'pai'ccu condasesi tsendeccuja iyicca'yepa Sauloma fi'ttiye in'jan'fa. ³⁰Tsama attepa faenga'su Jesúsve in'jan'chondeccuja Sauloma anga'fa Cesarea canqueni. Tse'ttie mandamoen'fa Tarso canqueni.

³¹Tsonsi tse'i poi'ccu Jesúsve in'jan'chondeccu, Judea'su, Galilea'su, Samariasundeccu'qqe ñotsse dyombi'tsse canse'fa, faesu tsendecuma noñangiamba mandian'cambisi. Tsa'caen can'jemba tise'pa Jesúsve in'jan'choma ti'tsse'tsse in'jamba Na'su Chiga Quitsama dyoe'sui'ccuyi pañamba tsa'caen ñotsse canse'fa. Taya'caen Chiga Qquendya'pa fuitesi ti'tsse'o a'i tsu Jesúsve in'jan'fa.

Lida canqqe'su Eneas ccusha'cho

³²Tsonsi Pedro poi'ccu faengasundecuma can'su jacamba Lida canqqe'su Jesúsve in'jan'chondeccuma'qqe can'su ja. ³³Tseni japa fae a'i, Eneas, qquen inisecho'choma cachui. Tsa a'ija ishopa pajipa ocho canqqe'fave ana'jen'choniñi ccuicho. ³⁴Tsama attepa Pedroja su:

—Eneas, Jesucristo tsu quema ccushaen. Jangipa que ana'jen'choma onccanjan.

Tse'faei'ccuyi Eneasja ccushapa jangi ccutsu. ³⁵Tsa'caen ccushasi attepa poi'ccu Lida canqqesundeccu Sarón canqqesundeccu'qqe tise'pa tayopi in'jan'choma anttepa Na'su Jesúsve in'jan'fa.

Dorcas pasi ccase qquendyaen'cho

³⁶Lida canqqei'ccu pporotsse, Jope canqueni Jesúsve in'jan'cho pushesu, Tabita, qquen inisecho'cho, can'jen. Griegongae tise iniseja, Dorcas. Tsa pushesuja faengasundecuma ñotsse in'jamba fuitesepa canse. Osha'choma mendequiangas afeye atesu'cho. ³⁷Tsequi a'ta Dorcasja pave dapa pa. Tsonsi

tise ai'voma onjoemba sefani'su cuartonga ansundiamba ccuiña'fa. ³⁸Tsomba Pedro pporotsse, Lidani can'jen'choma pañamba Jesúsve in'jan'chondecuja dos a'ima mandamoen'fa cuintsu ttusengaye. Tsonsi jipa su'fa:

—Chigáne, utatsse ingi'ccu jija.

³⁹Qquen su'fasi Pedro jangipa tsendecui'ccu ja. Jopeni napisi tsaoni ca'nimba a'ija Pedroma anga'fa sefani'su cuartoni, pa'cho ccuini. Tsonsi poiya'cco tsandupajen'chondecu Pedronga catsepa i'na'fa. Tsa'caen catsepa canjaen'fa osha'cho conto, ondiccu'jema'qqe, Dorcas canseite anchomboemba afe'je'choma. ⁴⁰Tsonsi Pedroja cuarto'ye poiya'ccoma somboemoemba ccarupa Chigama iñajan. Iñajan nanimba pa'cho ai'voma cambia su:

—Tabita, jangija.

Qquen susi Tabitaja qquendyapa bitta can. Bitta cambia Pedroma atepa jangi dyai. ⁴¹Jangi dyaisi Pedroja tive'ye indipa qquitssa jangiamba ccutsian. Tsomba poiya'cco Jesúsve in'jan'chondecuma, tsandupajen'chondecuma'qqe ttu'sepa canjaen Tabitama, ccase qquendya'choma. ⁴²Tsa'caen ccushaen'choma poiya'cco Jope canqqe'su a'i paña'fa. Tsain'bio a'i pañamba Na'su Jesúsve in'jan'fa. ⁴³Tsomba Pedroja Jopeni bo'tsse can'jen Simón tsaoni. Simón tsu ttonoma qqe'shopa ñoña'su.

Cornelio Pedroma ttu'se'cho

10 ¹Sundaro capitán tsu can'jen Cesarea canqueni, Cornelio qquen inisecho'cho. Tise sundarondecuja Italiano Sundarondecu qquen inisecho'cho. ²Cornelio poiya'cco tise tsaoni can'jensundecuu'qqe Chigave in'jan'fa. Tiseja dyoe'sui'ccu Chigama in'jamba paña. Se'pimbe'yi tsu osha'choma afeye atesu israendecunga. Poi a'ta tsu Chigama iñajan'jen. ³Tsa'camba fae a'ta tayo ondusesi Cornelioja attian'choma atte. Chigama sefacconi'su shondo'su tise cuartonga ca'nisi tsu atte. Tsa'caen attiamba su: —¡Cornelio!

⁴Qquen susi Cornelioja dyopa Chigama sefacconi'su shondo'suma can'boemba iñajampaña:

—Na'su, ¿jongoesu qquen qui in'jamba ji?

Tsonsi Chigama sefacconi'su shondo'suja su:

—Chiga Quitsa tsu ñotsse pañamba in'jan que iñajan'choma. Ñotsse tsu atepa in'jan que ñotsse se'pimbe'yi mendequianganga afe'choma.

⁵Mandaja a'ima Jope canqueni Simón Pedro, qquen inisecho'choma cuintsu ttu'sengaye. ⁶Tsata tsu can'jen faesu Simón ettini, tsa ttonoma qqe'shopa ñoña'sui'ccu. Tsambe tsa'oja mar otafani. Pedro tsu quenga condaya ma'caen tsoña'chove.

⁷Chigama sefacconi'su shondo'su jasi Cornelioja ttu'se dos tisema coirasundecuma. Toya'caen fae sundaroma'qqe ttu'se. Tsa sundaroja Cornelioma shondo'supa tise'qqe Chigave ñotsse in'jan'cho. ⁸Tsa'caen

ttu'sepa Cornelioja pa'tssima condapa Jope canqueni tsendeccuma mandamoen.

⁹Ccaqui a'ta mandasi ja'chondeccu toya tsaiqui'ye jiñamba ca'tsa Jope canqueni napiji'fa'ni Pedroja tsa'o tansinfani'su ppappaconga ansunde Chigama iñajañe tayo enttinge a'tave dasi. ¹⁰Chigama iñajan'jemba qquipo'e'supa aña in'jan. Tsa'ma toya tise'be shoccoen'jen'ni Pedroja ayo'oqquia'caen attian'choma atte, ¹¹sefacco fettaye'choma. Tsa'caen fettayesi randeje'a sarupama cuatro suivo'fai'ccu tandandusiamba andian'fa'choma atte. ¹²Tsa sarupani tsu sheque osha'cho aña'cho – anque'su, toya'caen an'masia'qqe. Tsu'tte, tivei'ccu jacanque'su, osha'cho andeye manguqqe'su, osha'cho sefane chhajepa jacanque'su tsu sheque. ¹³Tsa'caen attiansi Pedroja afa'choma paña qqen su'choma:

—Pedro, jangipa fi'ttipa anjan.

¹⁴Tsa'ma Pedroja su:

—Me'i, Na'su, in'jambi gi. Minga'ni'qqe gi ambi tsa'caen an'masia aña'chomaja.

¹⁵Tsonsi afa'je'choja ccase afa'pa su:

—Que atte'choja anque'su tsu. Chiga Quitsa “Tsa aña'choja ñotssi” qqen su'ninda ¿jongoesie qui asettu'je?

¹⁶Tres se tsa'caen Pedronga attiamba pa'cco sarupa toequi sefacconi ansunde. ¹⁷¿Jongoesune tsu attian? qqen Pedro toya asi'ttaen'jen'ni Cornelio aindeccuja jipa tsotefasu sombo'ttini ccutsu'fa. Nane tsendeccuja Simón tsa'ove iñajampañamba ji'fa. ¹⁸Tsa'onga napipa quia'me afa'je'fa:

—¿Ñoa'me ti vani Simón Pedro qqen inisecho'chota can'jen?

¹⁹Pedro toya attian'choma asi'ttaen'jen'ni Chiga Qquendya'pa tisenga conda:

—Tres a'i tsu queve tta'tta'je'fa. ²⁰Jangipa andepa dyombe'yi tsendeccui'ccu jaja. Nane ña gi tsendeccuma manda queve ttu'seye.

²¹Tsonsi Pedroja ande Cornelio manda'cho aindeccu ccutsu'fani. Andepa qqen su:

—Ña gi que'i tta'tta'je'cho. ¿Jongoesie in'jamba qui ji'fa?

²²Tsendeccuja su'fa:

—Capitán Cornelio mandasi gi ji'fa. Tiseja ño'a a'i. Chigave in'jamba dyoe'sui'ccu Tisema pañamba canse. Poiyi'cco israendeccu'qqe tisema ñotsse in'jan'fa. Tsa ño'a Chigama sefacconi'su shondo'su tsu Cornelioma manda cuintsu quema ttu'sesi queja tise tsaoni japa afasi tiseja que su'choma pañañe.

²³Tse'i Pedroja su:

—Jipa ja'ño cose vani ana'faja.

Ana atapa Pedro tsendeccui'ccu fae'ngae ja. Faesu Jope canque'su Jesúsve in'jan'chondeccu'qqe fae'ngae jaja'fa.

²⁴Ccaqui a'ta napi'fa Cesarea canqueni. Cornelioja tise antiandeccu, tise ñotsse in'jan'cho amigondeccuma'qqe ttu'sepa ronda'je'fa.

²⁵Tsa'caen ronda'jepa Pedro tsa'onga napisi Cornelioja sombopa cachui.

Cachuipa Pedronga ccarupa Chigama ñajanqquia'caen ñajan. ²⁶Tsa'ma Pedroja tise ma qquitssa jangiamba su:

—Ccutsuja. Ña'qqe quia'caen, aqquia a'iyi gi.

²⁷Condasé ca'nimba atte'fa tsain'bitssi a'i bojin sheque'fa'choma.

²⁸Attepa Pedroja su:

—Que'ija atesu'fa qui israendeccuja asettu'chopa pa'o israembindequiai'ccu boye osha'fambi. Ni cca'imbe tsa'onga'qqe ca'niñe osha'fambi. Tsa'ma Chiga Quitsa ñama atesiansi gi in'jan majameñi'qqe ega qqen su'masia. ²⁹Tsa'camba gi que ttu'sesi isha'qqe afambe'yi ji. Tsa'camba gi atesuye in'jan, ¿jongoesie qui ñama ttu'se'fa?

³⁰Tsonsi Cornelioja su:

—Tayo tsu cuatro a'ta pasa ña atte'cho. Qquia'ni gi toya ambe'yi sime Chigama ñajaña'cho hora napisi ñajan'jemba atte a'ima. Tise ondiccujaja chhariccotssi. ³¹Tsa tsu ñama su: “Cornelio, Chiga Quitsa tsu ñotsse pañamba in'jan que ñajan'choma. Ñotsse tsu attepa in'jan que ñotsse se'pimbe'yi mendequianganga afe'choma. ³²A'ima mandaja Jope canqueni Simón Pedro, qqen inisecho'choma, cuintsu ttu'sengaye. Tsata tsu can'jen faesu Simón ettini, tsa ttonoma qqe'shopa ñoña'sui'ccu. Tsambe tsa'oja mar otafani. Pedro jipa tsu quei'ccu afaya.” ³³Qquen pañamba gi junde mandamoen queve tta'ttangaye. Ñotsse qui queja vani ji. Ja'ñojan ingi poi'cco gi va'tti can'jen'fa. Chiga Quitsa'qqe tsu va'tti can'jen. Tsa'camba gi pañañe in'jan'fa pa'cco osha'cho jongoesuma Na'su Chiga quenga manda'choma.

Pedro Cornelio tsaoni afa'cho

³⁴Tsonsi Pedroja afaye ashaemba su:

—Ja'ño gi atesu Chiga Quitsaja israendeccuveyi in'jambi. Tsa'ma poi'cco israembindequiamaqque tsu in'jan. ³⁵Nane poi'cco majan dyoe'sui'ccu Tise've in'jamba cans'e'fa'ñijan ccane'qqe tsu Chigaja tise'pama in'jan.

³⁶Chiga Quitsa tsu israendecunga conda va ñotsse condase'choma ma'caen Jesucristoja a'i injama'choma ñoquian'suve. Tsa Jesús'yi tsu poi'ccombe na'su. ³⁷Que'i'qqe tayo paña'fa pa'cco Judea ande'ye ma'caen da'choma. Nane Galileani tsu ashaen Juan candusiamba feti'cho nanisi. ³⁸Toya'caen qui paña'fa ma'caen Chiga Quitsaja Tise Qquendya'pai'ccu Jesús Nasareno'suma in'jaensi tiseja ñotsse tsoñe jacamba poi'cco cocoya na'su vanaen'jendecuma ccushaen. Chiga tisei'ccu can'jensi Jesúsja tsa'caen tson.

³⁹Ingija attepa condasundeccu gi pa'cco Jesús ma'caen tson'choma Judea andeni, Jerusalén canqueni'qqe. Tsa'caen jacansi tsu tsendeccuja Jesúsma avuja'cconga otipa fi'tti'fa. ⁴⁰Tsa'caen fi'tti'fasi Chiga Quitsaja tres a'tangae ccase Jesúsma qquendyaen. Tsa'caen qquendyaemba inginga attian. ⁴¹Nane poi'cco a'inga attiambipa ingingayi tsu attian. Jesús toya pambi'te Chigaja ingima ttu'se tise afa'suve. Tsa'cansi ingija Jesús papa

ccase qquendyasi tisei'ccu amba cu'l'fa. ⁴²Tsonsi Chiga Quitsaja ingima manda a'inga candusiamba qquen condase'faye: “Chigaja Jesúsma na'suve tson cuintsu cansendeqquiambe injama'choma, toya'caen pa'chondeccumbe injama'choma'qqe somboeñe.” ⁴³Toya'caen tayopi'su Chiga Aya'fama afasundeccu'qqe Jesúsne afapa su'fa: “Poiyi'cco majan tise've in'jan'chondeccu tise a'live dasi tsu Chiga Quitsaja tise'pa egae tsincon'choma joqquttsiaña.”

Chiga Qquendya'pa israembindeqquianga ca'ni'cho

⁴⁴Toya Pedro afa'je'ni Chiga Qquendya'paja poiyi'cco tise ma pañasundeccunga ca'ni. ⁴⁵⁻⁴⁶Tsa'caen ca'nisi faesu aya'fangae afapa Chigama ñotsse afa'fa. Tsonsi Pedroi'ccu ji'cho Cristove in'jan'cho israembindeccuja atepa can'boen ccutsu'fa. Nane ¿Chiga Qquendya'pa ti israembindeqquianga'qqe ca'ni? qquen in'jamba can'boen ccutsu'fa. Tsonsi Pedroja su:

⁴⁷—Tayo ingia'caen Chiga Qquendya'pama isu'fa'ninda ¿ma'caen gi se'pi'faya va aindeccu fetiye'ya'chone?

⁴⁸Tsa'caen supa manda cuintsu tayo Na'su Jesucristo a'live da'ta fetiye'faye. Qquen susi poiyi'cco a'i fetiye'pa Pedroma su'fa cuintsu boyi a'ta tise'pai'ccu can'jeñe.

Pedro Jerusaléni condase'cho

11 ¹Tsonsi Jesúsne afasundeccu, toya'caen Judea ande'su Jesúsve in'jan'chondeccu'qqe paña'fa israembindeqquia'qqe Chiga Aya'fama pañamba in'jan'fa'choma. ²Tsa'caen paña'jen'fani Pedro toequi Jerusaléni jisi manda'choma toya in'jan'chondeccu Pedroma iyu'upa ³su'fa: —¿Jongoesie qui israembindeqquiama can'su japa tsendeccui'ccu fae'ngae an'fa?

⁴Tsonsi Pedroja pa'tssi ma'caen tseyi tson'choma condaseye ashaemba qquen su:

⁵—Ña Jope canqueni can'jemba Chigama ñajan'jemba gi attian'choma atte. Sefaccone randeje'a sarupama cuatro suivo'fai'ccu tandandusian'cho tsu ñanga ande. ⁶Andesi ñotsse cambia gi osha'cho ingi an'masia aña'choma atte. Tsampi'ye tsu'tte tivei'ccu jacanque'su, osha'cho manguque'su, osha'cho sefane chhajepa jacanque'suma'qqe gi atte. ⁷Tsomba afa'choma gi paña. Ñama tsu su: “Pedro, jangipa fi'ttipa anjan.”

⁸Tsa'ma ñajan pañamba su: “Me'i, Na'su, in'jambi gi. Minga'ni'qqe gi ambi tsa'caen an'masia aña'chomaja.”

⁹Tsa'caen ña susi sefaccone afa'je'choja ccase afapa su: “Que atte'choja anque'su tsu. Chiga Quitsa ‘Tsa aña'choja ñotssi’ qquen su'ninda ¿jongoesie qui asettu'je?” ¹⁰Tres se tsa'caen ñanga attiamba tsu pa'cco sarupa toequi sefacconi ansunde.

¹¹Tsa'caen sefacconi ansundesu tse'faei'ccuyi tres a'i ña can'jen'cho tsaoni ji'fa. Tsendeccuja Cesareane ñama ttuse'su ji'fa. ¹²Chiga

Qquendya'pa tsu ñama manda dyombe'yi tsendeccui'ccu jaye. Toya'caen va seis ingi faengasundeccu'qqe ñai'ccu japa tsu ñama ttuse'sumbe tsa'onga ca'ni'fa. ¹³Tise tsa'onga ca'nisi tsu conda ma'caen Chigama sefacconi'su shondo'su tise tsa'onga attiamba ccutsupa tisenga su'choma: “Mandaja a'ima Jope canqqueni Simón Pedro, qqen inise'cho'choma cuintsu ttusengaye. ¹⁴Tsa jipa tsu condaya ma'caen quei'ccu fae'ngae poi'ccu que tsaoni can'jensundeccu'qqe ccusha'faya'choma.”

¹⁵Tsonsi ña japa condaseye ashae'nijan Chiga Qquendya'pa'qqe tsendeccunga ca'ni. Inginga tseyi me'ttia'ye ca'niqquia'caen tsu ca'ni. ¹⁶Tsa'caen ca'nisi gi in'jan Na'su su'choma: “Noa'metsse tsu Juanjan tsa'ccui'ccu a'ima feti. Tsa'ma que'ija Chiga Qquendya'pai'ccu qui fetiye'faya.” ¹⁷Nane ingi Na'su Jesucristove in'jansi Chigaja Tise Qquendya'pama inginga afe. Tsa'caeni inginga afeqquia'caen tsendeccunga'qqe afe'nijan ¿ma'caen gi Chigama se'piya?

¹⁸Tsonsi Pedro condase'choma pañamba ccaningae afambe'yi Chigane ñotsse afapa su'fa:

—Ja'ño gi atesu'fa. Chigata tsu israembindeqquianga'qqe egae tsincon'choma antteye in'jaña'chove afe cuintsu tsangae canse'faye.

Antioquiasundeccu Jesúsve in'jan'fa

¹⁹Estebanma fi'ttipa faesu Jesúsve in'jan'chondecuma mandian'can'fasi ccuyayin ja'chondecu biani jaja'fa. Majanda Fenicia andeni, majanda Chipre anttepo'choni, majanda Antioquía canqqueni jaja'fa. Tsa'caen jajapa jo'su israendecungayi Chiga Aya'fama condase'fa. ²⁰Tsa'ma majan tsendeccu'suja Chipre anttepo'cho'su, Cirene ande'su'qqe Antioquía canqqueni japa griegondeccunga'qqe Na'su Jesúsne ñotsse condase'choma condase'fa. ²¹Na'su Chiga tisema fuitesi condasesi tsu tsain'bitssi a'i tise'pa tayopi in'jan'choma anttepa Na'su Jesúsve in'jan'fa.

²²Tsama pañamba Jerusaléni'su Jesúsve in'jan'chondecuja Bernabéma mandamoen'fa Antioquíani. ²³Antioquíani japa Bernabéja Chiga tsenisundeccunga ñotsse tson'choma attepa avuja. Tsa'caen avujapa poi'ccu congua candusian cuintsu anttembe'yi Na'suve tansintsse in'jamba canse'faye. ²⁴Nane Bernabé tsu ñotssia a'i, Chiga Qquendya'pa ca'ni'cho. Tise injama'choi'ccu Na'su Jesúsve ñotsse in'jan. Tsa'camba avujapa candusiansi tsu tsain'bitssi a'i Na'su Jesúsve in'jan'fa.

²⁵Omboe Bernabéja Tarso canqqueni ja Saulove tta'ttaye. ²⁶Attepa Antioquíani anga. Angapa fae canqque'fa pa'cco tseni'su Jesúsve in'jan'chondecui'ccu fae'ngae can'jemba tsain'bio a'ima atesian'fa. Nane tseni Antioquíani tsu tseyi me'ttia'ye Jesúsve in'jan'chondecuma “Cristondeccu” qqen inisian'fa.

²⁷Tsa'caen atesian'jen'fa'ni majan Jerusaléni'su Chigama afasundeccu Antioquíani ji'fa. ²⁸Tsa'caen jipa fa'e Agabo qqen inisecho'cho Chiga

Qquendya'pa tise ma in'jaensi bo'fa'cho enttingenga ccutsupa poi andenga qquipoesuite napiya'chone conda. Nane tsa'caen su'cho tsu Claudio na'suite tsa'caen napi. ²⁹Tsa'caen napisi Antioquia'su Jesúsve in'jan'chondeccuja mi'getsse afeye osha'ta fuiteye in'jan'fa Judea ande'su fae'ngae in'jan'chondeccuma. ³⁰Tsa'caen afeya'cho corifin'dima boñamba Bernabé, Sauloi'ccu moen'fa cuintsu angapa Judea'su coenzandecunga afe'faye.

Santiagoma fi'ttipa Herodes Pedroma'qqe indi

12 ¹Tseite ande na'su Herodesja majan Jesúsve in'jan'chondeccuma noñangiañe ashaen. ²Tsa'caen ashaemba Juan quindya Santiagoma indipa fi'tti. Nane tise tsovema chattu ttovapa fi'tti. Tsa'caen tson'choma atepa israendeccuja avujatssi'fa. ³Tsa'caen avujatssi'fasi atepa Herodesja Pedroma'qqe indian. Nane pan cupana'cco mechoa fiestama panshaen'jenqui tsu tsa'caen tson. ⁴Tsa'caen indipa Herodesja diez y seis sundarove manda cuintsu Pedro sombosa'ne picco'je'cho ettima coira'je'faye. Nane cuatrove cuatrove attufaemba manda tise ma coira'faye. Tsa'caen an'biamba fiesta pasasi poi'cco a'inga canjaemba fi'ttiye qqen Herodesja in'jan. ⁵Tsa'caen Pedro picco'je'cho ettinga piccoyesi Jesúsve in'jan'chondeccuja ti'tsse'tsse Chigama iñajan'fa tise ne.

Chiga Pedroma fetta picco'je'tti'ye

⁶Pedroma fi'ttiya'cho a'ta napiji'ni tsequi cose Pedroja picco'je'cho ettini anal'jen. A'tasi Herodesja tise ma somboña'cho a'inga canjaemba fi'ttiye. Pedro tsa'caen anal'jensi tseccuni dos sundaro tisei'ccu can'jen'fa. Toya'caen dos candenai'ccu tandansi sundaro enttingeni tiseja anal'jen. Toya'caen faesu sundarondeccuja sombo'ttini ronda'je'fa, majan indiy'e'cho sombosa'ne. ⁷Tsa'caen anal'jen'ni Na'su Chigama sefacconi'su shondo'su jipa attian. Tsa'caen attiansi picco'je'cho ettinga tuño setsaquia'caen a'tatsse da. Tsonsi sefacconi'su shondo'su Pedronga catsepa utuccu'tti'ye tssai qquendyaemba su:

—¡Utatsse jangija!

Qquen susi Pedro jangisi tise tive'ye tandan'cho candena'qqe ccupaye amppi. ⁸Tsa'caen ccupayesi sefacconi'su shondo'suja su:

—Que utuqui'fama utuquipa sapatoma'qqe ejianjan.

Pedro tsa'caen tsonsi sefacconi'su shondo'suja su:

—Que omba'su ondiccujema ondiccupa ñai'ccu fae'ngae jija.

⁹Tsa'caen susi Pedroja sefacconi'su shondo'sui'ccu fae'ngae sepaccofae ja sombo. Pedroja ayo'opa attequia'caen in'jamba sefacconi'su shondo'su ñoa'me tson'choma atesumbi. ¹⁰Fae sombo'ttima coira'su sundaroma panshamba faesuma'qqe panshansi rande yoshava sombo'ttima picco'je'cho'qqe tisuyi fettaye. Nane tse'ttima panshamba tsu ñoa'me tsoteni jaya'cho. Tsa'cansi tsama panshamba fae tsaiqui'ye japa

tse'faei'ccuyi Chigama sefacconi'su shondo'suja Pedroma catipa ja.

¹¹ Tsa'caen tisema catipa jasi Pedroja ñoa'me in'jamba su:

—Ja'ño gi in'jan ñoa'me tsu na'su Chiga Quitsaja Tisema sefacconi'su shondo'suma mandamoemba ñama ccushaen Herodes tsoña'cho'ye toya'caen israendeccu in'jamba ronda'je'cho'ye'qqe.

¹² Qquen in'jamba Pedroja María tsaoni ja. Tsa María tsu Juan Marcos chan. Tsain'bio a'i tse'ttinga bopa Chigama in'ajan'jen'fa. ¹³ Tsa'caen in'ajan'jen'fa'ni Pedroja tsotefa'su sombo'ttima tssai jeña cuintsu fetta'fasi ca'niñe. Tssai jeñasi chu'a pushesu, Rode qqen inisecho'cho, “¿Majan tsu tssai jeña?” qqen can'su ja. ¹⁴ Japa Pedro aya'fasi pañamba sombo'ttima fettambe'yi avujapa toequi conda'su buttoin ja. Japa su:

—¡Pedro tsu sombo'ttini ccutsu!

¹⁵ Qquen susi pañamba aindecuaja su'fa:

—¡Sumbie qui da!

Tsa'ma pushesuja ñoa'me qqen su'ni'qqe aindecuaja toya in'jambipa su'fa:

—Pedrombi. Tisema sefacconi'su coira'su.

¹⁶ Tsa'caen su'je'fa'ni'qqe toyayi Pedroja sombo'ttima tssai jeña'jen. Tsonsi fettapa Pedroma atepa dyopa can'boen ccutsu'fa. ¹⁷ Tsonsi tiseja tivei'ccu sepi'pian cuintsu ziyafaye. Tsomba condase ma'caen na'su Chiga tisema piccoje'cho etti'ye somboen'choma. Condasepa su:

—Pa'tssima conda'faja Santiagonga, poi Jesúsve in'jan'chondeccunga'qqe.

Tsa'caen condapa sombopa cca'ttinga japa jacan.

¹⁸ A'tasi poi sundarondeccu tisupanaccu qqejecco'fa Pedro ma'caen ja'chove atesumbipa. ¹⁹ Tsa'caen moen'fasi Herodesja tta'ttaye mandasi atte'fambisi coira'su sundarondeccuma in'ajansepoemba fi'ttiye manda. Tsa'caen mandapa Herodesja Judea'ye sombopa Cesarea canqqueni ja tseni canseye.

Herodes pa'cho

²⁰ Herodesja Tiro canqqe'su, Sidón canqqe'su aindecuma iyicca'ye. Tsa'ma majan tsendeccu'su fae'ngae Herodesi'ccu condasepa ñoquiañe ji'fa. Nane pa'cco tise'pa anqqe'su tsu na'su Herodes andene ji'je'cho. Tsa'cansi tsendeccuja jipa, na'sumbe teniente, Blastoma amigoen'fa. Tsa'caen amigoemba tisei'ccu na'suma afa'fa cuintsu ñoquipa tise'pai'ccu avujatsse canseye. ²¹ Tsonsi na'su Herodes maqui a'ta tise condaseye su'cho napisi pa'cco tise ñotssia na'su ondiccuqqe'suma ondiccupa na'su dyaipa'chonga ansundepa dyaipa poi'yi'ccongá quia'me candusian. ²² Tsa'caen candusiansi aindecuaja fundoye ashaen'fa:

—¡Va afa'suja a'imbi tsu! ¡Ñoa'me chiga!

²³ Qquen fundo'je'fasi Herodesja “Ñajan chigambi” qqen condambisi Chigama sefacconi'su shondo'suja tse'faei'ccuyi tisema pporaen. Tsa'caen pporaensi pave dapa misiangepa pa.

²⁴Tsa'ma Chiga Aya'fama ti'tsse poi andeni afa'fasi tsain'bitssi a'i Jesúsve in'jan'fa.

²⁵Toya'caen Bernabé Sauloi'ccu tise'panga corifin'dima afeye manda'choma afe nanimba Jerusaléne sombopa toequi Antioquíani ja'fa. Juan Marcosma'qqe fae'ngae anga'fa.

Bernabé, Sauloma'qqe ttu'se'fa

13 ¹Antioquía'su Jesúsve in'jan'chondecu majan Chiga Aya'fama afasundeccu, majan atesiansundeccu'qqe can'jen'fa. Tsendeccuta tsu Bernabé, Simón –tsa Singo qqen inisecho'cho, Lucio– tsa Cirene'su a'i, Manaen –tsa governoror Herodesi'ccu fae'ngae coen'cho, toya'caen Saulo'qqe. ²Tseite tsendeccu ambe'yi Na'su Chigama afa'je'fa'ni Chiga Qquendya'paja tise'pama su:

—Ñambe moenjan Bernabé, Sauloma'qqe cuintsu ña manda'cho sema'bama sema'faye.

³Tsa'caen susi ambe'yi Chigama ñajamba tise'pa tivei'ccu Bernabé, Sauloma'qqe pporaemba mandamoen'fa.

Chipre anttepo'choni ja'fa

⁴Chiga Qquendya'pa tise'pama mandasi Bernabé, Sauloi'ccu Seleucia canqueni ja'fa. Tsene barconga otsepa Chipre anttepo'chonga ise'fa. ⁵Salamina canqueni napipa ccattufapa sombo'fa. Sombopa Chigane atesian'jen'ttinga ca'nimba Chiga Aya'fama condase'fa. Juan Marcos'qqe tsendeccum fuite'suve jacan. ⁶Pa'cco anttepo'cho'ye já Pafos canqueni napi'fa. Tseni napipa cachui'fa israe'su coraga, Barjesús, qqen inisecho'choma. Tsa tsu afopa'cho Chiga Aya'fama afa'su. ⁷Tiseja governoror Sergio Pauloma shondo'su. Governororja injama'pa a'ipa Chiga Aya'fama pañañe in'jamba Bernabé Sauloma'qqe ttu'se. ⁸Tsa'caen ttu'sesi tsa coraga, Barjesús –tise faesu inise, Elimasja– se'pi, governoror Chiga Aya'fama pañamba in'jansa'ne. ⁹Tsa'ma Saulo –tise faesu inise, Pablo– Chiga Qquendya'pai'ccu in'jamba Elimasma can'boemba ¹⁰su:

—¡Que qui afopa'cho, injamambi, cocoya na'su in'jan'cho! ¡Pa'cco ñotssiane qui chi'ga'cho! ¡Mingapa qui anttembe Na'su Chiga tansintssia tsaiquima dañoquia'caen Tisene atesian'jen'choma daño'jen? ¹¹Ja'ño tsu Na'suja que injama'choma somboeña. Nane binie dapa qui a'tave atesumbe canseccaya.

Tse'faei'ccuyi binie dapa atteye oshambipa faesuve va'se tta'tta ccutsu cuintsu majan tivei'ccu fendepa tise'ma anga'faye. ¹²Tsa'caen coraga binie dasi governororja attepa Na'su Jesúsne atesian'jen'choma ñoa'me injama'chopie asi'ttaemba Jesúsve in'jan.

Pisidia'su Antioquíani ja'fa

¹³Tsonsi Pablo tisei'ccu fae'ngae jacansundecui'ccu Pafosne barconga otsepa Pergeni ja'fa. Pergeta tsu Panfilia ande'su canqqe. Tseni

napipa Juan Marcosja tsendeccuma catipa toequi shandapa Jerusaléni ja. ¹⁴Tsa'ma Pablo, Bernabéi'ccu Pergene sombopa Pisidia ande'su Antioquía canqueni jaja'fa. Tse'ttinga sema'ma'qquia a'ta napisi Chigane atesian'jen'ttinga ca'nimba dyai'fa. ¹⁵Tsonsi Moisés manda'cho tevaen'jen, Chiga Aya'fama afasundeccu tevaen'jema'qqe cambia afa nanimba Chigane atesian'jentti'su nasundeccuja tise'pama ttu'sepa su'fa:

—Antiandeccu, jongoesuma a'inga candusiañe in'jan'da ja'ño afa'faja.

¹⁶Tsonsi Pablo jangi ccutsupa tivei'ccu sepi'pian cuintsu ziyafaye.

Tsomba su:

—Paña'faja israendeccu. Chigave in'jamba Tisema dyoe'sui'ccu can'jendeccu'qqe paña'faja. ¹⁷Ingi israendeccumbe Chigaja, ingi tayopi'su coenzandeccuma in'jamba ttu'se. Toya Egiptoni cca'imbe andeni can'jeinte Chiga tise'pama fuitesi tsain'bitsse atapa'fa. Tsonsi Chiga Tise osha'choma oshacho'choma canjaemba ingi tayopi'su coenzandeccuma tsa ande'ye somboen. ¹⁸Tsa'caen somboensi cuarenta canque'fave israendeccu a'i menia can'jen'fasi Chigaja tise'pa egae tsincon'choma attembiqquia'caen tise'pama fuitespa angacan. ¹⁹Tsa'caen angacamba Canaán andeni napipa tseni'su siete ande'su aindeccuma fiti'ttipa tsa andema israendeccunga afe. Tise'panga afe cuintsu tise'pa, tise'pa dutssiyendeccu'qqe tsa andeni canse'faye.

²⁰Afesi cuatrociento cincuenta canque'fave tseni can'jen'fasi Chiga Quitsaja injama'choma somboensundeccuma ccutsian cuintsu tsendeccuma manda'faye.

Tsonsi Chiga Aya'fama afa'su Samuel canseite ²¹israendeccuja tisupa na'suve in'jamba ñajan'fa. Tsa'caen ñajan'fasi Chiga Quitsaja Saúlma na'suve tson. Tsa Saúlta tsu Cis dutssi'ye, israe'su Benjamíndeccu'su. Tise cuarenta canque'fa na'suve dapa manda'jesi ²²Chiga Quitsaja tisema joquitssiamba Davidma na'suve tson. Nane tsa Davidne Chiga Quitsaja afapa su: “Va David –Isaí dutssi'ye– tsa tsu ña in'janquia'caen in'jamba pa'cco ña in'jan'choma pañamba tsoña.”

²³David dutssiyendeccu'su omba'su dutssi'ye tsu Jesúsja. Tsama Chiga Quitsaja Tise ñoa'me suquia'caen israendeccuma ccushaen'suve moen.

²⁴Jesús toya jacañe ashaembi'te Juanjan ji. Tsa'caen jipa poi israendeccuma candusian cuintsu tise'pa egae tsincon'choma anttepa fetiye'faye; tsa'caen fetiye'fasi cuintsu Chiga Quitsa tise'pa egae tsincon'choma joquitssiañe.

²⁵Juan, tisu paya'cho napiji'ni afapa su: “Ñajan que'i in'janquia'caen tsa Chiga in'jan'cho Cristombi gi. Ñama omboe tsu tsaja jiye tson'jen. Nane ñajan utu'ccoapa gi shaca tise sapatoma uga'choma ccupa'suve ca'niñe.”

²⁶Antiandeccu, Abraham dutssiyendeccu, poiyo'cco que'i majan Chigave in'jamba Tisema dyoe'sui'ccu can'jendeccu'qqe, paña'faja va que'ima ccushaena'chone condase'choma. ²⁷Jerusalénisundeccu, tise'pa nasundeccu'qqe atesu'fambi majan tsu Jesús. Nane poi sema'ma'qquia a'ta canjan'fa tayopi'su Chiga Aya'fama afasundeccu tevaen'jema. Tsa'caen canjamba ñotsse paña'ma in'jan'fambi. Tsa'ma tsa Chiga

Tevaen'jen suqquia'caen Jesúsma fi'tti'fa. ²⁸Nane ma'caen Jesúsma fi'ttiya'cho jinchoma'caen aindeccuja injanga Pilatoma ñajan'fa tise mandasi fi'ttiye. ²⁹Tsa'caen tsomba toya'caen pa'cco Chiga tevaen'jen ma'caen tise ma'caen fi'tti'faya'chove suqquia'caen tsomba avuja'cco'ye andiamba a'tu'fa. ³⁰Tsa'ma fi'tti'fasi Chiga Quitsaja pa'cho'ye tise ma'caen qquendyaen. ³¹Tsa'caen qquendyaensi Jesúsja tsain'bio a'tave attia'ñacca tisei'ccu fae'ngae Galileane Jerusaléni jacansundecunga. Tsendecuja attesundecupa ja'ño tise ne aindecunga conda'fa.

³²Ingija va ñotsse condase'choma que'inga condase'fa. Nane Chiga Quitsa tayopi'su coenzandecunga ma'caen su'choma tsu ³³ja'ñojan ingi tise'pa dutssiyendecunga canjan'jen, Jesúsma pa'cho'ye ccase qquendyaemba. Tsane tsu qquen Salmo settapoen'cho tevaen'jen dosnga tevaen: “Que qui ña Dutssi'ye. Ja'ño gi atte.” ³⁴Nane Chiga Quitsaja Jesúsma ñoa'me pa'cho'ye qquendyaemba pa'masiave tson. Tsane tsu qquen tevaen: “Ñajan Davidnga ñotssiave tsoña qquen tansintsse supa gi tsa'caen que'inga ñotssiave tsoña.” ³⁵Toya'caen faesu Salmo settapoen'cho tevaen'jenga'qqe su: “Antteya'bi qui que in'jan'cho a'imbe ai'vo papa congoñe'jan.” ³⁶Tsa'ma ñoa'me tsu Davidja Chiga mandaquua'caen tise canseite'su a'ima ñotsse coirapa tise coenzandecupa'caen pa. Pasi tise ai'voja congo. ³⁷Tsa'ma Chiga Qquendyaen'choja ñoa'me congo'masia've tsu da. ³⁸Antiandeccu, atesu'faja: Va tsandieta tsu a'i egae tsincon'choma joquitssian'su. Tsane gi que'inga condase. ³⁹Jesúsi'ccu tsu majan tise've in'jan'da osha'cho egae tsincon'choma joquitssiaña'cho. Nane Moisés afapa manda'cho tsama joquitssiaña oshambisi Jesúsi'ccu tsu joquitssiaña'cho. ⁴⁰Injama'tse in'jan'faja tayopi'su Chiga Aya'fama afasundeccu qquen tevaen'cho que'inga dasa'ne:

⁴¹ Que can'faja afasesundeccu.

Can'boen ccutsupa pa'faja.

Ña Chiga gi que'i canseite ccaningae tsoña.

Tsa'caen tsonsi qui in'jan'faya'bi cca'i que'inga condase'ni'qqe.

⁴²Tsa'caen Pablo condase nanisi poiya'cco a'i sombo'je'ni aindecuja Pabloma afa'fa cuintsu faesu sema'ma'qquia a'ta'qqe ti'tsse condaseye tise condase'choma. ⁴³Nane bo'fa'cho pasasi tsa'caen sombopa tsain'bio a'i Pablo, Bernabé'ma'qqe omboen'fa. Majanda ñoa'me israendeccu, majanda israendecupa'caen in'jan'chondeccu'qqe tise'pai'ccu jaja'fa. Tsa'caen fae'ngae jaca'fasi Pablo Bernabé'qqe tise'pama candusian'fa cuintsu Chiga tise'pama ccusha'ña'choma aqqe'pambe'yi can'jen'faye.

⁴⁴Faesu sema'ma'qquia a'ta napisi poiya'cco tsa can'qqe'su a'i bo'fa Chiga Aya'fama pañañe. ⁴⁵Tsa'ma poiya'cco a'i tsa'caen bo'fasi israendecuja atepa injama'choni se'pipa iyicca'yefa. Iyicca'yepa Pablo su'choma ccaningae afapa tise ma'caen afase'fa. ⁴⁶Tsonsi Pablo, Bernabé dyombi'tsese afapa su'fa:

—Que'i israendecunga tsu Chiga Aya'fama me'ttia'ye afa'cho. Tsa'ma que'ija pañañe in'jambipa qui tisu injama'choma somboenquua'caen

tisuja shacapa qquen canjaen'fa. Tsa'cansi gi israembindeqquianga condaye tson'jen'fa. ⁴⁷Nane tsane tsu Na'suja ingima qquen manda:

Na gi que'ima tuño attianquua'caen poi israembindeqquianga canjaeña.
Que'i'ccu gi poi biani'su ande'suma'qqe ccushaeña.

⁴⁸Tsama pañamba israembindeqquiaja avujapa Chiga Aya'fane ñotsse afa'fa. Tsonsi Chiga tsangae canseya'chove majama tayo in'jan'chondecuja ñotsse pañamba in'jan'fa. ⁴⁹Tsa'caen tsu Pablo, Bernabéja Na'sune ñotsse condase'choma pa'cco tsa ande'su canquenga candusian'fa. ⁵⁰Tsa'ma israendecuja ño'a qquen nafattuye atesu'cho pushesundecuma afopoemba canqqe'su nasundecuma'qqe afopoeni sendecuja iyicca'yepa Pablo, Bernabéma'qqe noñangiañe ashaen'fa. Tsomba tteyamoen'fa tise'pa ande'ye. ⁵¹Tsonsi jayipa Pablo, Bernabé'qqe tise'pa tsu'tte'su andema fanttundu shequiamba cati'fa. Tsa'caen tsu tseni'su a'ima ccane'qqe chi'ga qquen canjaen'fa. Tsa'caen canjaemba Iconio canqueni jaja'fa. ⁵²Tsa'ma Jesúsve in'jan'chondecuja Chiga Qquendya'pai'ccu ñotsse in'jamba toya avujatsse canse'fa.

Iconioni can'jen'cho

14 ¹Iconio canqueni napipa Pablo, Bernabéi'ccu israe Chigane atesian'jen'ttinga ca'nimba candusian'fa. Tsa'caen candusian'fasi tsain'bio a'i pañamba in'jan'fa, majan israendeccu, majan israembindeqqui'a'qqe. ²Tsa'ma majan israendeccu Jesúsve in'jambipa iyicca'yepa israembindeqquianga afafaen'fa cuintsu Jesúsve in'jan'chondecuma egae in'jan'faye. ³Tsa'ma Pablo, Bernabéi'ccu bo'tsse tseni can'jemba dyombi'tsse Na'su Jesúsne afa'fa. Toya'caen Na'su Jesús tise'pama fuitespa antte cuintsu sefaconi'su canjaen'cho osha'cho Chiga agattoen'choma'qqe canjaen'faye. Tsa'caen tsu fuitespa cuintsu a'i atesu'faye tise'pa condase'choja ñoa'me Chiga ñotsse condase'chove. ⁴Tsa'ma tsa canqqe'su a'i fae'ngae in'jan'fambi. Enttingeja israendecui'ccu in'jan'fa. Faesuja Jesúsne afasundecui'ccu in'jan'fa. ⁵Tsomba tse'i israendeccu israembindeqqui'a'qqe tise'pa nasundecui'ccu in'jamba Jesúsne afasundecuma afasepa patui'ccu ttovacoeñe in'jan'fa. ⁶Tsa'ma Pablo Bernabé'qqe tsama atepa ccuyayin jaja'fa faesu Licaonia ande'su canqueni. Nane Listra canqqe, Derbe canqqe, faesu tsai'ccu pporotssia'su canqueni'qqe jaja'fa. ⁷Tsa'caen jacamba Jesúsne ñotsse condase'choma condase'fa.

Listrani patui'ccu ttovacoen'fa'cho

⁸Listra canqueni fae tsandie tsu'tte dañonge'cho tsuiye oshambipa dyai. Nane chuitepie tsave dañonge'chopa tsuimbeyi canse. ⁹Tsa'caen dyaipa Pablo afa'je'choma pañamba Chigave in'jan tisu ccushaye. Tsa'caen in'jansi atepa Pabloja ¹⁰tisema quia'me afapa su:

—¡Jangipa que tsu'ttei'ccu tansintsse ccutsuja!

Tsonsi tsa a'ija butto jangipa tsui ja. ¹¹Tsa'caen Pablo tsonsi atepa poiya'cco a'i quia'me afaye ashaen'fa. Qquen tsu tise'pa Licaonia aya'fangae afa'fa:

—¡Chigandeccu tsu a'ia'caen attiamba inginga ande'fa!

¹²Tise'pa chiga Júpiter qquen tsu Bernabéma su'fa. Tsomba Pabloma tsu chiga Mercurio qquen su'fa, tsa ti'tsse'tsse afa'jesi. ¹³Tsa chiga Júpiterma iñajan'su ettita tsu tsa canque caninga'tti pporotsse. Júpiterma iñajan'su na'suja tsene jipa tetaen'choma a'ndu'cho vaura quitsayema i. Poiya'cco a'i'ccu tsu tsa vaurama fi'ttiye in'jan'fa Pablo, Bernabénga iñajanquia'caen afeye. ¹⁴Tsa'caen tson'jen'fasi Jesúsne afasundeccu Bernabé, Pablo'qqe a'i in'jan'choma atepa tisupa ondiccuj'jema chitta'fa. Tsa'caen tsu tson'fa a'i in'jan'choma se'pi'chove canjaeñe. Tsomba a'inga butto catsepa quia'me afa'fa:

¹⁵—Aindeccu, ¿jongoesie qui jova'caenjan tson'jen'fa? Ingija que'ia'caeñi a'i'fa gi. Ingita gi ji'fa ñotsse condase'choma condaseye. Nane osha'cho injanga iñajan'choma catipa ñoa'me canse'cho Chigave in'jan'faye gi condaseye ji'fa. Nane tsa canse'cho Chiga tsu sefacco, ande, marve agattoen'su. Toya'caen osha'cho sefacco, ande, marni jinque'suve'qqe tsu agattoen'su. ¹⁶Tayoe tsu Chigaja aindecuma ante cuintu tisupa injama'cho in'janquia'caen canse'faye. ¹⁷Tsa'ma anttembe'yi tsu Chigaja osha'cho ñotssiam tson'jen Tise can'jen'choma a'inga canjaeñe. Nane sefaccone tsu unjima tuiña cuintu osha'cho teta'cho tise'pa naite nañe. Tsa'caen tsu Chigaja que'i anque'suma que'inga afesi qui amba tteppupa avujatsse canse'fa.

¹⁸Tsa'caen su'a'qqe vanamba se'pi'fa aindecu tise'panga iñajanquia'caen vaurama fi'ttipa afeye tson'jen'choma.

¹⁹Tsonsi Antioquía'su, Iconio'su israendeccu jipa Lистра'su aindecuma in'jaen'fa. Tsa'caen in'jaensi iyicca'yepa Pabloma ttovaccoen'fa patui'ccu. Ttovaccoemba “Tayo tsu pa” qquen in'jamba tise ai'voma qquitsapa anga cati'fa canque joccani. ²⁰Tsa'ma Jesúsve in'jan'chondeccu Pabloma shonquendi'e bo'fasi tiseja jangipa toequi canqueni ja. Ccaqui a'ta Pablo, Bernabé'ccu Derbe canqueni jaja'fa.

²¹Tseni japa Jesúsne ñotsse condase'choma condase'fasi tsain'bio a'i pañamba in'jan'fa. Tse'ttie shandapa toequi Lистра, Iconio, Antioquíani jaja'fa. ²²Tsa'caen japa tseni'su Jesúsve in'jan'chondeccuma candusiamba ti'tsse in'jaen'fa. Qquen tsu candusian'fa cuintu Jesúsve in'jamba canse'faye; toya'caen cuintu Chiga aindecuve da'ta me'detsse vana'faye. ²³Toya'caen tsu poi Jesúsve in'jan'chondeccu bo'fa'chonga japa majan a'ima ttu'sepa manda'fa cuintu bo'fa'chombe na'su coenzandecuve da'faye. Tsendecuma ttu'sepa ambe'yi tise'pane Chigama iñajan'fa cuintu Na'su Jesúsve in'jan'fasi na'su Jesúsja tise'pama coirapa angacañe.

Toequi Siria'su Antioquíani ja'cho

²⁴Tsene sombopa Pisidia ande'ye panshamba Panfilia andeni napi'fa.

²⁵Tseni napipa Perge canque'su a'inga condase'fa Chiga Aya'fama. Tse'ttinga

condase nanimba Atalia canqueni ja'fa. ²⁶Tse'ttie barconga otsepa toequi Siria ande'su Antioquíani jaja'fa. Nane tse'tti tsu cuintsu Chiga tise'pama fuitete ñajamba mandamoen'fa'tti. Tsa'caen moen'fa'choma nanimba toequi tseni jaja'fa. ²⁷Tseni Antioquíani napipa Jesúsve in'jamba bo'je'chondeccu bo'faye ttu'se'fa. Ttu'se boñamba condase'fa ma'caen Chiga Quitsa tise'pai'ccu osha'chove tson'choma. Toya'caen conda'fa ma'caen Chiga Quitsa anttesi israembindeqquia'qqe Jesúsne pañamba in'jan'fa'choma. ²⁸Tse'tti bo'tsse can'jen'fa faenga'su Jesúsve in'jan'chondeccui'ccu.

Jerusaléni faengasundeccu bo'fa'cho

15 ¹Tsa'caen can'jen'fa'ni majan a'i Judeane ji'fa'chondeccu Antioquíani ji'fa. Jipa faengasundeccunga qqen atesian'jen'fa: “Majan ttonoma Moisés mandaqquia'caen chhiyitevaembi'ta ccushaya'bi tise egae jincho'cho'ye.” ²Tsa'caen atesian'jen'fasi Pablo, Bernabé tsa'cambi qqen supa tsain'bitsse afacco'fa tsendeccui'ccu. Tsa'caen afacco'fasi Jesúsve in'jamba bo'je'chondeccuja manda'fa cuintsu Pablo, Bernabé, toya'caen faesundeccu'qqe Jerusaléni japa Jesúsne afasundeccui'ccu tisupa afacco'fa'choma condaseccoye; toya'caen Jerusaléni'su Jesúsve in'jamba bo'je'cho coenzandeccui'ccu tsane condaseccoye.

³Antioquía'su Jesúsve in'jamba bo'je'chondeccu tsa'caen mandamoen'fasi Fenicia ande, Samaria andengae jayipa poiya'cconga conda'fa ma'caen israembindeqquia'qqe Chiga Aya'fama pañamba in'jan'fa'choma. Tsa'caen conda'fasi poiya'cco faenga'su Jesúsve in'jan'chondeccu avuja'fa.

⁴Jerusaléni napisi tseni'su Jesúsve in'jamba bo'je'chondeccu Jesúsne afasundeccu, coenzandeccu'qqe tise'pama avujatsse cachuicco'fa. Tsonsi Pablo, Bernabé'qqe conda'fa osha'cho ma'caen Chiga Quitsa tise'pai'ccu tson'choma. ⁵Tsa'ma majan fariseondeccu tayo Jesúsve in'jan'chondeccu jangi ccutsupa afa'fa:

—Israembindeqquia majan Jesúsve in'jan'da tisupa ttonoma chhiyitevaemba tsu Moisés manda'choma pañamba canseya'cho.

⁶Tsa'caen susi Jesúsne afasundeccu, coenzandeccui'ccu bo'fa tsa su'chone condaseccoye. ⁷Tsain'bitsse condase pasapa Pedro jangi ccutsupa qqen su:

—Faengasundeccu, que'i'qqe qui atesu'fa tayoe Chiga ingini jipa ñama ttu'se'choma. Tsa'caen ttu'sesi ña'ñe tsu israembindeqquia'qqe Jesúsne ñotsse condase'choma pañamba in'jan'fa. ⁸Toya'caen Chiga Quitsaja a'li injama'choma atesupa tsendeccuma in'jamba poiya'cconga tsama canjaen. Nane Tise Qquendya'pa ingima in'jaenqquia'caeni tsendeccuma'qqe in'jaensi tsu tsa'caen canjaen. ⁹Tsa'caen tsu tsendeccuma'qqe ingima'caeni fae'ngatsse canjaen'jen. Toya'caen tsu ingima'caeni israembindeqquia injama'choma'qqe ccucha Jesúsne pañamba in'jan'fasi. ¹⁰Tsa'can'ma ¿jongoesie qui que'ija ja'ño Chiga tson'choma in'jambipa Moisés

manda'choma israembindeqquianga'qqe manda'fa? Tsata tsu tssai'a andu'choma anduqquia'can. Nane ingi ni ingi tayopi'su coenzandeccu'qqe va manda'choma tsoñe osha'fambi. ¹¹Tsa'ma ja'ño ingi'qqe Na'su Jesucristove in'jansi tsu ingima mende'yepa ccushaen israembindeqquiama ccushaenqquia'caen.

¹²Pedro tsa'caen susi poi'cco afambe ziya'fa. Tsonsi Bernabé Pablo'qqe condase'fa Chiga tise'pai'ccu ma'caen tson'choma. Nane conda'fa ma'caen Chiga fuitapa anttesi tise'pa sefaconis'u canjaen'cho, osha'cho Chiga agattoen'choma'qqe israembindeqquianga canjaen'fa'choma. ¹³Tsendeccu afa nanisi Santiagoja su:

—Faengasundeccu, ñama paña'faja. ¹⁴Simón Pedro tsu tayo inginga condase ma'caen Chigaja tseyi me'ttia'ye israembindeqquiama in'jamba tise'pama'qqe ttu'se cuintu Tise a'ive da'faye. ¹⁵Tsane tsu tayopi'su Chiga Aya'fama afasundeccuja qqen tevaemba su'fa:

¹⁶ Tsa'caen tsomba gi toequi jiya.

Tsa'o osui'choma ccase tsao'ñaqquia'caen gi ccase David'caen na'suma ccutsiaña.

Tayo asitta'choma ccase cuname ñoñamba ccutsianqquia'caen gi ñoñaña ¹⁷ cuintu cca'indeccu

Na'suve tta'ttapa in'jan'faye.

Nane poi'cco israembindeqquia'qqe tsu ña aindecuve da'faya.

¹⁸ Toya a'i meinte tsa'caen da'faya'choma atesupa ya'caen tsu Na'suja su.

¹⁹Tsa'cansi gi ñajan in'jamba su: Israembindeqquia'qqe tayo Jesúsve in'jamba tise'pa tayopi in'jan'choma antte'fasi tise'pama noñangian'fajama. ²⁰Tsa'ma tise'panga qqen tevaeñe tsu ñotssi: Osha'cho jongoesuma a'i ñoña'cho chiganga afe'cho tsu an'masia. Tsandienga pushesuma anttembi'choai'ccu can'jen'masia. Anjampama catimbe'yi fi'tti'cho aña'choja an'masia. Anjampa'qqe an'masia. ²¹Nane tayopi ashaemba poi canqueni tsu Moisés manda'choma atesian'jen'fa. Poi sema'ma'qquia a'ta tsu tsama cambia afa'fa.

Israembindeqquianga tevaen'cho

²²Tsa'caen susi Jesúsne afasundeccu, coenzandeccu, poi'cco Jesúsve in'jamba bo'je'chondeccu'qqe asi'ttaemba in'jan'fa majan tisupa'suma Antioquíani manda moeñe Pablo Bernabé'ccu cuintu ja'faye. Nane dos tise'pama ti'tsse joccapitssia aindecuma manda moen'fa, Judas Barsabás, Silasma'qqe. ²³Tsendeccu'ccu tsu qqen tevaen'choma moen'fa:

Vani'su Jesúsne afasundeccu, toya'caen coenzandeccuta gi Cristone que'i antiandeccupa,

Que'i Antioquía'su, Siria'su, Cilicia'su Cristove in'jamba
israembindequiamava avujatsse chigambian'fa.

²⁴Voeyi gi paña'fa majan vani'su a'i ingi mandambi'ma tisupa
que'ini japa ccaningae atesiamba que'ima noñangian'fa. Nane
tise'pa afa'choi'ccu que'ima qqueña'fa qquen supa: “Que'ija ttonoma
chhiyitevaemba pa'cco Moisés manda'choma pañaña'cho.” ²⁵Tsane
gi ingija bopa fae'ngae asi'ttaemba in'jan'fa ñoa'me ingi'suma
que'ini mandamoëne ingi in'jan'cho Bernabé, Pabloi'ccu cuintsu
ja'faye. ²⁶Nane tsendeccuja paye dyojombitssi'fa ingi Na'su
Jesucristone condaseye in'jamba. ²⁷Tsendeccui'ccu gi Judas,
Silasma'qqe moen'fa. Tise'pa tsu ingi tevaen'jen su'choma tansintsse
que'inga condase'faya. ²⁸Chiga Qquendya'pa ingima in'jaensi gi
in'jan'fa aquia va re'riccoa'veyi mandaye panshaen mandasa'ne:
²⁹Osha'cho jongoesuma a'i ñoña'cho chiganga afe'cho tsu an'masia.
Anjampa'qqe an'masia. Anjampama catimbe'yi fi'tti'cho aña'choja
an'masia. Tsandienga pushesuma anttembi'choi'ccu can'jen'masia.
Vama pañamba tson'da qui ñotsse tson'fa.
Chigái'ccu.

³⁰Tsa'caen tevaensi tsendeccuja anga'fa. Tsomba Antioquíani napipa
Jesúsve in'jan'chondeccuma ttu'sepa tsa tevaen'jema afe'fa. ³¹Tsama
camba ñotsse su'choma pañamba poi'ccu a'i avuja'fa. ³²Toya'caen Judas,
Silas'qqe Chiga Aya'fama afasundeccupa poi'ccu a'ima candusiamba
ñotsse in'jaen'fa. ³³Tsa'caen candusian can'jen'fasi Antioquía'su
bo'je'chombe nasundeccu tise'pama antte'fa cuintsu toequi ja'faye tise'pama
mandamoensundeccuni. ³⁴Tsa'ma Silasja toya can'jeñe in'jamba jambe
shanda. ³⁵Toya'caen Pablo, Bernabé'qqe tzeni Antioquíani can'jemba faesu
atesiansundeccui'ccu Chiga Aya'fama atesiamba candusian'fa.

Pablo ccase ccani candusiañe ja'cho

³⁶Bo'tsse can'jemba Pabloja Bernabéma su:

—Jinge jaye ccase poi canqqueni mani tayoe ingi Chiga Aya'fama
condaseni, Jesúsve in'jan'chondeccuma can'gaye.

³⁷Tsa'caen susi Bernabéja Juan Marcosma angaye in'jan. ³⁸Tsa'ma
Pabloja in'jambi, tayoe Panfiliani japa Marcos tise'pai'ccu semambe'yi
shandain jasi. ³⁹Tsa'caen fae'ngae in'jambipa ñoa'me afaccopa
attufacco'fa. Bernabéja Marcosi'ccu barconga otsepa Chipre anttepo'choni
jaja'fa. ⁴⁰Tsonsi Pabloja Silasma in'jamba tsai'ccu jaye ashaen. Jaye
tson'jensi faenga'su Jesúsve in'jan'chondeccu tise'pane Chigama in'jan'fa
cuintsu Na'su tise'pama ñotsse fuiteye. Tsa'caen Chigama in'jamba
tise'pama mandamoen'fa. ⁴¹Tsa'caen mandamoensi Siria, Cilicia

andengae japa faenga'su Jesúsve in'jamba bo'je'chondecuma atesiamba in'jaen'fa.

Timoteo Pabloma fuiteye jacan'cho

16 ¹Pabloja Silasi'ccu Derbe canquema panshamba Listra canqueni napipa tseni cachui'fa Jesúsve in'jan'cho, Timoteo qqen inisecho'choma. Timoteo mama tsu israe pushesu, Jesúsve in'jan'cho. Tsa'ma Timoteo yayaja griego a'i tsu. ²Listra'su, Iconio'su Jesúsve in'jan'chondecu tisene ñotsse afa'fa. ³Pabloja in'jan cuintsu Timoteo'qqe tisei'ccu fae'ngae jacañe. Tsa'ma Timoteo yayaja griegosi poi'yi'cco a'i atesucho'fasi Timoteoma chhiyitevaeñe manda israendeccu tisema chi'gasa'ne. ⁴Tsomba poi canquenga japa faengasundecunga conda'fa Jesúsne afasundeccu, Jerusaléni'su coenzandeccu fae'ngae in'jamba manda'fa'choma. ⁵Tsa'caen condapa can'jen'fasi poi Jesúsve in'jamba bo'je'chondecu Na'su Jesúsve ti'tsse in'ja'ñacca'fa. Toya'caen tsu poi a'ta ti'tsse'o a'i Jesúsve in'jamba bo'fa.

Macedonia'su a'i Pablomga attian'cho

⁶Asia andeni jaye in'jan'fa Chiga Aya'fama afaye. Tsa'ma Chiga Qquendya'pa se'pisi Frigia ande'ye, Galacia ande'ye jayipa ⁷Misia andeni napi'fa. Tse'ttie Bitinia andeni'qqe jaye in'jan'fasi Jesús Qquendya'pa'qqe se'pi. ⁸Tsa'cansi Misiana panshamba marni'su canqqe, Troasni, jaja'fa. ⁹Tseni napipa fae cose Pabloja attian'choma atte. Macedonia ande'su a'i ccutsu'choma atesi tsaja ttu'sepa qqen afa: “Macedoniani jipa ingima fuiteja.” ¹⁰Pablo tsa'caen atte qqen susi ingija osha'choma ñoña'fa Macedoniani jaye. (Ña Lucas'qqe gi jayi.) Nane Chiga tsu Jesúsne ñotsse condase'choma tseni condaseye manda qqen gi in'jan'fa.

Filiposni Lidiaja Jesúsve in'jan

¹¹Tsomba tse'i ingija barconga otsepa Troasne sombopa tansintsse jaja'fa Samotracia anttepo'choni. Ccaqui a'ta gi Neápolisni napi'fa. ¹²Tsene gi tsui jaja'fa Filiposni. Nane tsa canqqe tsu romano sundarondeccu manda'je'cho. Poi tseni'su Macedonia ande'su canquema ti'tsse joccapitssia tsu. Tseni japa gi bo'tsse can'jen'fa. ¹³Tsa'caen can'jen'ni sema'ma'qquia a'ta napisi gi canquene sombopa naifanga jaja'fa. Tseni tsu a'i Chigama in'jansi bo'jeni, qqen gi in'jan'fa. Tsa'caen japa atepa gi condasé dyail'fa tseni bo'fa'cho pushesundecui'ccu. ¹⁴Fae pushesu, Lidia qqen inisecho'cho, ingima pañamba ñotsse in'jan Pablo su'choma. Nane Lidia tsu Tiatira canqqe'su pushesu, ñotssia cu'a sarupama chavaen'su. Tise tayo Chigave in'jansi Na'suja Lidia injama'choma in'jaen cuintsu ñotsse pañañe. ¹⁵Tsomba tise fetiyesi poi'yi'cco tise tsa'osundeccu'qqe fetiye'fa. Tsa'caen fetiyepa Lidiaja ingima ttu'sepa su: —Ña Na'su Jesúsve ñoa'me in'jansi atte'ta ingi tsaoni jipa can'jen'faja. Tsa'caen susi gi tise'pattini can'jen'fa.

Pablo, Silas vana'jen'cho

¹⁶Tsomba fae a'ta ingija Chigama ñajan'jeni jayipa fae chu'a pushesu conda'su cocoya ca'ni'choma cachui'fa. Tsa pushesuja jai'ngae daya'choma condaseye osha. Tsa'caen condasesi tise patróndeccuja ñotsse gana'fa. ¹⁷Tsa pushesu tsu Pabloma, ingima'qqe omboemba qqen fundondo'e afa'je:

—¡Vandeccuta tsu ñoa'me Joccapitssia Chigama shondosundeccu! ¡Que'linga tsu condase'je'fa ma'caen ccusha'faya'chone!

¹⁸Qquen tsu poi a'ta ingima fundondo'e afa'je. Panshaen tsa'caen afaasi Pabloja iyicca'yepa piyicamba cocoyama su:

—Jesucristo iniseningae gi quema manda, ¡jooquitssija va pushesu'ye! Tsa'caen mandasi tse'faei'ccuyi cocoyaja somboin ja.

¹⁹Tsa'caen tsonsi tsa pushesu jai'ngae daya'choma condaseye oshambisi tise patróndeccuja iyicca'ye'fa tise'pa tsai'ccu gana'jen'choma anttiansi. Tsa'caen iyicca'yepa Pablo, Silasma'qqe indipa canqqe atandundunga qqitssa anga'fa nasundeccunga. ²⁰Tsa'caen ñoquiansundeccunga angapa Pablo Silasma ccutsiamba su'fa:

—Vandeccuja, israendeccu tsu. Ingi canqqe'su aindeccuma tsu qqejeccoen'fa. ²¹Nane faesu atesian'choma atesian'fa. Ingi romanondeccuja tsama paña'ma tsa'caen tsoñe osha'fambi.

²²Tsa'caen poi'cco a'i su'fasi ñoquiansundeccuja Pablo, Silas ondiccu'jema chitta isupa oshichhaemba quini'cco'ccu ochhachhaye manda'fa. ²³Tsonsi tsain'bitsse ochhachhapa picco'je'cho ettinga qqitssa ca'nian'fa. Toya'caen tsu manda picco'je'ttima coira'suma, cuintsu ñotsse coiraye sombo'fasa'ne. ²⁴Tsa'caen mandasi tsa coira'suja Pablo Silasma enttinge'su cuartonga ta'etsse picco. Toya'caen tise'pa tsu'ttema'qqe yoqqian indian, indian'cho quini'congga.

²⁵Tsonsi ñoa'me enttinge cose Pablo, Silas Chigama ñajamba Chigane settapoen'choma settapoen'jensi poi'cco piccoye'chondeccu paña'jen'fa. ²⁶Tse'faei'ccuyi quia'me andeja oya. Tsa'caen oyasi piccoje'cho etti'qqe quia'me oya. Pa'cco sombo'tti'qqe fettaye. Toya'caen poi'cco piccoye'chondeccuma indian'cho candena'qqe ccupaye. ²⁷Qquenyapa, picco'je'cho ettima coira'suja pa'cco sombo'tti fettaye'choma atepa, poi'cco piccoye'chondeccu somboin ja'fa, qqen in'jamba tisuma fi'ttiye sundaro matichima isu. ²⁸Tsa'ma Pabloja quia'me afapa su:

—¡Tisu pajama! Ingija poi'cco gi va'tti can'jen'fa.

²⁹Coira'suja tuñoma ñajamba butto ca'ni. Butto ca'nimba ttun'dundu'jeve dyopa Pablo, Silas tsutteccofanga ccaru dyai. ³⁰Tsomba tise'pama somboemba ñajampaña:

—Nasundeccu, ¿ma'caen gi tsoña ccushaya'chone'jan?

³¹Tsa'caen susi Pablo, Silas'qqe su'fa:

—Na'su Jesucristove in'jamba qui ccushaya. Nane que, que tsa'osundeccu'qqe tsu ccusha'faya.

³²Qquen supa tisenga, poiye'cco tise tsaoni can'jensundeccunga'qqe, Jesúsne ñotsse condase'choma condase'fa. ³³Condase nanisi toya cose'yi coira'suja Pablo, Silas ñacca'ttima ca'shi. Tsa'caen ca'shipa tse'faei'ccuyi coira'suja tisupanaccui'ccu fetiye'fa. ³⁴Tsa'caen fetiyepa tise tsaoni Pablo Silasma angapa o'fian. Nane coira'suja, poiye'cco tise tsaoni can'jensundeccu'qqe, Chigave in'jamba ñoa'me avujatssi'fa.

³⁵Ccaqui toya sinte'yi ñoquiandsundeccuja sundarondeccuma manda'fa cuintsu japa coira'sunga qqen conda'faye: “Tsa indiyechondeccuma fettamañajan” ³⁶Tsa'caen su'fasi coira'suja Pablo, Silasnga qqen conda:

—Ñoquiandsundeccu tsu ñama manda'fa que'ima fettamañañe. Tsa'cansi qui ja'ñojan opatsse jaye osha'fa.

³⁷Tsa'ma tsa'caen pañamba Pabloja sundarondeccuma su:

—Ingi'qqe Romano gobierno afe'cho cedulama an'bian'fa. Tsa'can'ma ñoquiandsundeccuja, jongoesu egae tsincon'choma attembi'ma, ingima ochhachhapa picco'je'cho ettinga picco'fa. Pa'o a'i caña'jen'ni tsa'caen tsomba ¿ma'caen tsu ja'ñojan a'tutsse somboeñe in'jan'fa? ¡Me'i! Cuintsu ja'ñojan tise'payi jipa somboen'gi'faja.

³⁸Tsa'caen su'fasi sundarondeccuja japa ñoquiandsundeccunga Pablo su'choma conda'fasi nasundeccuja dyo'fa. Nane Pablo, Silas'qqe Romano gobierno afe'cho cedulama an'bian'fa qqen pañamba dyopa ³⁹ji'fa Pablo, Silasma afapa ñoquiañe. Tsa'caen ñoquiañe afapa somboemba su'fa cuintsu canque'ye sombopa ccani ja'faye. ⁴⁰Tsa'ma picco'je'cho'ye sombopa Lidia tsaoni jaja'fa. Tseni japa faenga'su Jesúsve in'jan'chondeccui'ccu ccase bopa Chiga Aya'fama candusian'fa. Candusian nanimba ccani jaja'fa.

Tesalónica'su qqejian'fa'cho

17 ¹Filiposne sombopa Anfípolis canque Apolonia canquema'qqe panshamba Pablo'paja Tesalónica canqueni napi'fa. Tse'tti tsu jin israe'su Chigane atesian'jen'tti. ²Pabloja tisu in'janquia'caen sema'ma'qquia a'ta tse'ttinga ca'nimba candusian. Tres avujaquive tsa'caen sema'ma'qquia a'ta tseni candusian. ³Nane tayopi'su Chiga Aya'fa su'choma cambia afapa ñoa'me tansintsse condase ma'caen Chiga in'jan'cho Cristo vanamba paya'chone; toya'caen tsa'caen papa ccase ququendya'chone. Tsa'caen condasepa Pabloja su:

—Va ña que'inga condase'cho, tsa Jesús, tsu Chiga in'jan'cho Cristoja.

⁴Tsa'caen condasesi majan israendeccu pañamba in'jan'fa. Tsa'caen in'jamba Pablo, Silasi'ccu fae'ngae jacan'fa. Toya'caen tsain'bio Chigave in'jan'cho griegondeccu'qqe Cristone pañamba in'jan'fa. Tsain'bitssi pushesu joccapitssiandeccu'qqe pañamba in'jan'fa. ⁵Tsa'ma in'jambi'choa israendeccuja se'pipa iyicca'ye'fa. Iyicca'yepa canque atandundunga

japa a'li noe'sundecuma'qqe ttu'se'fa. Ttu'sesi ji'fasi pa'o tsendecuma iyicca'yian'fa cuintsu qqejian'faye. Tsendeccu tsa'caen qqejiansi poi'yi'cco tsa canqquesundeccu'qqe Pablo atesian'jen'chone iyicca'yepa qqejiamba Jasón tsaoni jaja'fa. Nane Pablo'pama somboemba afeye in'jan'fa cuintsu nasundeccu ma'caen tsoñe in'jan'da tson'faye. ⁶Tsa'ma Pablo'pama attempipa Jasónma, faesu Jesúsve in'jan'chondeccuma'qqe indi'fa. Indipa anga'fa canqqe nasundecunga. Tseni angapa fundondo'e afa'je'fa.

—¡Tsa Pablo'paja ñoa'me poi ande'su aindecunga qqenjiandsundeccu, ja'ñojan vani'qqe ji'fa! ⁷Va Jasón tsu tise'pama in'jansi tise tsaoni can'jen'fa. ¡Poi'yi'cco tsendeccu tsu Romano na'su César manda'choma ccaningae tson'jen'fa! ¡Nane faesu, tsa Jesús ñoa'me'qqe na'su qqen tsu su'fa!

⁸Tsama pañamba canqqe nasundeccu'qqe qqejecco'fa. ⁹Tsomba Jasón'pama somboeña'cho corifin'dima isupa tise'pama fettamoen'fa.

Bereandeccu ñotsse paña'fa'cho

¹⁰Tsequi cose faengasundeccuja Pablo, Silasma manda'fa cuintsu Berea canqqueni ja'faye. Tsonsi japa napipa israe Chigane atesian'jen'ttinga ca'ni'fa. ¹¹Bereandeccu tsu Tesalónicandecuma ti'tsse injama'pandequia. Tsa'camba tsu tise'pa injama'cho ñoa'me avujatsse Chiga Aya'fama paña'fa. Tsa'caen pañamba poi a'ta tayo'su Chiga Tevaen'jema tta'tta'fa Pablo ñoa'me su'chove atesuye. ¹²Tsa'caen pañamba tsain'bitssi israendeccu in'jan'fa. Toya'caen joccapitssia griego pushesundeccu, tsandiendeccu'qqe tsain'bio pañamba in'jan'fa. ¹³Tsa'ma Tesalónica'su israendeccuja paña'fa Pablo Bereani'qqe Chiga Aya'fama condase'je'choma. Tsa'caen pañamba tise'pa'qqe Bereasundecunga jipa majama ccaningae in'jaemba qqejeccoen'fa. ¹⁴Tsa'caen tson'jen'fasi attempa faenga'su Jesúsve in'jan'chondeccuja junde Pabloma mandamoen'fa cuintsu marni jaye. Tsa'ma Silas, Timoteo'qqe toeni shanda'fa. ¹⁵Tsonsi Pabloma angasundeccuja tisema anga'fa Atenas canqqueni. Tseni japa Pabloja tisema angasundecuma manda cuintsu toequi japa Silas, Timoteo utatsse jiye conda'faye. Tsa'caen mandasi toequi ja'fa.

Pablo Atenas canqqueni can'jen'cho

¹⁶Tsonsi Pabloja Atenasni Silas, Timoteove ronda'jepa osha'cho a'li ñoña'cho chigama atte. Attempa tseni'su aindecune mende'yepa injama'cho tsosipie ñombi'ye. ¹⁷Tsa'caen in'jamba israe Chigane atesian'jen'ttinga ca'nimba israendecunga toya'caen cca'li Chigave in'jan'chondeccunga condase. Toya'caen poi a'ta canqqe atándundu'ye jacamba majama cachui'ja tsai'ccu condase. ¹⁸Majan tisei'ccu cachuicco'chondeccuta tsu epicoro in'jan'choma atesiansundeccu. (Tsendeccuja “injanga canseya'cho” qqen in'jamba atesian'jen'fa.) Toya'caen majan faesu

tise'ccu cachuicco'chondecu tsu estoico in'jan'choma atesiansundeccu. (Tsendeccuja “osha'cho tsaveqqe'su” qquen supa tsa'caen atesian'jen'fa.) Tsendeccu Pabloma cachuipa condaseccoye ashaen'fa. Majandeccuja su'fa:

—¿Mingae afa qquen tson'jemba tsu vaja qqejeccan?

Toya'caen faesuja su'fa:

—Vata tsu faesu chigane condase'su.

Nane Pabloja Jesúsne, Jesús papa ccase qqwendya'chone afasi tsu tsa'caen su'fa. ¹⁹Tsa'caen supa Pabloma anga'fa tise'pa bo'jeni –Areópago qquen inisiani. Tseni angapa tise'ma qquen ñajampaña'fa:

—Ingija tansintsse pañañe in'jan'fa va que cuname atesian'jen'choma. ²⁰Nane ñoa'me qui ccaningae atesian'jen. Minguite'qqe gi ingija tsa'caen paña'fambi. Tsa'camba gi ñotsse pañañe in'jan'fa jongoesune tsu va atesian'choja su.

²¹Nane tsa'caen tsu Atenasundeccu, tseni canjen'su Atenasumbindequua'qqe canse'fa. Poi a'ta cuname condase'choma pañamba cca'inga condaseye in'jamba tsa'caen canse'fa.

²²Tsa'camba ñajampaña'fasi Pabloja Areópagondecu bo'fa'cho enttingenga ccutsupa su:

—Atena'su tsandiendeccu, tayo gi atte que'i in'jan'choma. Ñoa'me sefacconi'su in'jan'chove qui in'jamba tta'tta'je'fa. ²³Toya'caen jacamba que'i ñajan'jen'ttima atepa gi fae oque oraen'je'choma atte qquen tevaen'choma: “Faesu chiganga”. Que'ita injanga faesu chiga jinsa'ne dyojopa tsa'caen ñajan'jen. Tsa'ma ñanda gi tsa que'i atesumbeyi in'jan'cho Chigane que'inga condaseye tson'jen.

²⁴Tsa Chigayi tsu ñoa'me andeve, osha'cho tsani can'jenqqe'suve agattoen'su Chiga. Tise tsu ñoa'me ande, sefaccone na'su. Tsaja a'i tsao'ña'cho tsaoni can'jembi'choa. ²⁵Tiseja osha'choma oshachosi a'ija Tisema fuitaye osha'fambi. Nane Tiseja osha'choma inginga afe'su tsu, ingi canse'pa, ingi qqwendya'pama'qqe.

²⁶Tise tsu fae a'i'ccu poiyl'cco a'ima atapoen cuintsu poi andeni japa canse'faye. Tise tsu ante ma'ttinga a'i cansepa, toya'caen minga'ni'qqe cansepa ²⁷cuintsu Chigave tta'tta'faye; nane jongoesuve tta'ttapa vasescamba atequua'caen cuintsu Chigave in'jamba atesu'faye. Tsa'ma ñoa'me tsu Chigaja ingine biani can'jembi. ²⁸Nane Chiga'ye gi oyapa jacamba canse'fa. Majan que'i Atenasumbe settapoen'bama tevaensundeccuja qquen su'fa: “Ñoa'me gi ingija Chiga dushundeccu'fa.” ²⁹Chiga dushundeccuve'can'da qui que'i in'janquua'caen in'jan'fambiyecan. ¿Ma'caen tsu Chigaja cori, totoa cori, patuma ñoña'choya? Nane a'ija aquia injanga tisu injama'choi'ccu in'jamba tsa'caen ñoña'fa. ³⁰⁻³¹A'ija toya Chigama atesumbi'te injanga canse'fasi Chigaja tsama attembi'quua'caen acque'pa. Tsa'ma ja'ñojan ccaninga tsu. Chiga Quitsaja tayo tsu ante maqui a'ta poi ande'su a'imbe injama'choma tansintsse somboeña'chove. Tsa'camba tsu ja'ñojan manda cuintsu poi ande'su a'i tise'pa egae tsincon'choma catiye in'jan'faye. Nane Chigaja tayo tsu fae a'ima manda ante injama'choma somboen'suve. Tiseja tsama pa'cho'ye qqwendyaen poiyl'cco a'inga ñoa'me canjaeñe.

³²Tsa'caen Pabloja pa'choma ccase qquendyaen'chone afasi majan pañasundeccuja feña'fa. Tsa'ma cca'indeccuja su'fa:

—Jai'ngae gi tsane ccase paña'faya.

³³Tsa'caen su'fasi Pabloja anttepa somboin ja. ³⁴Tsa'ma majandeccuja Pabloi'ccu fae'ngae japa Jesucristove in'jan'fa. Nane tsendeccu'suta tsu fae'ccoja, Dionisio qquen inisecho'cho –tsaja Areópago'su a'i; toya'caen fae pushesu, Dámaris qquen inisecho'cho. Toya'caen faesundeccu'qqe in'jan'fa.

Pablo Corintoni can'jen'cho

18 ¹Tsa'caen tsomba Pabloja Atenasne Corinto canqueni ja. ²Tsenima cachui fae israe'su a'i, Aquila qquen inisecho'choma. Tsa tsu Ponto ande'su a'i. Tiseja, tise pushe Priscilai'ccu tseyi Corintoni jipa can'jen'fa. Nane ti'tsse'tssia na'su, Claudio, Roma canque'ye poi israendecuma teya mañasi tsu Italia ande'ye sombopa Corintoni japa can'jen'fa. Pabloja tsendeccuni can'su japa ³fae'ngae tisia'caen carpave ñoñasundeccupa tsendeccui'ccu can'jemba fae'ngae sema'jen'fa. ⁴Tsa'caen can'jemba poi sema'ma'qquia a'ta israe Chigane atesian'jen'ttinga japa condasepa a'ima in'jaen Jesucristone. Majan israendecunga majan griegondeccunga'qqe condasepa in'jaen.

⁵Tsomba tse'i Silas, Timoteo'qqe Macedoniane ji'fasi Pabloja Chiga Aya'fama condase'jeyi canse “Jesúsja Chiga in'jan'cho Cristo tsu” qquen israendecunga canjaeñe. ⁶Tsa'ma israendecuja Pablo atesian'jen'choma chi'gapa afaseye ashaen'fa. Tsa'caen afase'fasi Pabloja tise ondiccu'jema fanttundu, tise'pama tsangae catipa jayi qquen canjaeñe. Tsa'caen tsomba su:

—Tisupayi qui shacapa'fa que'i tsangae catiyeya'chove. Ñajan que'ine shacapa'bi gi. Ja'ñojan israembindeqquianga gi japa condaseye.

⁷Tsa'caen supa sombopa Justo tsaoni ja. Tsa Justo tsu Chigave in'jan'cho. Tise tsa'ota tsu israe'su Chigane atesian'jen'tti'ccu pporotssi.

⁸Toya'caen Chigane atesian'jen'tti'su na'su, Crispoja, Na'su Cristove in'jansi poiyl'cco tse'tti'sundeccu'qqe in'jan'fa. Toya'caen tsain'bio Corinto canquesundeccu Chiga Aya'fama pañamba Jesúsve in'jamba fetiye'fa. ⁹Tsa'caen tsonsi Na'su Jesúsja cose Pablona attiamba su:

—Dyombe'yi condaseja. Ziyajama. ¹⁰Ña gi quei'ccu can'jen.

Majañi'qqe pporaemba quema dañeñe osha'faya'bi. Tsain'bitssi va canque'su a'i tsu ñambe'fa.

¹¹Tsa'caen susi Pabloja Corintoni fae canque'fa pa'cco faesu enttingeve tseni can'jen. Can'jemba Chiga Aya'fama tsendecunga atesian'jen.

¹²Tsa'ma Galión, Acaya ande'su governororve dasi Corinto'su israendecuja bopa Pabloma indi'fa. Indipa na'su governoror dyaipa'chonga angapa ¹³su'fa:

—Va tsandieja ma'caen Chigama in'jan'faye manda'chone ccaningae tsu atesian'jen.

¹⁴Tsa'caen su'fasi Pablo afaye tson'jen'ni Galiónjan israendecuma su:

—Israendeccu, va a'i egae jinchopa ñoa'me egae tsinconsi que'i afa'choecan'da gi que'i su'choma pañañe'can. ¹⁵Tsa'ma que'lja aqquia aya'fa su'chone, inisene, tisumbe manda'chone qui afa'fa. Tsane afa'ta que'iyi ñoña'faja. ¿Ma'caen gi ñajan tsesune afapa injama'choma somboeña?

¹⁶Tsa'caen supa tise dyai'ttie poiyl'ccoma tteyamaña. ¹⁷Tsa'caen tteyasi poiyl'cco griegondeccu iyicca'yepa Sostenesma qquitssa indi'fa. Tsaja israe Chigane atesian'jen'tti'su na'su. Tisema indipa tsse'tsse'fa na'su Galión caña'jen'ttinga. Tsa'ma na'suja tsa'caen tson'jen'fa'choma attembiqquia'caen ccutsu.

Pablo Antioquíani jipa ccase ja'cho

¹⁸Tsonsi Pabloja bo'tsse Corintoni can'jemba jaye ashaen. Jayipa fae'ngae in'jan'chondeccuma chigambiamba barconga otse Siria andeni jaye. Toya'caen Priscila, Aquila'qqe Pablo'ccu jaja'fa. Toya otsembi'te Cencrea canqueni can'jemba Pabloja asettu'je'choma canjaeñe tise tosema cha'ttian. ¹⁹Tsa'caen tsomba Cencreane Efesoni ja'fa. Tseni napipa Pabloja Priscila, Aquilama'qqe cati. Tsa'ma toya Efesone sombombi'te israe Chigane atesian'jen'ttinga japa tseni'su israendeccu'ccu condase.

²⁰Tsonsi pañamba tsenisundeccuja Pabloma su'fa cuintsu tise'pai'ccu bo'tsse can'jeñe. Tsa'caen su'fasi Pabloja in'jambipa ²¹jaye tson'jemba su:

—Ñajan Jerusaléni gi jaya'cho, fiesta a'ta tseni can'jeñe. Tsa'ma Chiga in'jan'ninda gi ccase que'ini jiya.

Tsa'caen supa Efesone barconga otsepa ja ²²Cesarea canqueni. Tseni napipa Jerusaléni ja fae'ngae Jesúsve in'jamba bo'je'chondeccuma chigambiañe. Tsa'caen chigambiamba Antioquía canqueni ja. ²³Tseni bo'tsse can'jemba ccase sombopa cca'tti cca'tti jacan pa'cco Galacia andeni, pa'cco Frigia andeni'qqe. Tsa'caen jacamba tseni'su fae'ngae Jesúsve in'jan'chondeccuma candusiamba in'jaen.

Apolos Efesoni candusian'jen'cho

²⁴Pablo tsa'caen ccani jaca'ni fae israe'su a'i, Apolos qqen inisecho'cho, Efesoni ji. Tsaja Alejandría canque'su a'i tsu. Tiseja Chiga Tevaen'jema ñotsse atesupa ñoa'me ñotsse afa'je. ²⁵Na'su Jesúsne tayo pañamba Chiga Qquendya'pa tisema in'jaensi quia'me candusiañe ashaen. Candusiamba tansintsse Na'su Jesúsne condase. Tsa'ma pa'tssima toya atesumbipa aqquia Juan atesiamba feti'choveyi atesian'jen. ²⁶Apolos tsa'caen Efesoni jipa israe Chigane atesian'jen'ttinga tsa'caen dyombi'tsse atesian'jensi Priscila, Aquila'qqe tisema paña'fa. Tsa'caen pañamba Apolosma cca'ttinga angapa ti'tsse a'tatsse conda'fa Chigane ma'caen jincho'choma. ²⁷Can'jemba Apolos Acaya andeni iseye in'jansi Efeso'su fae'ngae Jesúsve in'jan'chondeccu tisema fuitsepa moen'fa. Toya'caen Acaya'su Jesúsve in'jan'chondeccunga tevaen'fa cuintsu Apolos japa afasi ñotsse in'jamba paña'faye. Tsa'caen fuite'fasi japa napipa Acayasundeccuma fuite'je, poiyl'cco majan Chiga in'jaensi in'jan'chondeccuma. ²⁸Nane poiyl'cco a'i paña'jen'ni quia'me candusiamba israendeccu'ccu quia'me afa'cco. Tsa'caen

afaccopa Chiga Tevaen'jen su'choi'ccu “Jesúsja Chiga in'jan'cho Cristo tsu”
qquen canjaemba israendeccoma patsu.

Pablo Efesoni can'jen'cho

19 ¹Apolos toya Corinto canqueni can'jen'ni Pabloja sa'ngae
ccotta'cco'ye jacamba Efesoni napi. Tseni napipa majan Jesúsve
in'jan'chondeccuma cachuipa ²iñajampaña:

—¿Que'ija Jesúsve in'jan'da ti qui Chiga Qquendyapama isu'fa?

Tsa'caen iñajampañasi su'fa:

—Ñoa'me gi va Chiga Qquendya'pa jinchove ingija pañambipa atesu'fambi.

³Tsonsi Pabloja iñajampaña:

—Tsoin'da ¿jongoesuma qui pañamba in'jamba fetiye'fa?

Tsendeccuja su'fa:

—Juan atesian'choma pañamba gi fetiye'fa.

⁴Tsa'caen su'fasi pañamba Pabloja su:

—Juan feti'chota tsu a'i tisupa egae tsincon'choma catiye in'jansi
feti'cho. Tsa'ma toya'caen tsu Juanjan poiye'cconga conda tisema omboe
jiya'chove tsu ñoa'me in'jaña'cho. Nane tsaja Jesucristo tsu.

⁵Pablo tsa'caen susi pañamba Na'su Jesús a'ive dapa fetiye'fa. ⁶Fetipa Pablo
tise tive'ccu tsendeccoma pporaensi Chiga Qquendya'paja tise'panga ca'ni. Chiga
Qquendya'pa tise'panga ca'nimba afaensi faesu aya'fangae afa'je'fa. Toya'caen
Chiga in'jaensi condase'choma condase'fa. ⁷Tsendeccuta tsu doce tsandie.

⁸Tsomba tse'i Pabloja israe'su Chigane atesian'jen'ttinga ca'nimba Chiga
aindecuve daya'chone candusian. Nane tres ccovu pa'cco tsu tsa'caen
dyombi'tsse candusiamba aindecuma in'jaen. ⁹Tsa'ma majan a'ija injama'cho
shacapa in'jan'fambi. Tsa'camba poiye'cconga Jesúsne ñotsse condase'choma egae
afa'fa. Tsa'caen afa'fasi Pablo, majan fae'ngae Jesúsve in'jan'chondeccu'qqe,
sombopa Tiranombe escoera tsaoni jaja'fa. Tseni tsu poi a'ta Pabloja Jesucristone
atesian'jen. ¹⁰Nane tsa'caen dos canque'fave atesian'jensi poiye'cco Asia ande'su
a'i, israendeccu, griegondeccu'qqe, Na'su Jesúsne ñotsse condase'choma
pañafa. ¹¹Toya'caen Chiga Quitsa Pabloma fuitesi tsu osha'cho ccaninga've
Chiga tson'jen'choma canjaen. ¹²Nane Pablo pporaen'cho pañero, opoi'je'cho
sarupama'qqe pajisundecunga anga'fasi pporaen'da tsu tise'pa paqqe'suma
ccushafa. Toya'caen a'inga ca'ni'cho cocoyama'qqe tsa'caeni joqqitssian'fa.

¹³Tsa'ma majan israe'su coragandeccu cca'tti cca'tti jacan'fa cocoyama
joqqitssiañe. Tsendeccu asi'ttaemba Na'su Jesús inisema afacan'fa
cuintsu cocoya joqqitssiye. Qquen tsu afa'fa:

—Jesús iniseningae –tsa Pablo candusian'cho Jesús iniseningae gi
manda jjoqqitssija!

¹⁴Tse'ttini can'jen israe'su Chigama afa'su na'su, Esceva qquen
inisecho'cho. Tise siete dutssiyendeccu tsu tsa'caen Jesús inisema
afacan'fa. ¹⁵Tsa'caen afa'fasi cocoyaja su:

—Jesúsma gi atesu. Pabloma'qqe gi atesu. Tsa'ma ¿jongoesu inise qui que'ija?

¹⁶Qquen supa cocoya ca'ni'cho tsandieja tise'panga butto ancamba poiyl'ccoma patsu. Nane tise'pama patsupa iñacaensi chu'cco'yi tsa'o'ye butto sombo'fa. ¹⁷Tsa'caen cocoyanga patsuye'fa'choma pañamba poiyl'cco Efesosundeccu, majan israendeccu, majan griegondeccu'qqe, ñoa'me dyo'fa. Tsa'caen dyopa Na'su Jesús inisene ñotsse afa'fa.

¹⁸Tsain'bitssi a'i, tayo Jesúsve in'jamba jipa condase'fa tise'pa tayopi egae tsincon'choma. ¹⁹Toya'caen majan tayoe coragandeccu tise'pa coraga tevaen'jema boñamba poiyl'cco a'i caña'jen'ni si'ngenga oque'fa. Tsa tevaen'jen bare'choma agatto'nijan cincuenta mil rande dracma corifin'dive tsu bare. ²⁰Tsa'caen tsu Chiga Aya'faja ti'tsse'tsse afaye'ñaccapa ti'tsse'tssi a'ive in'jaen.

²¹Tsa'caen tsonsi Chiga Qquendya'pa Pabloma in'jaensi asi'ttaemba Jerusaléni jaye in'jan. Nane Macedoniangae Acayangae shoquendí jaye tsu in'jan. Tsa'caen asi'ttaemba su:

—Jerusaléni japa gi Roma canqueni'qqe jaya'cho.

²²Tsomba dos tisema fuitesundeccuma, Timoteo Erastoma'qqe mandamoen Macedoniani. Tsa'caen manda moemba Pabloja toya re'riccone Asiani can'jen.

Efeso'su Dianame in'jan'chondeccu

²³Tseite tsu Efeso'su aindeccu Chiga Aya'fa su'choma pañamba qquejian'fa. ²⁴Fae a'i, Demetrio, tsa tsu poiyl'ccoma qquejcco. Tiseja totoa cori ñoña'su na'supa faesundeccuma'qqe semoen chiga Dianambe chipiri tsa'oacan'chocoe totoa corima ñoña'faye. Tsa'caen semoensi tsu tsain'bitsse ñoñasundeccuja gana'jen'fa. ²⁵Demetrioja tsendeccuma ttu'sepa faesu tsa'caen ñoñasundeccuma'qqe ttu'se. Poiyl'cco bosi Demetrioja su:

—Tsandiendeccu, que'l'qqe qui atesu'fa Dianame ñoña'choma semamba gi ñotsse ganamba canse'fa. ²⁶Tsa'ma ja'ño que'ija pañamba atte'fa va Pablo tson'jen'choma. Tiseja vani, pa'cco Asia andeni'qqe tsu atesian'jen “A'i ñoña'cho chigaja ñoa'me chigambi.” Tsa'caen susi tsain'bitssi a'i tsama pañamba Dianama catipa tsave in'jan'fa. ²⁷Injama'tse qquen ingi semamba gana'jen'choma antte'sa'ne; Dianama'qqe chi'gaquia'caen a'i tisema in'jambisa'ne. Nane pa'cco Asia andeni, pa'cco a'i can'jen'cho andeni'qqe chiga Dianama ja'ñojan ñotsse in'jan'fa.

²⁸Tsa'caen susi pañamba poiyl'cco iyicca'yepa fundo'fa:

—¡Ñoa'me'qqe ti'tsse'tssia tsu Efeso'su chiga Diana!

²⁹Tsa'caen fundo'fasi pa'cco canque'su a'i qquejccopa canque enttinge'su bo'je'ttinga bo'fa. Bopa dos Pabloi'ccu jacansundeccuma qquitssa indipa anga'fa. Tsendeccuja Macedonia'su a'i, Gayo, Aristarco, qquen inisecho'chondeccu. ³⁰Pabloja tseni japa a'i bo'fa'chonga ca'nimba afaye in'jansi Jesúsve in'jan'chondeccu se'pi'fa. ³¹Toya'caen majan Asia ande'su nasundeccu'qqe Pabloma ñotsse in'jamba condasundeccuma Pablóni mandamoen'fa cuintsu ca'nimbe cañe condaye tisema

iyiccayesundeccu indisa'ne. ³²A'i bo'fa'choja majan a'i faesu su'chove su'fasi faesuja ccaningae su'fa. Nane tsa'caen qquejiamba majanjan atesu'fambi jongoesune bo'chove. ³³Tsonsi israendeccu Alejandroma mandasi majan bo'je'chondeccuja tise ma ttu'se'fa cuintsu a'i bo'fa'chonga afaye. Tsa'caen ttu'sesi Alejandroja ccutsupa pa'ccoma tansintsse condaye tson'jemba tive'ccu a'ima sepi'pian. ³⁴Tsa'ma bo'fa'chondeccuja Alejandroja israe'su a'isi attepa ti'tsse fundo'fa. Nane fae'be aya'fa'caeni dos horave fundo'fa:

—jÑoa'me ti'tsse'tssia tsu Efeso'su chiga Diana!

³⁵Tsonsi Efeso canqqe'su teniente jipa aindeccuma ziyaemba su:

—Efeso canqqe'su tsandiendeccu, poiya'cco a'i tsu atesu'fa Efeso canqqe tsu ti'tsse'tssia chiga Dianambe ettima coira'su. Toya'caen sefaccone amppiamoen'cho Diana'can'cho'a patuma'qqe gi coira'je. ³⁶Tsa'cansi ziya'faja. Me'l'on tsu tsane ccaningae afaya'chove. Nane ñotsse in'jambe'yi tson'fajama. ³⁷Va que'i vani i'fa'cho tsandiendeccuja chiga Dianane egae afa'fambi ni tise tsa'oma dañof'fambi. ³⁸Tsa'cansi Demetrio tisei'ccu ñoñasundeccu'qqe majan a'i egae tsincon'choma condaye in'jan'ninda ñoquiandsundeccu tsu can'jen'fa maqui a'ta osha'choma pañañe. Tseni japa egae tsincon'chone condasecco'faja. ³⁹Tsa'ma jongoesune ti'tsse condaseye in'jan'da ronda'je'faja maqui a'ta nasundeccu bopa paña'jen'ni afaye. ⁴⁰Nane ñoa'me ti'tsse'tssia nasundeccu ingi ja'ño a'ta qquejian'choma pañamba ingima iyu'nijan ¿ma'caen gi conda'faya? Jongoesu qqen condaya'chove ingi ja'ño bo'chone me'l'anján.

⁴¹Qquen afa nanimba poiya'ccoma mandamoen.

Macedonia, Greciani'qqe ja'cho

20 ¹Tsomba qquejian'cho ziya'fasi Pabloja Jesúsve in'jan'chondeccuma ttu'sepa candusian. Candusian nanimba chigambiamba Macedoniani ja. ²Macedonia ande'ye jacamba tseni'su aindeccuma candusian in'jaemba Grecia andeni napi. ³Tseni napipa tres ccovuve can'jen. Tsomba Siriani jaye pan barconga otseye tson'jemba israendeccu tise ma fi'ttiye in'jan'fa'choma paña. Tsa'caen pañamba asit'eaemba sa'ngae toequi Macedoniani jaye in'jan. ⁴Tsomba jayisi faesundeccu'qqe tisei'ccu fae'ngae jaja'fa. Berea'su a'i, Sópater –tsa Pirus dutssi'ye– tsu ja. Tesalónica aindeccu Aristarco, Segundo'qqe jaja'fa. Toya'caen Derbe'su a'i, Gayo, tsu ja. Timoteo, toya'caen Asia'su aindeccu, Tíquico, Trófimo'qqe tsu jaja'fa. ⁵Tsendeccuja o'tie japa Troasni ingive ronda'je'fa. (Ña Lucas gi Pabloma cachui Filipos canqueni.) ⁶Tsomba gi pan cupana'cco mechoa fiesta pasasi barconga otsepa Filiposne sombopa cinco a'tangae Troasni napi'fa. Napipa o'tie jacansundeccuma cachuipa fae avujaqui pa'cco tseni can'jen'fa.

Pablo Troasni can'jen'cho

⁷Domingo cose ingija poiya'cco bo'fa Jesúsve injan'jeña'cho panma doñamba aña. Pabloja ccaqui sinte'yi jaya'pa poiya'cconga condasé ñoa'me enttinge cose'tsse. ⁸Nane ingija sefani'su cuartonga bopa cosesi tsain'bitssi

tuñoma setsaen'fa. ⁹Tsa'caen bopa fae chu'a tsandie, Eutico qquen inisecho'cho, cuarto ventana'ttini dyaipa pañal'jen. Tsonsi Pablo ti'tsse bia've condase'jesi Euticoja anae'supa ñoa'me ana. Tsa'caen anamba amppi ja tres ppappacco'ye. Tsa'caen amppi jasi andin japa opi jangia'nijan tayo pajin ccui. ¹⁰Tsonsi Pablo'qqe andepa junde tisema pporaemba munsimba su:

—Dyombe can'faja. Toya tsu canse.

¹¹Tsa'caen tsomba Pabloja ccase ansundepa Jesúsve injan'jeña'cho panma doñamba attufaemba afe cuintsu an'faye. An nanimba ti'tsse condasé a'ta. A'tasi sombopa ja. ¹²Chu'a tsandieja tayo qquendyasi tisesundeccu tisema avujatsse tsaoni anga'fa.

Troasne sombopa Miletoni ja'fa'cho

¹³Tsomba Pabloja sa'ngae Asón canqueni jaye in'jansi ingija o'tie barconga otsepa ja'fa. Otsepa marngae Asóni ja'fa, tseni Pabloma cachuiye. ¹⁴Tsomba Asóni Pabloma cachuisi Pablo'qqe otsepa ingi'ccu fae'ngae Mitilene canqueni ja'fa. ¹⁵Tseni sombopa ccaqui a'ta Quó canque isevetssia'ma panshamba ccaqui a'ta Samos canqueni napipa ccattufa'fa. Tsomba Trogilio canqueni ñofaccapa ccaqui a'ta Mileto canqueni napi'fa. ¹⁶Nane Pabloja asi'ttaemba Asia andeni bo'tsse can'jeñe in'jambipa Efesoma tsa'caen panshamba Miletoni ccattufa'fa. Junde tsu Jerusaléni jaye in'jan osha'ta tseni Pentecostés fiestama panshaeñe.

Efeso'su coenzandeccuma ttu'se'cho

¹⁷Tsa'caen Miletoni can'jemba Pabloja manda cuintsu Efeso'su Jesúsve in'jamba bo'je'cho coenzandeccuma ttuséngaye. ¹⁸Ttusengapa i'fasi Pabloja tsendeccunga su:

—Que'ija pa'tssima qui atesu'fa ña que'i'ccu ma'caen canse'choma tseyi Asiani jipa. ¹⁹Nane cca'ima quinsepoembe'yi gi que'i'ccu can'jemba Na'su Jesús in'jan'choma sema. Toya'caen israendeccu ñama fi'ttiye in'jan'fasi vana'je'an'qqe gi inanzaccui'ccu sema. ²⁰Tsa'ma anttembe'yi gi osha'cho ñotssiamá que'inga atesian que'ima fuiteye. Nane pa'o a'i pañal'je'ni toya'caen que'i tsa'onga'qqe gi candusiamba fuite. ²¹Israendeccunga, griegondeccunga'qqe gi condase cuintsu Chiga in'janquia'caen tise'pa egae tsincon'choma catipa ingi Na'su Jesucristove in'jamba cansel'faye. ²²Ja'ño Chiga Qquendya'pa ñama in'jaensi gi Jerusaléni jaya'cho. Ña tseni jasi ñama ma'caen tson'faya'chove ñajan atesumbi. ²³Tsa'ma poi canquenga mani ña jayi'nijan Chiga Qquendya'pa tsu ñanga conda “Indipa picco'fasi qui me'detsse vanaña.” ²⁴Tsa'ma mingavieyi'qqe gi tsane dyombi. Ni paye'qqe gi dyombi. Nane ñoa'me gi in'jan Na'su in'jan'cho sema'bama avujatsse naniñe. Na'su Jesús tsa sema'banga ñama mandasi gi va Chiga ingima in'jan'chone ñotsse condase'choma condase'je.

²⁵¡Que canjan! Ja'ño gi in'jan que'ija ccatsse ñama atte'faya'bi. Nane poi'yi'cco majanga ña Chiga aindeccuve daya'chone conda'chondeccu ccatsse ñama

atte'faya'bi. ²⁶Tsa'camba gi que'inga ja'ño a'ta conda: Ñajan majaneñi'qqe shacapa'bi gi tise'pa tsangae catiye'ya'chone. ²⁷Ni fae afa'choveyi'qqe se'pimbe gi pa'cco Chiga in'jan'choma que'inga conda. ²⁸Tsa'cansi injama'tse tisupa qqesa'ne. Tansintsse atesiamba poi'cco Jesúsve in'jamba bo'je'chondeccuma ñotsse coira'faja. Nane Na'su Jesúsja tisu anjampai'ccu tayo tsendeccuma ccushaen. Tsendeccuma tsa'caen ccushaensi Chiga Qquendya'pa que'ima ttu'sepa manda tsendeccuma coira'suve da'faye. ²⁹Atesu gi ña jasi faesu a'i jipa tsu ttesi putsa'su ovejama dyoña shequianquia'caen tsendeccuma dañone in'jan'faya. ³⁰Nane majan que'i'su tsu enttingenga ccutsupa ñotsse condase'choma ccaningae afopoeña cuintsu majan tisema pañasundeccuja tisia'caen in'jan'faye. ³¹Injama'tse, ñotsse in'jan'faja ña que'i'ccu tres canque'fave can'jemba poi a'ta poi cose quimbingae poi'cco'congongandusian'jen'choma.

³²Ja'ñojan Chiganga gi que'ima ante Tise in'jan'cho Aya'fama pañamba canse'faye. Tise Aya'fa tsu que'ima quiñaene osha cuintsu que'i poi'cco Chiga in'jan'chondeccui'ccu Chiga tsangae canseye afe'choma fae'ngae isu'faye. ³³Ni majambe corifin'dima ni sarupama'qqe gi in'jambi'a. ³⁴Atesu'fa qui que'ija ma'caen ñajan tisu tivei'ccu semamba gana tisu canseyachove; toya'caen ñai'ccu jacansundeccune'qqe. ³⁵Tsa'caen gi que'ima atesian semamba tsu mendeqquiama fuitaya'cho. In'jan'faja Na'su Jesús qquen su'choma: “Afe'su tsu isu'suma ti'tsse avujatsse afe'ya'cho.”

³⁶Tsa'caen supa Pabloja poi'cco'ccu ccarupa fae'ngae Chigama iñajan'fa. ³⁷Poi'cco i'namba Pabloma munsimba chigambiamba mochapa'fa. ³⁸Pablo “Ccatsse ñama atte'faya'bi qui” qquen susi tsu i'na'fa. Tsa'caen i'namba Pabloi'ccu fae'ngae barco duseni ja'fa camoeñe.

Pablo Jerusaléni ja

21 ¹Tsonsi chigambiamba barconga otse'fa. Otsepa tansintsse Cos canqueni jaja'fa. Ccaqui a'ta Rodas canqueni japa Pátara canqueni'qqe napi'fa. ²Tsenima gi atte'fa Fenicia andeni jaya'cho barcoma. Attepa tsanga otsepa jaja'fa. ³Jayipa Chipre anttepo'choma atte'fa. Tsomba tsama pavefanga antte'fa Siria andeni jaye. Tseni napipa Tiro canqueni ccattufa'fa, barco anga'cho andu'choma tseni somboeñe. ⁴Tsonsi Jesúsve in'jan'chondeccuma cachuipa tise'pai'ccu gi fae avujaqui pa'cco can'jen'fa. Chiga Qquendya'pa tseni'su Jesúsve in'jan'chondeccuma in'jaensi Pablomga conda'fa cuintsu Jerusaléni jambe cañe. ⁵Tsa'ma ingija tseni fae avujaquive can'jemba jayifasi tseni'su Jesúsve in'jan'chondeccu, tise'pa pushendeccu, dushundeccu'qqe ingima i moen'fa canque'ye so'mbottsse. Sisipandunduni napipa poi'cco gi ccarupa Chigama iñajan'fa. ⁶Chigama iñajan nanimba chigambianccopa ingi barconga otsesi tsendeccuja tise'pa tsaoni jaja'fa.

⁷Tirone sombopa Tolemaida canqueni napipa tseni'su Jesúsve in'jan'chondeccui'ccu fae a'ta can'jen'fa. ⁸Ccaqui sombopa Cesarea canqueni napi'fa. Tseni napipa gi Felipe tsaoni ca'nimba can'jen'fa. Tsa Felipe tsu Chiga Aya'fama candusian'su. Jerusaléni'su Jesúsve in'jamba

bol'je'cho'su siete fuitesundeccu'su tsu. ⁹Felipe cuatro onque'ngeja toya tsa'ndumbi'choa Chiga tise'pama in'jaensi Chiga su'choma afa'je'fa. ¹⁰Tseni bo'tsse can'jen'ni faesu Chiga Aya'fa afa'su, Agabo qqen inisecho'cho, Judea andene ji. ¹¹Judea andene ingini jipa Pablo utuqui'fama isupa tisu tsu'ttema tisu tivema'qqe tandamba su:

—Chiga Qquendya'pata tsu su: “Qquen tsu Jerusaléni'su israendeccuja va utuqui'fa na'suma tandan'faya. Qquen tandamba tsu israembindequiang afe'faya.”

¹²Qquen pañamba ingija, poi'yi'cco tseni can'jen'chondecu'qqe Pabloma se'pi'fa cuintsu Jerusaléni jambecañe. ¹³Tsa'ma Pabloja su:

—¿Jongoes qui que'ija i'namba ñama ñombi'yan'fa? Na'su Jesús in'jan'ninda gi tisene Jerusaléni tandaña'cho. Toya'caen fi'tti'fa'ni'qqe tisene gi paya'cho.

¹⁴Ya'caen supa Pablo in'jambisi gi anttepa su'fa:

—Cuintsu ma'caen Na'su in'jan'chove tsonjan.

¹⁵Tsomba can'jencapa osha'choma ñoñamba gi Jerusaléni jayi'fa. ¹⁶Jayisi majan Cesarea'su Jesúsve in'jan'chondecu'qqe ingi'ccu fae'ngae jaja'fa. Tsomba tsu ingima anga'fa Mnasón tsaoni, tseni can'jeñe. Mnasón tsu Chipre anttepo'cho'su a'i. Tsaja ñoa'me tsain'bitssi canque'fa Jesúsve in'jamba canse.

Pabloja Santiagoni can'su ja

¹⁷Tsa'caen ingi Jerusaléni napisi tseni'su fae'ngae in'jan'chondecu ingima avujatsse cachuicco'fa. ¹⁸Ccaqui a'ta Pablo ingi'ccu Santiagoni can'su jasi poi'yi'cco tseni'su coenzandeccu'qqe fae'ngae bo'fa.

¹⁹Tsendecuma chigambiamba Pabloja pa'tssima conda ma'caen Chiga Quitsa tisema fuitespa israembindequiam'qqe in'jaemba tson'choma.

²⁰Tsama pañamba Chiga Quitsane ñotsse afapa Pabloma su'fa:

—Ñotssi tsu, faenga'su. Tsa'ma que'qqe pañajan. Tsain'bio israendeccu, ñoa'me diez milma ti'tsse'o, Jesúsve in'jamba Moisés manda'choma'qqe pañamba canseye in'jan'fa. ²¹Tsendecuta tsu qqen in'jan'fa: Queja cca'tti canjen'su israendecunga japa ccaningae atesian'jen. Nane Moisés manda'choma catipa tise'pa dushundecuma chhiyitevaembe'yi ingi a'i nafattu'choma pañambe'yi canse'faya'cho, qqen te qui atesian'jen. ²²Ja'ñojan vani'su aindecu tsu que ji'choma pañamba bo'faya. Bo'fa'nijan ¿ma'caen gi tson'faya? ²³Ingija asi'ttaemba in'jan'fa qqen tsoñe tsu ñotssi: Vani tsu cuatro tsandiendeccu, tise'pa Chiganga sul'je'cho asettu'cho tayo naninge. ²⁴Queja tsendecui'ccu fae'ngae Chiga ettinga japa qui que'qqe asettuquia'caen onjoña'cho. Tsomba tise'pa afepoen'choma'qqe afepoña'cho cuintsu tise'pa tosema chattuya'choe. Qquen tso'ninda poi'yi'cco a'i tsu atesu'faya tise'pa tayoe quene paña'choja aquia afepoen'cho tsu. Toya'caen tsu atesu'faya que Moisés manda'choma ñotsse in'jamba canse'choma. ²⁵Tsa'ma israembindequia majan tayo Jesúsve in'jan'chondecunga gi tayo tevaemba manda'fa ingi asi'ttaemba qqen in'jan'fa'choma: Jongoesu aña'choma a'i ñoña'cho chiganga afe'cho tsu

an'masia. Anjampa'qqe an'masia. Tsifoye tandamba fi'tti'cho aña'cho'qqe an'masia. Tsandienga pushesuma anttembi'choai'ccuja can'jen'masia.

Pabloma Chiga ettinga indi'fa

²⁶Tsomba Pablo tsa cuatro a'ima angapa fae'ngae asettupa onjon'fa. Onjon nanimba Chiga ettini japa conda'fa siete a'ta pasasi tise'pa Chiganga afe'choma afeye.

²⁷Tsa'ma siete a'tave tayo napiji'ni majan Asia ande'su israendeccu Pabloma atte'fa Chiga ettinga. Attepa Pabloma indipa fundo'fa cuintsu poi'cco a'i qqejecco'faye. ²⁸Quen tsu fundo'fa:

—¡Israe'su aindecu, ingima fuite'faja! Va tsu poi andenga japa ega've atesian'su. Egae tsu afa'je ingi aindecune, Moisés manda'chone'qqe, va Chiga ettine'qqe. Taya'caen va Ñotssia Chiga can'jen'choma tsu egae daño, griegondeccuma Chiga ettinga anga ca'niamba.

²⁹Nane Efeso'su a'i, Tróximo, Pabloi'ccu canqueni jacan'choma attepa tsu in'jan'fa, Chiga ettinga'qqe Pabloi'ccu tayo ca'ni'fa.

³⁰Tsa'caen qqejecopa poi'cco a'i buttocoin jipa Pabloma indi'fa. Indipa qquitssa somboen'fa Chiga etti'ye. Qquitssa somboen'fasi tse'faei'ccuyi Chiga etti nasundeccuja manda'fa cuintsu Chiga etti'su sombo'tti piccofin'dima piccoye. ³¹Tayo Pabloma fi'ttiye tson'jen'fa'ni sundaro na'su coronelja paña pa'cco Jerusaléne qqejecco'fa'choma. ³²Tsa'caen pañamba tse'faei'ccuyi sundaroma, tise'pa capitáma'qqe mandapa tise'pai'ccu buttopa ande'fa. Aindecuja coronelma attepa antte'fa Pabloma tssetsse'je'ttie.

³³Tsonsi coronelja catsepa Pabloma indiyé manda; indipa cuintsu dos candenai'ccu tandan'faye. Tsomba inajampaña jongoesu inise tsu Pabloja, tise mingae tsincon'chove'qqe. ³⁴Tsonsi tsa bo'fa'cho'ye majan a'i fae afa'chove fundo'fa. Faesu a'i ccaningae fundo'fa. Tsa'caen panshaen quen'ba'osi coronelja pa'tssima pañañe oshambipa manda cuintsu Pabloma anga'faye sundarondeccu can'jeni. ³⁵Tsonsi Pabloma canchananga napiamba sundarondeccuja ño'a'me tisema opipa anga'fa aindecu panshaen iyicca'yepa indipa fi'ttiye in'jan'fasi.

³⁶Nane poi'cco bo'fa'chondeccu sundarondeccuma omboemba qqen fundo'je'fa: —¡Fi'ttija!

Pabloja tise tson'chone condase

³⁷Sundaro can'jeni tisema ca'niañe tson'jen'fasi Pabloja coronelma inajampaña griego aya'fangae:

—¿Osha ti gi re'riccone afaye?

Coronelja su:

—¿Afayeta ti qui atesu griego aya'fama? ³⁸¿Queta ti qui tsa egipto'su a'imbi? ¿Queta ti qui gobiernoma iyicca'yepa a'i menia cuatro mil chhichhi'ccoi'ccu fi'ttisundeccuma anga'sumbi?

³⁹Tsa'ma Pabloja su:

—Me'i, ñajan israe'su a'i, Cilicia andeni'su. Ñajan Tarso canqqe'su cedulama an'bian'cho a'i gi. Tarso tsu poi a'i paña'jen'cho canqqe. Chigáne ñama antteja a'ima afaye.

⁴⁰Tsonsi coronel anttesi Pabloja canchananga ccutsupa tive'ccu aindecuma ziyaeñe canjaen. Poiyi'cco ñoa'me ziyasi Pabloja hebreo aya'fangae tise'pama afa:
22 ¹—Faengasundeccu, coenzandeccu, ñama paña'faja. Pa'tssima gi condaye in'jan.

²Pablo hebreo aya'fangae afasi pañamba aindecuja ti'tsse ziya'fa. Tsonsi Pabloja qquen afa:

³—Ñajan israe'su a'i. Ñajan Cilicia andeni, Tarso canqqeni isusi gi vani Jerusaléni jipa coen. Gamaliel —tsa poiyi'cco que'i atesu'cho atesian'su— tsu ñama atesian. Nane pa'cco tayopi'su coenzandeccu manda'choma ñoa'me tansintsse atesiansi gi ñajan Chiga in'jan'chove ñoa'me tsoñe in'jan. Nane que'i ja'ño a'ta Tise in'jan'chove ñoa'me tsoñe in'janquia'caen gi ña'qqe tayoe in'jan. ⁴Tayoe ñajan va Jesúsne atesian'choma in'jambipa Jesúsve in'jan'chondeccuma noñangiamba mandian fi'ttiya'ngae. Tsandiendecuma, pushesundecuma'qqe gi indipa candenai'ccu tandamba anga picco'je'cho ettinga piccoye. ⁵Chigama afa'su na'su, poiyi'cco coenzandeccu'qqe ña tansintsse afa'je'choma atesu'fa. Tsendecuja a'ima indiya'cho tevaen'jema ñanga afe'fa Damasco canqqeni'su israendecunga angaye. Tsa tevaen'jema isupa gi Damasconi ja, tseni'su Jesúsve in'jan'chondeccuma indiye. Indipa tandamba Jerusaléni angapa injama'choma somboemba ma'ppiye ja.

Jesucristo tisenga attian'cho

(Tson 9.1-19; 26.12-18)

⁶Tayo Chiga tansinji'ni, Damasconi pan napiji'ni tse'faei'ccuyi sefaccone tsanda veyaeñquia'caen ñanga chanjun. ⁷Andenga amppipa gi paña qquen afa'choma: “Saulo, Saulo, ¿jongoesie qui ñama noñangiamba mandiancan?”

⁸Tsama pañamba gi su: “¿Na'su, majan qui queja?” Tsonsi tiseja su: “Ñañña gi Jesús Nasareno'su. Que ñama noñangiamba mandiancan'cho gi.” ⁹Ñama shondosundecuja sefani'su chanjun'choma atte'ma afa'choma paña'fambi.

¹⁰Ñajan pañamba su: “¿Na'su, ma'caen gi tsoña?” Tsonsi Na'suja su: “Jangipa Damasconi jaja. Tseni jasi tsu quenga condaseya osha'cho que ma'caen tsoña'chove.” ¹¹Sefane tsanda veyaeñquia'caen panshaen a'tatsse chanjuni ña atteye oshambisi tsu faesu ñama shondo'su ña tive'ye fendepa anga Damasconi napiye.

¹²Tseni tsu Ananías qquen inisecho'cho a'i can'jen. Tsaja ñoa'me Moisés manda'choma pañamba in'jansi poiyi'cco tseni'su israendeccu tisene ñotsse afa'je'fa. ¹³Ananías ñama can'su jipa catse ccutsupa su: “Faenga'su Saulo, ccase qui atteye osha.” Tsonsi tse'faei'ccuyi ñajan tisema cambia atte.

¹⁴Tiseja su: “Ingi coenzandecumbe Chiga tsu quema in'jamba ttu'se Tise in'jan'choma pañamba atesuye. Quema tsu ttu'se Tise Ñotssia

Dutssi'yema attepa pañañe.” ¹⁵Quemajan Tisene afa'suve daye tsu ttu'se, poi'cco a'inga condaye que attepa paña'choma. ¹⁶Tsonsi ja'ñojan, ¿jongoesie qui ronda'je? Jangipa fetiyeja. Na'su Jesúsma iñajanjan cuintsu cashiquia'caen que egae tsincon'choma joqquttsiañe.

Israembindeqqianga manda'cho

¹⁷Tsomba tse'i ña Jerusaléni ccase jipa gi Chiga ettini ja Chigama iñajañe. Iñajan'jemba gi paquia'caen dapa ¹⁸Na'su Jesúsma atte. Tiseja ñama su: “Uta'tsseyi Jerusaléne sombopa jaja. Que ñane afasi vani'su aindeccuja paña'ma pañañe chi'ga'faya.”

¹⁹Tsonsi ñajan su: “Na'su, poi'cco tsu atesu'fa ma'caen tayoe ña poi israe Chigane atesian'jen'ttinga japa a'ima indipa picco'je'choma. Toya'caen gi a'ima ma'ppi, majan Queve in'jan'chondeccuma. ²⁰Quene afa'su Estebanma fi'tti'fasi tise anjampa tsansi ña'qqe can ccutsu tsa'caen fi'tti'fa'choja ñotssi qqen in'jamba. Nane ñoa'me in'jamba gi fi'ttisundecumbe ondiccu'jema coira'je, tayo oshichhapa patui'ccu ttovaccoen'jen'fasi.”

²¹Tsonsi Na'suja ñama su: “Queja ccani jaja. Biani israembindeqqianga gi quema moeña.”

Pablo coroneli'ccu condasecco'fa'cho

²²Aindeccuja tsangaeyi Pabloma paña'fa. Tsa'ma tisema israembindeqqianga moeña'cho qqen condasi poi'cco a'i fundoye ashaen'fa.

—¡Va a'ima fi'ttija! ¡Ccatsse canseya'bi'choa tsu!

²³Tsa'caen fundopa iyicca'yepa tise'pa omba'su ondiccu'jema oshichhapa fanttundu'fa. Andema'qqe sefani gaiña'jen'fa. ²⁴Tsama attepa coronelja manda Pabloma ca'niañe sundaro ettinga tseni ma'ppipa tise injama'choma somboen'faye, tise jongoesuma tsinconsi aindeccu tsa'caen fundo'je'fa'chove atesuye. ²⁵Tsa'ma tayo tandamba ma'ppiye tson'jen'fasi Pabloja capitán, pporotsse ccutsu'choma su:

—¿Se'pimbi ti gobierno manda'choja majan Romano cedulama an'bian'cho a'ima ma'ppiye? ¿Ñane toya ña tsincon'choma atesumbi'ma ma'ppiyeta ti qui osha?

²⁶Tsama pañamba capitánjan japa coronelnga conda:

—Injama'tse que mandasi tson'jen'choma. Vata tsu Romano cedulama an'bian'cho a'i.

²⁷Tsa'caen pañamba coronel jipa Pabloma iñajampaña:

—Ñanga condaja, ¿queta ti qui Romano cedulama an'bian'cho a'i? Pabloja su:

—Ju, tsa'can gi.

²⁸Tsonsi coronelja su:

—Ñajan tsain'bitsse afepoemba Romano cedulama isu.

Tsonsi Pabloja su:

—Tsa'ma ña yaya Romano cedulama an'biani gi ña'qqe cedulama an'bian.

²⁹Tsa'caen susi injama'choma somboëne ma'ppisundeccuja tise'ye attufa'fa. Coronel'qqe tandañe manda'supa dyo Pablo cedulama an'bian qqen susi.

Pablo israe na'su bo'fa'chonga ccutsu

³⁰Ccaqui a'ta coronelja ma'caen israendeccu tsa'caen Pablone egae afa'je'fa'choma atesuye in'jan. Tsa'caen in'jamba Pabloma tandan'cho candenama ccupa. Ccupapa ttu'se Chigama afa'su nasundeccu, poiyi'cco israe'su coenzandeccuma'qqe cuintsu bo'faye. Tsomba Pabloma somboemba tise'panga ccutsian.

23 ¹Pabloja nasundeccu bo'fa'choma cambia su:

—Faenga'su israendeccu, ja'ño a'tangae, Chiga Quitsa ñama caña'jensi gi ñotsse in'jamba canse.

²Qquen susi Chigama afa'su na'su Ananíasja manda pporotsse ccutsusundeccuma cuintsu Pablo aya'fama tssai'faye. ³Tsonsi Pabloja su:

—Chiga Quitsa tsu quema'qqe tssaiye tson'jen. Queja ño'a qqen attiamba aquia afopoen'su qui. Queja dyaipa qui Moisés manda'choi'ccu ña ma'caen tsincon'chove ttatta'je. Tsa'ma Moisés manda'choma pañambiquia'caen qui ñama tssaiye manda.

⁴Tsonsi pporotsse ccutsusundeccuja su'fa:

—¿Jongoesie qui egaeja afa Chigama afa'su na'suma?

⁵Tsonsi Pabloja su:

—Faengasundeccu, atesumbi gi tiseja Chigama afa'su na'suve. Nane Chiga Tevaen'jenjan su: “Egae afajama que aindeccu na'suma.”

⁶Tsa'ma Pabloja in'jamba atesucho. Bo'fa'cho nasundeccuja enttingeve tsu fariseo in'jan'chondeccu; faesu enttingeve tsu saduseo in'jan'chondeccu. Tsa'caen atesuchopa tise'pama quia'me afapa su:

—¡Faengasundeccu! Ña'qqe gi fariseo. Ña tayopi'su coenzandeccu'qqe tsu fariseondeccu. Papa ccase qqwendya'chone in'jansi qui que'ija ñajan egae tsincon qqen su'fa.

⁷Tsa'caen susi fariseondeccu, saduseondeccui'ccu quia'me

afaccoye ashaen'fa. Ccaningae in'jamba dos in'jan'chove afacco'fa.

⁸Saduseondeccuja su'fa pa'choja ccase qqwendyaya'bi. Toya'caen tsu su'fa me'i'on tsu Chigama sefani'su shondosundeccuve ni sefani'su ñotssia qqwendya'pave. Tsa'ma fariseondeccuja pa'tssima in'jan'fa.

⁹Poiyi'cco quejeco'fasi majan fariseoa'caen in'jamba Chiga Tevaen'jema atesu'chondeccuja ccutsupa su'fa:

—Egae tsincombi tsu va a'ija. Chigama sefani'su shondo'su, sefani'su ñotssia qqwendya'pa tisema afa'ninda, ¿ma'caen atesuya?

¹⁰Tsa'caen afaccopa ñoame iyiccoye ashaen'fa. Tsa'caen iyicco'fasi coronelja dyo, israendeccu Pabloma fi'tti'fasa'ne. Tsa'caen dyopa coronelja

manda sundarondeccu cuintsu andepa Pabloma somboeñe israendeccu bo'fa'cho enttinge'ye. Toya'caen tsu manda cuintsu Pabloma tisupa can'jeni anga'faye.

¹¹ Cosesi Na'su Jesúsja Pablomga attiamba su:

—Dyombe canjan. Queja ñane Jerusaléni condaqquia'caen qui Roma canqqueni'qqe ñane condaya.

Pabloma fi'ttiye asi'ttaen'fa'cho

¹² Ccaqui a'tasi majan israendeccuja fae'ngae asi'ttaemba in'jan'fa ma'caen Pabloma fi'ttiya'chove. Tsa'caen asi'ttaemba ñoa'metsse su'fa Pabloma fi'ttiya'ngae ambe'yi cu'imbeyi can'jeñe. ¹³ Cuarenta a'ima ti'tsse'o tsu tsa'caen in'jamba asettu'fa. ¹⁴ Tsomba tise'paja Chigama afa'su nasundecconi coenzandecconi'qqe japa qqen conda'fa:

—Ingija ñoa'me asettupa ambe'yi can'jen'faya Pabloma fi'ttiya'ngae.

¹⁵ Tsa'cansi que'ija, pa'cco coenzandeccu bo'fa'cho'qqe coronelnga condaja cuintsu tu'i Pabloma iye, ti'tsse ñotsse ñajansepoeñe iquica'caen. Ingija tayo gi ronda'je'faya tise toya catsembi'teyi fi'ttiye.

¹⁶ Tsa'ma Pablo que'ttembe du'shuja paña tsendeccu su'choma.

Pañamba sundaro ettinga ja ca'nimba Pablomga conda. ¹⁷ Condasi Pablo capitáma ttu'sepa su:

—Va du'shuma angaja coronelnga cuintsu condaye tise paña'choma.

¹⁸ Qquen susi capitánjan du'shuma anga coronelnga. Angapa su:

—Indiye'cho Pabloja ñama ttu'sepa su va du'shuma queni iye cuintsu tise paña'choma quenga condaye.

¹⁹ Tsonsi coronelja du'shu tive'ye fendepa ccani anga faesu paña'fasa'ne. Tsomba ñajampaña:

—¿Jongoesuma qui ñanga condaya?

²⁰ Tiseja su:

—Israendeccu tsu fae'ngae in'jamba quema ñajañe tson'jen'fa cuintsu queja tu'i Pabloma coenzandeccu bo'fa'chonga iye. Ti'tsse ñotsse ñajansepoeñe iquica'caen iye tsu in'jan'fa. ²¹ Tsa'ma tise'pama pañajama. Tise'paja, cuarenta a'ima ti'tsse'o, tsu Pabloma a'tupa ronda'je'fa. Tise'paja su'fa: “Asettupa, ambe'yi, cu'imbeyi can'jeñe Pabloma fi'ttiya'ngae.” Tayo tsu ja'ñojan ronda'je'fa tisema fi'ttiye. Tsa'ma toya tsu que su'choma pañañe ronda'je'fa.

²² Tsama pañamba coronelja du'shuma qqen supa mandamoen:

—Majangayi'qqe condajama que ñanga conda'choma.

Pabloma mandamoen governarornga

²³ Tsomba coronelja dos capitáma ttu'sepa manda:

—Ñoña'faja cuintsu dosciento sundaro Cesareani ja'faye ja'ño cose, ñoa'me cose. Toya'caen setenta sundaro cavayonga dyaipa jaya'cho. Dosciento sundaro dansan'choma anga'su'qqe jaya'cho. ²⁴ Toya'caen

manda faesu cavayove cuintsu Pablo tsanga dyaisi tisema ñotsse coirapa anga'faye governoror Félixnga.

²⁵Tsomba coronelja tevaen'jema'qqe qqen tevaemba moen:

²⁶Claudio Lisias tevaen Ñotssia Governoror Félixnga, case'te.

²⁷Va tsandiemajan israendeccu indipa fi'ttiye tson'jen'fasi gi sundarondeccui'ccu andepa itsapa ccushaen. Tayo gi in'jan tiseja Romano cedulama an'bian'cho a'i. ²⁸Tsomba gi tisema anga israe nasundeccu bo'fa'chonga tise ma'caen tsincon'chove pañañe. ²⁹Tseni gi in'jan israendeccu manda'chone tiseja ccaningae afa'fasi nasundeccuja tisema egae afa'fa. Tsa'ma fi'ttiya'cho, ni piccoya'cho shacave attian'fambi. ³⁰Tsonsi israendeccu tisema fi'ttiye ronda'je'fa'choma pañamba gi junde queni tisema mandamoen. Tisema egae afasundeccum'qqe ñajan manda cuintsu queni japa tise tsincon'choma condaseye.

Chigai'ccu.

³¹Tsomba tse'i sundarondeccu, coronel mandasi cose jayipa Pabloma anga'fa Antípatris canqueni. ³²Ccaqui a'ta tsu'ttengae ja'cho sundarondeccuja toequi tise'pa tsaoni ji'fa. Cavayongae ja'cho sundarondeccuyi Pabloma anga'fa. ³³Cesareani napipa tevaen'jema governorornga afe'fa. Pabloma'qqe coiraye afe'fa. ³⁴Governoror tevaen'jema isupa can nanimba ñajampaña Pabloma:

—¿Mani'su a'i qui?

Cilicia andeni'su a'i qqen susi ³⁵pañamba su:

—Quema afasesundeccu jipa conda'fasi gi quema'qqe pañaña.

Tsomba sundaroma manda Pabloma coira'jeye na'su Herodes tsaoni.

Na'su Félixnga Pablo afa'cho

24 ¹Cinco a'ta pasasi Chigama afa'su na'su Ananías Cesareani napi faesu coenzandecui'ccu. Taya'caen tise'pai'ccu tsu roma manda'choma atesupa afa'suja ji, Tértulo qqen inisecho'cho. ²Tise'paja ji'fa Pablo tsincon'choma governorornga condaye. Tsendeccu jisi Pabloma i'ngasi Tértulo Pablo tsincon'choma afaye ashaemba su:

—Na'su Félix, que qui ñoa'me ñotssia na'su. Que na'suve dasi ingija avuja'tsse can'jen'fa. Que ñotsse in'jansi poiya'cco ingi andesundeccu'qqe bove ñotsse can'jen'fa. ³Tsa'camba poi a'ta, poi canqueni ingija quene ñotsse afa'fa. Ñotssia Félix, queja ñoa'me ingima ñotsse manda'je. ⁴Tsa'ma quema pánshaen noñangiansa'ne gi quema ñajan, chigáne re'riccone ingima pañajan. ⁵Va a'i tsu ñoa'me paqqe'sia'caen ingima noñangian'su. Poi andeni mani israendeccu can'jen'fa'ni'qqe tseni tiseja ccaningae atesiañe noñangian'jen. Tise'qqe tsu Nasareno in'jan'chondeccumbe

na'su. ⁶Dañoñe in'jamba ingi Chigama ññajan'jen'ttinga faesu a'ima ca'nian tsincon. Tsa'caen tsinconsi ingija tisema indi'fa tise injama'choma somboeñe ingi manda'cho mandaquua'caen. ⁷Tsa'ma Coronel Lisias ejeca'nimba tise sundarondeccui'ccu Pabloma itsa ingi tive'ye. Tsa'caen itsapa ⁸tsu ingima manda queni jipa Pablone afa'faye. Queja tisema ññajansepoen'da qui pa'cco tise tsincon'choma junde atesuya. Tise afasi qui pañaña ingi suquua'caen tsu afaya.

⁹Tértulo tsa'caen afasi israendeccuja “Ju, tsa'caña tsu,” qquen afa'fa.

¹⁰Tsonsi governaror afaye canjaemba susi Pabloja qquen su:

—Tsaïn'bio canqqe'fa queja va ande na'suve dapa mandasi gi ñotsse atesu. Tsa'camba gi ññajan avujatsse pa'tssi ma'caen ña tsincon'choma quenga condaya. ¹¹Ññajampaña'da qui atesuya tayo doce a'ta tsu ña Jerusaléni Chigama ññajañe ja'cho. ¹²Tsendeccuja atte'fambi tsu Chiga ettinga faesui'ccu ña afa'cco'chove. Israe Chigane atesian'jen'ttinga ni canqqeni'qqe tsu ñama atte'fambi majan a'ima qqejeccoen'chove. ¹³Ñoa'me tsu vandeccuja aquia aya'fai'ccu afa'fa. Ña jongoesuve egae tsincon'choma attiañe osha'fambi. ¹⁴Tsa'ma vamajan dyombi'tsse gi su: Chiga ñotsse condase'choma pañamba gi Chiga Quitsama ññajan ingi tayopi'su coenzandeccu ññajanquua'caen. Tsa'ma vandeccuja tsa ñotsse condase'choma egae atesian'cho tsu qquen su'fa. Pa'cco Moisés manda'cho tevaen'jema, pa'cco Chiga Aya'fa afasundeccu tevaen'choma'qqe gi in'jan. ¹⁵Nane tsendeccu in'janquua'caen gi ña'qqe Chigave in'jamba ronda'je cuintsu poiya'cco pa'chondeccu ccase qqwendya'faye, majan ño'a, majan ega'qqe. ¹⁶Tsa'caen in'jamba gi ma'caen osha'ta ñotsse canse, Chiga caña'jen'ni, toya'caen aindeccu caña'jen'ni'qqe.

¹⁷Nane ja'ño boyi canqqe'fave ccani jacamba gi toequi Jerusaléni ji ña ande'su mendeqquianga afe'fa'choma afeye. Ña Chiganga afe'choma'qqe gi afeye ji. ¹⁸Qquen tson'jemba gi asettupa onjomba Chiga ettini ja. Tse'tti can'jemba majain'ccuyi'qqe afacombi gi ni a'ima qqejeccoembi gi. Tsa'caen ña Chiga ettini can'jen'choma tsu majan Asia ande'su israendeccuja ñama atte'fa. ¹⁹Nane tsendeccu tsu ma'caen ña tsincon'chone egae afaye osha'ta vani jiya'cho quenga afaye. ²⁰Tsa'ma tsendeccu jimbi'ninda vani can'jen'chondeccu tsu afa'faya'cho jongoes shacama tsu atte'fa, ña tise'pa israe'su nasundeccu bo'fa'chonga ccutsu'nijan. ²¹¿Nane ñoa'me ña qquen quia'me afa'chombi ti? “Papa ccase qqwendyaya'chone in'jansi qui que'ija ññajan egae tsincon qquenjan su'fa.”

²²Tsa'caen pañamba Félixja “jai'ngae Coronel Lisias jisi ccase pañañe” qquen supa antte. Nane Cristone ñotsse condase'chone tayo pañamba tsu tsa'caen supa antte.

²³Tsomba tsu capitáma manda cuintsu Pabloma coiraye. Tsa'ma ta'etsse piccombeyi antte cuintsu Pablombe amigondeccu tisema can'gapa tisenga osha'choma coira'je'faye.

²⁴Omboe, faesu a'ta, Félix, tise pushe Drusilai'ccu ccase ji'fa. Drusilata tsu israe'su pushesu. Tsa'caen jipa tsu manda cuintsu Pabloma iye ccase tise Jesúsne in'jan'cho atesian'choma pañañe. ²⁵Tsa'ma Pabloja ñotsse in'jamba canseya'chone, toya'caen a'i tisu injama'cho ai'voma ñotsse an'biaña'chone, Chiga jai'ngae tsangae injama'choma somboeña'chone'qqe condasesi Félixja pañamba dyo. Tsa'caen dyopa su:
—Ja'ñojan jaja. Maqui osha'ta gi ccase quema ttu'seya.

²⁶Toya'caen tsu Félixja ronda'je Pablo corifin'dima tisenga afe've'se tisuma fettaya'chone. Tsa'caen in'jamba tsu tsain'bitsse Pabloma ttu'sepa condasecco'fa. ²⁷Nane dos canqqe'fa tsa'caen pasasi Félix na'suve da'cho nanisi faesu a'i, Porcio Festo, tsu governororve da. Israendecu tiseja ño'a qqen in'jan'faye in'jamba Félixja Pabloma toyayi picco antte.

Pablo Na'su Festonga afa'cho

25 ¹Festoja tayo governororve dapa tres a'ta Cesareani can'jemba Jerusaléni ja. ²Tseni napisi Chigama afa'su nasundecu, israe'su coenzandecu'qqe tisenga conda'fa Pablo ma'caen tsincon'chone. Tsa'caen condapa Festoma in'jan'fa ³cuintsu tise'pama fuitete in'jamba Pabloma Jerusaléni i'faye mandaye. Tsa'caen in'jamba tayo in'jan'fa tise'ma i'ninda ma'caen ron'dapa Pabloma fi'ttiya'chove. ⁴Tsa'ma Festoja su:

—Ingija Pabloma Cesareani piccopa an'bian'fa. Ñajan junde tzeni jaye tson'jen. ⁵Ñai'ccuta tsu ji'faya'cho jo'su que'i nasundecuyi Cesareani japa Pablo ma'caen tsincon'chone afaye.

⁶Tsomba Festoja ocho a'ta, nane diez a'ta'quua'caen tsendecui'ccu can'jemba toequi Cesareani ja. Japa ccaqui a'ta na'su dyaipa'chonga ansundepa dyai. Dyaipa manda cuintsu Pabloma i'ngaye. ⁷Tsonsi Pabloma isi Jerusaléni ji'cho israendecu tisenga shonquendi'e ccutsu'fa. Tsa'caen ccutsupa Pablone osha'cho ñoa'me egae tsincon'chove afa'fa. Tsa'ma tise'pa afa'choja tansintsse su'cho qqen canjaeña osha'fambi. ⁸Tsonsi Pablo'qqe tiséne qqen afa:

—Ñajan egae tsincombi gi. Israendecu manda'choma egae tsincombe gi can'jen. Ni Chiga ettima'qqe egae tsincombi, ni Romano na'su César manda'choma'qqe.

⁹Tsa'ma Festoja israendecu tiseja ño'a qqen in'jan'faye in'jamba Pabloma in'jampaña:

—¿In'jan ti qui Jerusaléni japa tzeni ccutsupa ñanga afaye israendecu queja egae tsincon qqen su'chone?

¹⁰Tsa'ma Pabloja su:

—Va'tti gi ccutsu César Na'su mandasi dyai'choni. Va'ttinga tsu ñama pañaña'cho ña egae tsincon'choma ateyeta. Tsa'ma egae tsincombi gi israendecunga. Que'qqe tsamajan atesu. ¹¹Ñanda egae tsincomba ñoa'me paye jincho'choecan'da dyojombi gi paye. Tsa'ma tise'pa ña egae tsincon qqen afapa aquia afopoen'fa'ninda oshambi qui ñama tise'panga moeña.

In'jan gi cuintsu César Na'suyi ña tsincon'choma pañamba tsane tansintsse afaye.

¹²Tsonsi tse'i Festoja injama'pandeqquiai'ccu condaseccopa su:

—Que César Na'su que tsincon'choma pañamba tsane tansintsse afaye qqen in'jan'ninda gi na'su Césarnga moeña.

Ande Na'su Agripa pañañe in'jan'cho

¹³Re'ricco a'ta pasasi ande na'su Agripa, Berenicei'ccu Cesareani Festoma chigambiañe ji'fa. ¹⁴Bo'tsse can'jensi Festoja ande na'su Agripanga Pablone conda. Qquen tsu su:

—Félix somboembeyi piccopa ja'cho a'i tsu can'jen. ¹⁵Ña Jerusaléni can'jensi tsu Chigama afa'su nasundeccu, israe'su coenzandeccu'qqe ñanga tisene egae condapa in'ajan'fa tisema fi'ttiye ña mandaye. ¹⁶Tsonsi ñajan su romanondeccuja qqen indiyechoma injanga fi'ttiye atesu'fambi. O'tie tsu egae afaséye'su tsuma egae afasesundeccui'ccu tsovejuna'ccu afaccoya'cho. Tsa'caen tsu afaya'cho tsuma egae su'chone.

¹⁷Tsa'camba tsende'ccu vani bo'fasi ñajan junde, ccaqui a'ta, na'su dyaipa'chonga dyaipa Pabloma iye manda. ¹⁸Tsa'ma tisema egae afasesundeccu ccutsupa afa'ma ña in'janquua'caen egave afa'fambi. ¹⁹Nane tise'pa Chigave in'jan'chone tsende'ccuja Pabloma ccaningae in'jamba afacco'fa. Toya'caen majan Jesúsne tsu afacco'fa. Cca'ija Jesús tayo pa qqen susi Pabloja toya canse qqen su. ²⁰Tsa'caen su'fasi ñajan ma'caen tsoña'chove atesumbipa gi Pabloma in'ajampaña: “¿Jerusaléni jaye'ta ti qui in'jan tseni japa in'ajansepoeñe que egae tsincon qqen su'fa'chone?” ²¹Tsa'ma Pabloja su: “Na'su César Agosto tsu ña tsincon'choma pañamba tsane tansintsse afaya.” Qquen susi gi ñajan manda tisema piccopa an'biañe na'su César Agustonga moeña'gae.

²²Tsonsi Agripaja Festoma su:

—Ña'qqe gi tise afa'choma pañañe in'jan.

Festoma su:

—Tu'i qui pañaña.

²³Ccaqui a'ta Na'su Agripaja Berenicei'ccu jiji'fa. Nane ñoa'me pa'tsutsse ondiccupa osha'cho na'su jinchoqqe'suma attiamba na'suma pañal'jen'cho ettinga jiña'fa. Poiyi'cco sundaro nasundeccu, can'que nasundeccu'qqe tsu fae'ngae jiña'fa. Tsa'caen ji'fasi Festoja Pabloma iye manda. ²⁴Isi Festoja su:

—Ande Na'su Agripa, poiyi'cco vani bo'fa'chondeccu, que canjan'faja va'tti ccutsu'cho a'ima. Poiyi'cco israendeccu, Jerusaléni, vani'qqe ñama anttembe'yi in'ajan'jen'fa tisema fi'ttiya'chone. ²⁵Tsa'ma attembi gi ma'caen tsincon'chove tisema fi'ttiyeja. Tise'yi César Na'su tise tsincon'choma pañamba tsane tansintsse afaye qqen in'jansi gi tisema na'sunga moeña. ²⁶Tsa'ma ña na'sunga tisene jongoesu qqen tevaeñe atesumbi gi.

Tsa'camba gi que'inga canjaeñe tisema i. Na'su Agripa, ñoa'me gi quenga

tisema canjaen'jen tisema ñajansepoemba jongoesu qqen tevaeña'chove atesuye. ²⁷ ¿Ma'caen gi indiye'choma Na'su Césarnga moeña, tise ma'caen tsincon'choma tevaembi'ta? Tsa'caen moeñe'jan sumbi tsu qqen gi in'jan.

Pablo Na'su Agripanga afa'cho

26 ¹Tsonsi Agripaja Pabloma su:
—Condaja tisu ma'caen tsincon'choma.

Qquen susi Pabloja tise tivema yasa canjaemba su:

²—Na'su Agripa, ñajan avujatsse gi vani ccutsu tisu tsincon'choma quenga condaye. Nane israendeccuja ñama osha'cho egave afa'je'fa.

³Tsa'ma que'qqe pa'cco israendeccu ccaningae in'jan'choma, tise'pa afacco'fa'choma'qqe atesusi gi avujatsse quenga conda'je. Tsa'camba gi su, chigáne ñama ñotsse pañajan.

Toya Cristove in'jambite canse'cho

⁴Chuitepie ña andeni toya'caen Jerusaléni can'jemba gi coen ña aindeccui'ccu. Ña ma'caen canse'choma tsu poiyl'cco israendeccu atesucho'fa. ⁵Bo'tsse tsu ñama atesu'fa. Tsendeccuja condaye in'jan'da tsu qqen conda'faya: “Pabloja fariseo in'jan'chove in'jamba canse.” Nane fariseondeccu tsu israe in'jan'chove ti'tsse in'jan'chondeccu. ⁶Tayoe Chigaja ingi tayopisundeccunga afa a'i papa ccase qqwendyaya'chone. Tsa tayopi'su in'jan'choma in'jamba gi vani ccutsu cuintu que ña tsincon'chone afaye. ⁷Nane ingi doce ande'su israendeccuja poi a'ta, poi cose quia'me Chigama ñajamba tsesu jai'ngae tsoña'chove ronda'je'fa. Na'su Agripa, ña'qqe tsa'caen in'jansi tsu israendeccuja ñama egae afa'fa. ⁸ ¿Ma'camba qui que'ija in'jan'fambi Chiga pa'chondeccuma ccase qqwendyaeña'chone?

Pablo tayoe mandiancan'cho

⁹Ña'qqe gi tayoeja ma'caen osha'ta va Jesús Nasareno'su in'jan'choma joquitssiañe in'jan. ¹⁰Tsa'caen in'jamba gi Jerusaléni tsa'caen tson. Nane Chigama afa'su nasundeccu ñama tsa'caen antte'fasi gi tsain'bio Jesúsve in'jan'chondeccuma indipa picco. Piccopa tise'pa injama'choma somboemba fi'ttiye mandasi ña'qqe tsa'caen afa. ¹¹Israe Chigane atesian'jen'ttinga indipa gi tsain'bitsse tisema ma'ppi cuintu Jesúsma in'jambecañe. Noa'me iyicca'yepa gi Jesúsve in'jan'chondeccuma biani mandian, ñoa'me ccani'su andenga'qqe.

Jesucristo tisenga attian'cho

(Tson 9.1-19; 22.6-16)

¹²Tsa'caen tson'jemba gi Damasco canqqeni ja, Chigama afa'su nasundeccu ñama tsa'caen mandapa antte'fasi. ¹³Na'su Agripa, ña tseni jayisi tsu ñoa'me chiga tansia'ni sefaccoja chajun. Nane

sefaccone coejechigama ti'tsse'tsse tsu ñanga chanjun. Ñai'ccu fae'ngae jacansundecunga'qqe tsu chanjun. ¹⁴Tsa'caen chanjuni ingija poiya'cco andenga amppi'fa. Amppipa gi ñajan paña hebreo aya'fangae qquen su'choma: “Saulo, Saulo, ¿jongoesie qui ñama noñangiamba mandiancan? Queja ñama in'jangae tsincomba qui tsuma bove iñaccaen. Nane na'su quiccu'je'chonga vaura tsuipa tsuma ti'tsse iñaccaen'quia'caen qui tsuma bove iñaccaen.”

¹⁵Tsonsi ñajan iñajampaña: “Na'su, ¿majan qui queja?”

Tsonsi Na'suja su: “Ñanda gi Jesús, que noñangiamba mandiancan'cho. ¹⁶Tsa'ma jangipa ccutsuja. Quema mandaye gi quenga attian. Nane que ja'ño atte'chone, jai'ngae ñama ccase atteya'chone'qqe qui poiya'cco a'inga afa'suve daya. ¹⁷Israendecunga, isaembindequiang'a'qqe quema moemba gi tise'pa'ye quema ccushaëña. ¹⁸Nane tise'panga gi quema moeña cuintu tise'pa tso'fe fettayequia'caen sinttia'ye piyicamba a'tatssianga jaquua'caen tise'pa injama'choma ñoña'faye. Tsa'caen ñoñamba cocoya na'su Satana in'jaen'choma catipa tsu Chiga Quitsave in'jamba paña'faya. Toya'caen ñame tsa'caen in'jan'fasi gi tise'pa egae tsincon'choma joquittsiamba poiya'cco Chiga in'jan'chondeccu'ccu fae'ngae ca'niaña.”

Pablo attian'choma ñotsse paña'cho

¹⁹Na'su Agripa, sefani'su Na'su Jesús tsa'caen sefaccone attiamba susi gi ñotsse pañamba in'jan. ²⁰Nane o'tie Damascosundecunga gi va ñotsse condase'choma condase. Tsomba tse'i Jerusalensundecunga, pa'cco Judea andesundecunga'qqe gi condase. Isaembindequiang'a'qqe gi condase cuintu tise'pa egae canse'choma catiye in'jamba tise'pa tayo'su in'jan'choma catipa Chigave in'jan'faye. Tsa'caen Chigave in'jamba tsu ñotsse canseya'cho cuintu cca'indeccu atesu'faye egae canse'choma tayo cati'chove. ²¹Tsama atesian'jensi tsu isaendecuja iyicca'yepa ñama indi'fa Chiga ettinga. Indipa ñama fi'ttiye in'jan'ma osha'fambi, ²²Chiga Quitsa ñama fuitesi. Toya'caen ja'ño'qqe Chiga Quitsa ñama fuitesi gi vani ccutsupa poiya'cconga condase'je, majan ti'tsse'tssianga, majan utu'ccoanga'qqe. Nane Moisés, Chiga Aya'fama afasundeccu'qqe jai'ngae tsoña'chone suquia'caen gi ña'qqe afa'je. ¿Minga'ni'qqe ccaningae afambi gi? ²³Tsendecuja tayopi condase'fa ma'caen Chiga in'jan'cho Cristo vanaña'choma. Tsa'cansi tsu Jesucristoja papa me'ttia'ye ccase qquendya'su. Tsa'caen qquendyapa tsu Cristoja poiya'cco a'inga canjaen a'i papa ccase qquendyaya'chone. Nane isaendecunga, isaembindequiang'a'qqe tsa'caen canjaemba tsu in'jaen.

Jesucristone in'jaeñe in'jan'cho

²⁴Pablo tsa'caen tisune condasesi Festoja quia'me fundondo'e afapa su: —Pablo, ¿sumbie ti qui da'je? Panshaen tsain'bitsse atesupa qui sumbie da.

²⁵Tsa'ma Pabloja su:

—Ñajan sumbimbi gi ñotssia Festo. Ña gi ñotsse injancho. Ñoa'me in'jamba gi tansintsse conda'je. ²⁶Nane ande na'su Agripa'qqe tsu pa'cco vama atesu. Tsa'cansi gi dyombi'tsse afa'je tise paña'jen'ni. Vaja a'tutsse tson'chombi tsu. Tsa'cansi tise'qqe pa'ccoma atesu'cho, qqen gi in'jan. ²⁷Na'su Agripa, ¿in'jan ti qui Chiga Aya'fama afasundeccu su'choma? Queta qui in'jan, qqen gi in'jan.

²⁸Tsonsi Agripaja Pablonga su:

—¿Junde ti qui ñama in'jaemba Cristo a'ive tsoñe in'jan?

²⁹Tsonsi Pabloja su:

—Jm jrn, junde, tsambi'ta jai'ngae que tsa'caen da'ninda ñotssi tsu. Tsane gi Chigama in'jan'jen quene, toya'caen poiya'cco ñama ja'ño pañasundeccune'qqe cuintsu ña'caeni da'faye –tsa'ma candename mechoyi.

³⁰Tsa'caen Pablo susi ande na'su Agripa jangi ccutsu. Governaror, Berenice, tise'pai'ccu fae'ngae dyaisundeccu'qqe jangipa ³¹cca'ttinga condaseccoye jaja'fa. Japa qqen condasecco'fa:

—Va a'ija ma'caen paya'chove ni ma'caen piccoyeya'chove jinchoyembi.

³²Tsomba Agripa Festoma su:

—Va a'ija, César Na'su tise tsincon'choma pañamba afaya'chove in'jambiecan'da tsu fettaya'cho.

Pabloma Romani moen'cho

27 ¹Tsomba tse'i na'suja asi'ttaemba in'jan Pabloma moeñe Italia andeni poi andembe na'sunga. (Ña Lucas'qqe gi tisei'ccu jaye.) Na'suja tsa'caen in'jamba Pabloma, toya'caen faesu indiyechondeccuma'qqe, coiraye manda Na'su Agosto sundarondeccu'su capitáma. Tsambe iniseja Julio. ²Tsonsi gi fingian angaqqe'su barconga otse'fa. Tsata tsu Adramitio canqqe'su barco. Tsa barco Asia ande'su canquengae jaye tson'jensi gi tsanga otse'fa. Toya'caen Macedonia'su a'i, Tesalónica canqqe'su Aristarco, ingi'ccu fae'ngae jaye otse. ³Ccaqui a'ta gi Sidón canqueni ccattufa'fa. Julioja Pabloma mende'yepa antte cuintsu tise amingo tsaoni japa can'jeñe. ⁴Sidón sombopa gi Chipre anttepo'cho fingian mefaye ja'fa fingian'ñe jaye ega'osi. ⁵Tsomba Cilicia, Panfilia ande isevetsse marma isepa ccattufa'fa Mira canquenga. Tsa tsu Licia ande'su canqqe.

⁶Tse'ttima capitánjan faesu barcoma atte. Tsaja Alejandría canqqe'su barco, Italia andeni jaya'cho. Tsanga ingima otsiansi gi ⁷boyi a'tangae vasui ja'fa. Tsa'caen vanamba gi Gnido canqueni napi'fa. Tsa'ma toya fingian'ñe jaye ega'osi Creta anttepo'cho fingian mefaye ja'fa. Nane Salmón ccotta'cco isevetsse panshamba ⁸vanamba ofafa'ye já napi'fa faesu mar catai'ccunga, Buenos Puertos qqen inisecho'chonga, Lasea canqqe pporotsse.

⁹Tsain'bio a'tangae tseni napisi tayo sanfan ca'nisi marngae jaye ega'osi Pabloja poiya'cconga condapa ¹⁰su:

—Tsandiendeccu, ñanda gi in'jan ja'ño jayeta tsu ega, osha'choma qqeñasa'ne. Nane andu'cho shavoma'qqe qqeñamba ingi'qqe pasa'ne.

¹¹Tsa'ma Pablo tsa'caen su'ni'qqe sundaro capitánjan tisema pañambipa ti'tsse tsu paña barco asittaen'suma, toya'caen barco na'suma'qqe. ¹²Tsa mar catai'ccuja qqe'ccosi sanfan pasa'tsse tseni barcoma dusiañe in'jan'fambi. Poyi'cco tsa'caen in'jamba ccase marni jaye in'jan'fa osha'ta Feniceni napipa tseni sanfama pasaye. Tsa Creta ande'su mar catai'ccuja bove ñotsse tsu jin fingian ja'jembiquia'ni.

Quia'me fingiamba barcoma indi'cho

¹³Tsomba tse'i ñonia'ngae re'riccoe fingiansi tsu jaye ñotssi qqen in'jan'fa. Tsa'caen in'jamba barcoma indi dusian'jen'cho an'ccoma jangian'fa. Tsomba Creta ande ofafa'ye pporotsse jayi'fa. ¹⁴Tsa'ma tsa'caen jayi'fa'ni faesu fingianjan andepane quia'me ji. Tsa fingiama tsu a'i atesupa inisian'fa Yoracorón. ¹⁵Tsa'caen jipa barcoma indisi asucce jaye oshambipa a'ningae ja'fa. Tsa'caen tsu fingianjan ingima anga. ¹⁶Tsonsi faesu chipiri anttepo'cho –Clauda qqen inisecho'chonga– fingian mefaye japa vanamba semamba ingi jayi'cho barconi duse'cho shavo chipirima indi'fa. ¹⁷Indipa ansundian'fa barconga. Tsomba cavi'ccu barcoma findi'fa shave'panga dosa'ne. Toya'caen angasundeccuja dyo'fa mar sai'ccuccosi sisipandundunga injanga ja ejesa'ne. Tsa sisipandundunjan Sirte qqen inisecho'cho. Tsanga jasa'ne dyopa ja'je'cho sarupama andian'fa cuintsu fingian vasuitsse angaye. ¹⁸Ingija toya unjin, fingian, shave'pai'ccu quia'me angongoen'jensi ccaqui a'ta angasundeccuja barco'su andu'choma sombo'boen cati'tiye ashaen'fa. ¹⁹Tsomba ccaqui a'ta ingi tivei'ccu osha'cho barconi jincho'choma'qqe ttovaccoen cati'fa. ²⁰Tsain'bio a'ta gi coejechigama ni o'fema'qqe atteye osha'fambi. Toya'caen unjinsi fingian'qqe toya quia'me fingian'jensi gi ma'caen ccushaya'chove'qqe atesu'fambi.

²¹Ingi tsa'caen bo'tsse ambe can'jensi Pabloja ccutsupa su:

—Tsandiendeccu, ñama qui pañamba Cretane shanda'choecan'da gi ja'ñojan vanambe ni osha'choma qqeñambe can'jen'faye'can. ²²Tsa'ma ja'ño que'i injama'choma ñotsse ñoña'faja. Pa'faya'bi qui que'ija, ni fae'ccoyi'qqe. Aqquia barcoyi tsu qqe'ya'cho. ²³Ña gi Chiga Quitsama shondo'su. Tsaja ña na'su tsu. Nane ja'ño cose tsu Tisema sefani'su shondo'su ñanga catse ccutsupa ²⁴su: “Dyojama, Pablo. Queja Na'su Césarni qui jaya'cho. Toya'caen Chigaja quema in'jamba tsu antte cuintsu quei'ccu barconga jacansundeccu'qqe ccusha'faye.” ²⁵Tsandiendeccu, tsa'cansi que'i injama'choma ñotsse ñoña'faja. Ñajan Chiga Quitsave gi in'jan. Tise suqquia'caen tsu tsoña. ²⁶Tsa'ma majan anttepo'chonga gi já eje'faya.

²⁷Tayo catorce cose tsa'caen angajipa, mar Adrianga anga dusiamba enttinge cose barcoma angasundeccuja tayo sa'anga catse ji qqen in'jan'fa.

²⁸Tsomba simba'fai'ccu agattocamba in'jan'fa veinte yasa tsu tso'si'suja.

Re'riccoe japa joccani ccase agattocamba in'jan'fa quince yasa tsu tsosi'suja. ²⁹Tsomba patunga ccattufasa'ne dyopa cuatro indi dusian'jen'cho an'ccoma barco setsa'ye tandamba ttovamoen'fa cuintsu mar tsosini indiyepa barco jayi'choma indiyee. Tsa'caen tsomba poiyyi'cco dyopa ron'da'fa cuintsu junde a'taye. ³⁰Tsa'ma barcoma angasundeccuja barco'ye sombopa jaye in'jamba tise'pa angacan'cho shavoma marnga andian'fa. Nane faesu indi dusian'jen'cho an'ccoma barco tsutone tandamba ttovamoen'faya qqen supa ñoa'me cati jaye tson'jen'fa. ³¹Tsa'ma Pabloja tise'pa in'jan'choma atepa sundaro capitánga, toya'caen tise sundarondeccuma'qqe su:

—Vandeccu barcoma cati'ninda, ¿ma'caen qui ccusha'faya?

³²Tsa'caen pañamba sundarondeccuja shavo tandan'fama chattumoen'fa cuintsu aijaye.

³³A'taninae, Pabloja poiyyi'ccoma su cuintsu re'riccoe an'faye. Qquen tsu su:

—Tayo tsu catorce a'ta que'i anambeyi can'jen'cho. Toya'caen qui ñotsse an'fambi. ³⁴Tsa'camba gi que'inga su, an'faja, quiñañe. Ni fae'ccoyi'qqe pa'faya'bi qui ni iñaca'faya'bi qui.

³⁵Tsa'caen supa pa'o caña'jen'ni, Pabloja panma isupa Chigama iñajan. Iñajan nanimba panma doñamba aña ashaen. ³⁶Tsonsi tise'pa injama'choma ñoñamba poiyyi'cco an'fa. ³⁷(Ñoa'me doscientos setenta y seis a'i tsu barconi can'jen'fa.) ³⁸Tsomba poiyyi'cco tisupa in'ja'en an tteppupa pa'cco barco'su andu'cho trigoma marnga catiti'fa cuintsu barco favaye.

Barco anttepo'chonga ca'ni eje'cho

³⁹Tayo a'tasi atesumbi'choa andema atte'fa. Tsa'ma mar catai'ccuma'qqe atte'fa, sisipandundun jinchoma. Tsa'caen atepa asi'ttaen'fa osha'ta tseni barcoma ccattufaeñe. ⁴⁰Tsomba tsosine indi dusian'jen'cho an'ccoma chatu moemba asittaen'su chhochhofin'dima tandan'chomaqqe ccupa'fa. Tsomba tsuto'su fingian angaqqe'su sarupama jangian dusiansi sisipandundunga fingianjan tise'pama ccattufaeñe anga. ⁴¹Tsa'ma barco já mar sisipa saiccu'anga já ccui. Tsa'caen tsuto ta'etsse eje ccuisi mar shave'pa quia'me jipa barco setsama u'cca.

⁴²Tsonsi sundarondeccuja poiyyi'cco indiyee'chondeccuma fi'ttiye in'jan'fa, cca'yapa ccuyayin ja'fasa'ne. ⁴³Tsa'ma capitánjan, Pabloma ccushaeñe in'jamba sundaro in'jan'choma se'pi. Tsomba manda cuintsu majan cca'yaye osha'ta butto ca'nimba sania cca'ya iseye. ⁴⁴Cca'yaye oshambi'choa'manda tsu manda cuintsu majanjan quini'cconga, majanjan barco do'chonga ottapa sania iseye. Tsa'caen susi poiyyi'cco sania isesepa ccusha'fa.

Malta anttepo'choni can'jen'fa'cho

28 ¹Tsa'caen poiyyi'cco ccushapa ingija paña'fa tsa anttepo'choja Malta anttepo'cho. ²Tsani can'jensundeccu ingima ñoa'me ñotsse coira'je'fa. Unjin tui'jesi cha'ndiosi tsendeccuja si'ngema setsaemba ingima ttu'se'fa,

sa'vuye. ³Pabloja si'tsima boñamba si'ngenga otsiañe tson'jensi sinsinsioaca'an si'ngenga cupa sombopa tsai ancan tise tivenga. ⁴Sinsinsioaca'an tsa'caen tise tivema tsai ancansi atepa tseni'su aindeccuja qqen afacco'fa:

—¿Unjún? Va a'ita tsu a'ima fi'tti'su. Nane marnga pambi'ni'qqe tsu sefacco'su anttembi, tise ti'tsse canseye.

⁵Tsa'ma mi'gae dambe'yi Pabloja iyoma si'ngenga fanttundu amppian. ⁶A'ija ronda'je'fa Pablo minga'ni ppu've'se. Minga'ni papa amppi've'se qqen ronda'je'fa. Tsa'ma bo'tsse ronda'je'fa'ni'qqe mi'gae dambisi asi'ttaemba in'jan'fa Pabloja chiga.

⁷Tse'tti pporotsse anttepo'cho'su na'su tise'be andema an'bian. Tiseja Publio qqen inise'cho'cho. Tsa ingima mende'yepa ttu'sesi ingija tres a'ta can'jen'fa tise tsaoni. Tsa'caen ñotsse can'jemba gi ⁸pañ'a'fa Publio quitsa ajepa anjampaveyi fanfan'jemba pajipa ccui'choma. Pabloja tisema can'su japa Chigama ñañajan. Ñañajan nanimba tivei'ccu tisema pporaemba ccushaen. ⁹Tsa'caen ccushaensi atepa poi'yi'cco anttepo'chosundeccu, majan paji'choja jiji'fa. Jijisi Pabloja tise'pama ccusha'shaen. ¹⁰Tsonsi poi'yi'cco ingima ñotsse tson'fa. Toya'caen ingi jaye tson'jensi osha'choma afe'fa ingi jaya'chone shacasa'ne.

Pablo Romani napi'cho

¹¹Tres ccovuve can'jemba faesu fingian angaqqe'su barconga otse'fa. Tsaja Alejandría'su barco. Tsa tsu Malta anttepo'choni sanfama pasaye ronda'je'cho. Barcoja Romano dos chigave inisian'cho, Cástor –Póluxve. ¹²Tsanga otsepa japa Siracusa canquenga ccattufapa tres a'tave tseni can'jen'fa. ¹³Tsene sombopa otafa'ye jayipa Regioni napi'fa. Ccaqui a'ta ñonia'ngae fingiansi jaye ashaemba dos a'tayi gi Puteolini napi'fa. ¹⁴Tsenima gi faenga'su Jesúsve in'jan'chondeccuma cachui'fa. Tsendeccu ingima ttu'sesi gi tise'pai'ccu fae avujaqui pa'cco can'jen'fa. Tsomba gi ja'fa rande Roma canqueni. ¹⁵Tseni'su faenga'su Jesúsve in'jan'chondeccu, ingi tayo jiña qqen pañamba majandeccu ingima cachuiye ji'fa Apio Foro canqueni. Toya'caen majandeccu Tres Tabernas canqueni ingima cachuicco'fa. Tsendeccuma atepa Pabloja avujapa Chigama ñotsse ñañajan. ¹⁶Romani napipa capitánjan indiyel'chondeccuma afe coira'su sundarombe na'sunga. Afesi na'suja Pabloma antte cuintsu tisuyi can'jeñe fae coira'su sundaroi'ccu.

Pablo Romani candusian'cho

¹⁷Tres a'ta can'jemba Pabloja tseni'su israe'su nasundeccuma ttu'se. Ttu'sesi bo'fasi Pabloja tise'panga su:

—Tsandiendeccu, ñajan a'ima egae tsincombi gi, ni ingi coenzandeccu nafattian'choma egae tsincombi gi. Tsa'ma ña egae tsincombi'ni'qqe israe'su nasundeccuja Jerusaléni ñama indipa afe'fa tseni'su Romano na'sunga.

¹⁸Romanondeccuja ñama ñañansepoe'na ma'caen ñama fi'ttiya'chove

attembipa ccupaye in'jan'fa. ¹⁹Tsa'ma israe'su nasundeccu ñama ccupaye se'pisi gi ñajan aindecuma iyicca'yembi'ma César na'su ña tsincon'choma pañamba tsane afaya'cho qqen su. ²⁰Tsa'camba gi que'ima ttu'se attepa condaye. Nane israendeccu Cristo jiya'chone in'jan'chove in'jamba gi va candenai'ccu tandañe.

²¹Tsa'caen susi Roma'su israendeccuja Pablonga su'fa:

—Quene condasepa tevaen'choma Judeane isu'fambi gi. Faenga'su israendeccu vani ji'a'qqe tsu quene egae conda'fambi ni quene egae jincho'chove afa'fambi. ²²Tsa'ma ingija quema pañañe in'jan'fa que in'jan'choma atesuye. Nane va cuna atesian'choma poi andeni egae afa'je'fa qqen gi paña'jen'fa.

²³Tsa'caen in'jamba maqui afaya'cho a'tama conda'fa. Tsa a'ta napisi tsain'bio a'i bo'fa Pablo can'jeni. Pabloja sinte'yi candusiañe ashaemba pa'cco a'ta si'metsse candusian Chiga aindecuve daya'chone. Toya'caen Moisés manda'choma, Chiga Aya'fama afasundeccu tevaen'jema'qqe canjan'jen Jesúsja ñoa'me Cristo qqen tsendecuma in'jaencañe. ²⁴Tsa'caen canjan'jensi majandeccuja pañamba in'jan'fa. Tsa'ma cca'indeccuja in'jan'fambi. ²⁵Tsa'caen fae'ngae in'jambipa jaye ashaen'fasi Pabloja su:

—Chiga Qquendya'pa tsu ingi tayopi'su coenzandecunga ñotsse conda. Tsa'cansi te tayopi'su Chiga Aya'fa afa'su Isaíasja qqen su:

²⁶Va aindecunga japa
qqen condaja:

Que'ija ñoa'me paña'ma
qui in'jan'faya'bi;
Canjan'jen'ma qui atte'faya'bi.

²⁷Va aindecuja injama'cho shacaquia'caen dapa,
ñotsse paña'fambi.

Tise'pa tso'fe piccoyequia'caen da'fa ñotsse atesa'ne.
Nane tsosina'qqe tsa'caen da'fa ñotsse pañasa'ne.
Tise'pa injama'cho'qqe injenge'fambi.

Tsa'camba tsu tise'pa in'jan'choma catipa
ñanga ji'fambi ña tise'pama ccushaene.

²⁸Tsa'cansi poiyl'cco ñotsse paña'faja. Ja'ñojan va Chiga ñotsse ccushaena'chomanda tsu israembindeqquianga'qqe condaseya'cho. Tsendeccu tsu ñotsse paña'faya ccushaya'chone.

²⁹Tsa'caen Pablo susi pañamba israendeccuja sombopa tisupapora afaccopa jaja'fa.

³⁰Pabloja dos canque'fa pa'cco tseni can'jen. Tise afepoen'cho tsaoni tsu can'jen. Majan tise tsaoni ji'fa'nijan Pabloja ñotsse in'jamba avusepa poiyl'cconga condase. ³¹Chiga aindecuve daya'chone tsu candusian. Toya'caen Na'su Jesucristone tsu atesian'jen. Poiyl'cconga tsa'caen dyombi'tsse condasesi majañi'qqe tise'ma se'pi'fambi.